


EUANGELION UNNI TA JESU-ÚBA CHRIST-KO-BA

UPATOARA LUKA-UMBA



The Gospel According to Luke in the Awabakal language of
Australia

EUANGELION UNNI TA JESU-ÚBA CHRIST-KO-BA UPATOARA LUKA-UMBA
The Gospel According to Luke in the Awabakal language of Australia

Public Domain

Language: Awabakalkoba (Awabakal)

2020-03-03

PDF generated using Haiola and XeLaTeX on 27 Jul 2020 from source files dated 6 Jul 2020
d6db59b5-f660-51ee-98f5-a9b6193eac6e

Contents

Luka 1

EUANGELION UNNI TA JESU-ÚMBA CHRIST-KO-BA UPATOARA LUKA-UMBA

- ¹ WONTO ba kauwálo mankulla unnoa tara túgunbilliko gurránto géen kinba,
- ² Yanti bo gearun kin bara gúkulla, unnoa tara nakillikan kurri-kurri kabiruğ gátun mankillikan wiyellikanne koba.
- ³ Murrárág tia kátan yantibo, koito bağ ba tuig ko girouğ, Teopolo murrárág ta,
- ⁴ Ğurra-uwil koa bi tuloa, unnoa tara wiyatoara banuğ ba.
- ⁵ Yanti-kálai ta Herod noa kakulla, Piriwál noa kakulla Iudaia ka, kakulla noa tarai hiereu Dhakaria yitirra, Abia-umba konara: gátun nukuğ gikoúmba yinálkun koba Aaron-umba, ğiakai bountoa yitirra Elidhabet.
- ⁶ Buloara bula kakulla murrárág Eloi kin, mikan ta ğurraielléün bula Yehóa-ko noa ba wiyellikanne yarakai ma korien.
- ⁷ Keawaran bula wonnai korien kulla, bountoa Elidhabet ğurrauwei; gátun bula ba ğurróğbai kakulla.
- ⁸ Ğátun yakita kakulla, umullielá noa ba Eloi kin makan ta, yirruğ ka ğikouğ kin hiereu koba,
- ⁹ Yanti kiloa hiereu koba uman, yirruğ ka gikoúmba ta upulliko bon porapora koiyuğ ko uwá noa ba nao koba Yehóa kai koba.
- ¹⁰ Ğátun yanti bo yantinto konara kúri wiyellielá warai ta yakita winellielá ba porapora.
- ¹¹ Ğátun paipéa noa aĝelo Yehóa-umba ğikouğ kin, ğarokillielá noa túğkağkirri ka koiyuğ kón ta porapora ka.
- ¹² Ğátun nakulla bon noa ba Dhakaria ko, unma bon noa ba, kinta ğaiya noa ba kakulla.
- ¹³ Wonto ba aĝelo wiya noa, Kinta kora bi kauwa, Dhakaria; kulla ğurra ta wiyellikanne ğiroúmba, gátun nukuğ ko ğiroúmba ko wonnai kánun ğiroúmba, gátun wiyánun bi ğiakai yitirra Ioanne.
- ¹⁴ Ğátun pitál bi kánun, pitál kauwálkan kánun pórkillinun ğikouğ kinbiruğ.
- ¹⁵ Kauwál wal noa kánun, mikan ta Yehóa kin, gátun keawai wal noa wain pitánun, keawai tarere, gátun warakağ wal noa witellinun Marai yirriyirri kan biruğ ko, waraka biruğ tunkán ta biruğ.
- ¹⁶ Ğátun noa wiyánun wal barun kauwál-kauwál wonnai Ithárael-umba Yehóa-kin ko Eloi ta barúnba.
- ¹⁷ Ğátun wal noa uwánun ğikouğ kin mikan ta kaiyu ka Marai ta Elia-uúmba, warbuğgulliko búlbúl biyuğbai tara koba wonnai kolağ, gátun barun kinko tuloa kako; uma-uwil koa barun kúri kurrikurri Yehóa kinko.
- ¹⁸ Ğátun noa Dhakariako wiya bon aĝelonuğ, Yakoai kan bağ ğurránun unni? kulla bağ ğurroğbai, gátun nukuğ emmoúmba ğurróğ géen.
- ¹⁹ Ğátun noa aĝeloto wiya bon, Ğatoa Gabriel, ğakillin Eloi kin mikan ta; gátun yuka tia wiyelliko girouğ, gátun túgunbilliko ğali tara ko pitálmullikanne ko.
- ²⁰ A! ğurrulla bi, ğóg ko wal bi kánun, gátun kaiyu korien wal bi kánun wiyelli ta, yaki-kálai tako purreáğ kako unni tara kánun ba, kulla bi ba ğurra korien wiyellikanne emmoúmba, kabo kánun wal unni tara.
- ²¹ Ğátun bara kúri ko mittia Dhakarianuğ, gátun kotellielá minnuğ-bullielá noa tunkéa noa nao ka.
- ²² Ğátun noa ba paikulléün warrai ta, kaiyu korien noa wiyelli ko barun; gátun bara ğurra Marai noa nakulla nao ba; kulla noa wauwál-wauwál umá barun gátun, ğarokillielá noa ğóg ko.
- ²³ Ğátun kirun kabulla purreáğ gikoúmba umullikanne, waita ğaiya noa uwá kokerá ko ğikouğ ka tako.

²⁴ Ġatun yukita purreaġ ka Elidhabet ġikoúmba nukug warakaġ bountoa, ġatun yuropulléun bountoa warán yellenna ka, wiyelliela bountoa,

²⁵ Yanti noa tia Yehóako umá nakulla noa tia ba purreaġ ka, mankilliko barun ba béelmulli tin kúri tin.

²⁶ Tarai-ta yellenna ka hek ka, Gabriel ta aġelo ta puntimai ta wiyabunbia bon Eloi kinbiruġ uwolliko, purrai kolaġ, Galilaia koba, ġiakai Nadharet,

²⁷ Mirrál lako wiyatoara ko, kúri kako Yothep kinko yitirra ko, wonnai taro noa Dabidúmba; ġatun mirrál ġiakai yitirra Mari.

²⁸ Ġatun noa aġelo uwa bounnoun kin, ġatun wiyelliela, A! murráraġ umatoara bi Yehóa kátan ġirouġ katoa ba; murráraġ umatoara bi nukug ka.

²⁹ Ġatun bountoa ba nakulla bon, kinta bountoa kakulla wiyellita ġikouġ kin, ġatun kotelliela bountoa minariġ unni totóġ kátan.

³⁰ Ġatun aġeloko wiya bounnoun, Kinta kora bi, Mari: kulla bin pitálmatoara Eloito noa.

³¹ A, ġurralia bi, warakaġ bi kánún, wonnai kan ġirouġ kin pika ka, ġatun yinal pórkullinún, ġatun bi ġiakai yitirra IETHU.

³² Ġatun wal noa kauwál kánún, ġatun wal bon wiyánún ġia kai Yinal ta wokka ka ko; ġatun noa Yehóako Eloito gúnún wa bon yellawollikanne biyugbai koba Dabidúmba ġikoúmba:

³³ Ġatun noa wiyánún wal yanti-katai barun Yakobúmba; ġatun ġikoúmba piri-wálkane keawai wal kánún wirán.

³⁴ Wiya ġaiya bountoa bon aġelonuġ Mariko, Yakoai ke unni kánún, kulla baġ kúri korien?

³⁵ Ġatun noa aġeloko wiya bounnoun, Tanan wal noa uwánún Maraikan murráraġkan ġirouġ kinko, ġatun kaiyuko wokka tinto wutinún wal ġirouġ, koito ba unnoa ta murráraġ pórkullinún ġirouġ kin; wiyánún ġiakai yinal ta Eloi koba.

³⁶ A, ġurralia, ġiroúmba wuġgunbai Elidhabet, warakaġ bountoa yinal ġurroġéen koba bounnoun ba; ġatun unni ta yellenna hek ta bounnoun-kai-kan wiyatoara ġurra-uwai.

³⁷ Kulla ġurakito ke noa Eloito kaiyukanto ke.

³⁸ Ġatun bountoa Mariko wiya, Kauwá yanti kámúnbilla tia wiya bi ba; ġatoa mankillikan Yehóa-úmba. Ġatun noa aġelo púntirkulléun bounnoun kinbiruġ.

³⁹ Ġatun bountoa Mari buġkulléun unti-tara purreaġ ka, ġatun uwa bountoa karakai bulkára kolaġ, kokerá ko Yuda kako;

⁴⁰ Ġatun bountoa uwa kokera ko Dhakaria-úmba kako, ġatun búġbúġ ka bounnoun Elidhabetnuġ.

⁴¹ Ġatun yakita ġaiya ġurrá bountoa ba Elidhabetto pulli Mariúmba, tulutilléun ġaiya wonnai bounnoun kin pika ka; ġatun warapál bounnoun ba Elidhabet kin Maraikanto murráraġko:

⁴² Ġatun bountoa wiyelléun pulli wokka wiyelliela, murráraġ umatoara bi nukug ba; ġatun murráraġ umatoara peil ġiroúmba pika koba.

⁴³ Ġatun minariġ tin tia unni, tanan uwa tunkan piriwál koba emmoúmba?

⁴⁴ Kullá baġ ba ġurrá pulli ġiroúmba ġurruéuġ ka emmouġ kin, wonnai ġaiya tia tulutilléun emmouġ kin pika ka pitál ko.

⁴⁵ Ġatun murráraġ umatoara bountoa ġurrá; kulla unnoa tara kánún umatoara, wiyatoara bounnoun kin Yehóa kinbiruġ.

⁴⁶ Ġatun Mariko bountoa wiya, “Maraito emmoúmba ko wiyen murrá bon Yehóanuġ,

⁴⁷ Ġatun maraito emmoúmba ko pitál umulléun Eloi kin Miroma emmoúmba.

⁴⁸ Kulla noa nakulla mirrál bountoa ba umullikan ġikoúmba; A, unti biruġ yantinto tia wiyánún murráraġ upatoara.

⁴⁹ Kulla noa tia kaiyukanto unnoa tara kauwál uma; ġatun yitirra ġikoúmba murráraġ upatoara kátan.

⁵⁰ Ġatun murray ġikoúmba barun kinba kintakan bon kátan willuggél kúri kabiruġ tarai kúri kabiruġ.

⁵¹ Túġunbilléün noa kaiyukan turruġ ġikoúmba; wupéa noa barun ġaruġ ġara yaroyaro búlbúl ban kotellikanne.

⁵² Upéa noa barán parrán kaiyukan yellawolligél labiruġ barúnba, ġatun wupéa noa barun mirrál wokka laġ.

⁵³ Ġukulla noa kapirrikan ko múrrarág ta, ġatun noa barun parólkan yuka mirrál ko.

⁵⁴ Umulléün noa ġikoúmba umullikan Itháraelnuġ, ġurrulli biruġ ġikouġ kinbiruġ murray ta ġikoúmba;

⁵⁵ Yanti wiya noa ba barun biyuġbai to ġearúnba, Abáramnuġ, ġatun barun wonnai tara ġikoúmba yanti katai.”

⁵⁶ Ġatun Mari bountoa kakulla bounnoun katoa ġoro ka yellenna ka, ġatun willuġ ba ġaiya bountoa bounnoun ka tako kokera ko.

⁵⁷ Yakita ġaiya Elidhabetúmba kakulla wonnai pórkuillinün; ġatun yinal bounnoun ba pórkuilléün.

⁵⁸ Ġatun ġurra bara kótita ko bounnoun bako, yanti Yehóako noa ba murrarág umá bounnoun kin; ġatun bara pitál kakulla ġatun bountoa

⁵⁹ Ġatun yakita ġaiya purreág ka, uwa ġaiya bara kullabulliko wonnai ko; ġatun bara wiya bon ġiakai Dhakaria, biyuġbai tin yitirra tin

⁶⁰ Ġatun tunkanto wiya bountoa, Yanoa; kulla bon wiyánün ġiakai Ioanne.

⁶¹ Ġatun bara bounnoun wiya, Keawaran ġiroúmba kótita wiya ba ġiakai unni yitirra

⁶² Ġatun bara túġa umulléün bon biyuġbai ko ġikoúmba ko, wonnén noa bon yitirra wiyánün?

⁶³ Ġatun noa wiya upulligél ko, ġatun noa upa wiyelliela, Yitirra noa ġiakai Ioanne. Ġatun bara yantinto kota.

⁶⁴ Ġatun tanoa-kál-bo kurraka buġkulléün ġikoúmba, ġatun bon ġikoúmba tállág balbal kakulla, ġatun noa wiya, ġatun noa wiya murray Eloinuġ.

⁶⁵ Ġatun bara kinta kakulla yantin ta untakál; ġatun unni tara wiyellikanne totóg kakulla yantin ta kaloġ koa bulkaroa Yuda ka.

⁶⁶ Ġatun bara yantinto unnoa tara ġurra wúnkulla barun kin búlbúl la, wiyelliela, Yakoai unni ta wonnai kánün! Ġatun máttára Yehóa-úmba ġikouġ kin kátan.

⁶⁷ Ġatun noa Dhakaria ko biyuġbai ġikoúmba, warapal bon wupéa Marai to yirriyirri to, ġatun noa wiyelliela ġiakai, ⁶⁸“Kámünbilla bon Yehóanuġ Eloinuġ Ithárael koba pitálliko; kulla noa uwa barun nakilliko, ġatun wirrilliko kúri ko ġikouġ kaiko.

⁶⁹ Ġatun bouġbuġġa noa nulka-nulka ġolomullikan ġearun, kokerá Dabid-úmba ka ġikoúmba mankillikan;

⁷⁰ Yanti noa ba wiya kurraka ko propet koba ko yirriyirrikan to yantin to, purrai yantin kurrikurri kabiruġ:

⁷¹ Ġoloma-uwil koa ġearun ġearúnba bukka tukulla biruġ, ġatun máttára biruġ barun kinbiruġ yantin tabiruġ yarakai willuġ kabiruġ,

⁷² Umulliko murray ko wiyatoara barun kin biyuġbai ko ġearúnba, ġatun ġurrulliko ġikoúmba wiyatoara yirriyirri ta;

⁷³ Pirral-man noa ġali wiyelliela bon Abáramnuġ biyuġbai ġearúnba,

⁷⁴ Ġúwil koa ġearun noa, mankilliko ġearun máttára biruġ bukkakan tabiruġ ġearúnba, ġurra-uwil koa ġéen bon kinta korien ko,

⁷⁵ Yirriyirrikan ġatun murrarágkan mikan ta ġikouġ kin, yantin ta purreág ka moron ġearúnba.

⁷⁶ Ġatun ġintoa, wonnai ta, wiyánün bin yitirra propet ta wokka kako; kulla bi uwánün ġanka mikan ta Yehóa kin, upulliko yapuġ ko ġikoúmba;

⁷⁷ Ġukilliko ġurrulliko moron ko ġikouġ kaiko kúri ko, warewarekan yarakai barúnba,

⁷⁸ Murrain tin kanwollin Eloi koba tin ġearúnba, ġurrakan wokka kabiruġ tanan uwa ġearun kinko,

⁷⁹ Ġukilliko purreaġ barun ko yellawolli ta ba ko ġoroġorà ba ko, ġatun komirra kaba tetti koba, yutilliko tinna ko ġearúnba ko yapuġ koa pitál koba koa.”

⁸⁰ Ġatun wonnai poaikulléun, ġatun ġuraki noa maraikan ko, kulla noa koruġ koa yakita ko purreaġ kako paipéa noa ba Ithárael kinko.

2

¹ YAKITA purreaġ ka, wiya noa Kaithariko Augútoko, upa-uwil koa barayantin kúri murrapulliko.

² Ġatun unni murrapullikanne una yakita Kurinio noa ba kobána kakulla Thuria ka.

³ Ġatun yantin bara uwa murrapulliko barun ka tako.

⁴ Ġatun noa Yothep uwa wokka-laġ Ġalilaia kabiruġ, kokerá biruġ Nadharet tabiruġ, Iudaia kolaġ, kokera kolaġ Dabidúmba kolaġ, ġiakai yitirra Bethlehem; (kulla noa kokerá koba ġatun kotita koba Dabidúmba;)

⁵ Murrapulliko bon ġatun Mari bounnoun katoa, wiyatoara nukuġ ġikoúmba, wonnai kan bountoa warakaġ.

⁶ Ġatun yakita kakulla, kakulla bara ba unta, purreaġ ka kátan pórkuilli koa bountoa ba wonnai.

⁷ Ġatun bountoa pórbuggulléun kurri-kurri yinal, ġatun bountoa muġgama bon kirikin to, ġatun bon wúnkulla takilligélla buttikaġ koba ka; kulla wal tantullan kokera takilligél.

⁸ Ġatun bara éipu-kál untoa kakulléun, tumimillin wirrál barun ba tokoi ta

⁹ Ġatun noa aġelo Yehóa-úmba tanan uwa barun kin, ġatun kullaburra Yehóa-úmba kakulla barun katoa; kinta ġaiya bara kakulla.

¹⁰ Ġatun noa aġeloko wiya barun, Kinta kora; kulla nurun baġ wiyen murraràġ totóġ kakilliko pitál ko, kakilliko yantin ko kúri ko.

¹¹ Kulla nurúnba pórkuilléun unni purreaġ, kokerá Dabidúmba ka, Ġolomullikan ta, noa Kritht ta Piriwál ta.

¹² Ġatun unni túġa kánun nurúnba; nanun boboġnuġ ġamatoara kirikin taba, kakillin ba takilligél laba

¹³ Ġatun tanoa kal bo paipéa konara morokokál ġikouġ katoa aġelo katoa, murraràġ wiyellin bon Eloinuġ, ġiakai,

¹⁴ Wiyabunbilla bon murraràġ Eloinuġ wokka kaba moroko kaba, ġatun kámünbilla pitál purrai tako, murraràġ umatoara barun kúri ko.

¹⁵ Ġatun kakulla ba, waita uwa bara ba, aġelo barun kinbiruġ moroko kolaġ, wiyellan bara éipu-kál taraikan-taraikan, Waita géen yakita Bethlehem kolaġ, na-uwil koa unnuġ tara kakulla ba, ġala Yehóako noa wiya ġéarun

¹⁶ Ġatun bara uwa kurrakai, ġatun nakulla Marinuġ, ġatun boboġ pirikilliela takilligél laba.

¹⁷ Ġatun nakulla bara ba, wiyabünbéa bara yantin ta purrai ta unnoa wiyellikanne wiyatoara barun wonnai tin.

¹⁸ Ġatun bara yantinto ġurra, kotelliela unnuġ tara, wiya barun bara éipu-kál-lo.

¹⁹ Wonto ba bountoa Mariko miromá unni tara, ġatun kota bountoa minki ka búlbúl-la bounnoun kin.

²⁰ Ġatun bara éipu-kál willuġ ba kakulla, murraràġ wiyellin ġatun pitálmullin bon Eloinuġ ġala biruġ natoara biruġ ġurratoara biruġ bara yantita wiyatoara ba barun kai.

²¹ Ġatun purreaġ ét ta kakulla ba, kullintiela ko túġa-witia wonnai, ġiakai bon wiya Iéthu, ġala ba wiya noa aġeloko kurrikurri noa ba pika ka kakulla kunto ka.

²² Ġatun purreaġ ka ġoloin ta killibinbin bounnoun ba, yanti Mothé-ko noa ba wiya, mankulla bara bon Hierothalem kolaġ, ġukilliko bon Yehóa kin;

²³ (Yanti wupa ba wiyellikanne ta Yehóa-úmba ġiakai, Yantin kúri tara ġanka-ġanka pika kabiruġ yirri-yirri wal kánun yitirra Yehóa koba;)

²⁴ Ġatun ġukilliko ġutoara, ġala wupa ba wiyellikanne taba Yehóa-úmba, ġiakai, Buloara purrouġkan ġa keawai wuroġ buloara poppolameri.

²⁵ A! ġatun kakulla noa tarai kúri Hierothalem kaba, ġiakai noa yitirra Thimeon; ġatun unnoa kúri wiyellikan tuloakan, ġatun ġurrullikan, mittillin pitál ko Ithárael-úmba ko; ġatun Marai yirri-yirri-kan kakulla ġikouġ kin.

²⁶ Ġatun bon wiyatoara Maraito yirri-yirri-kan-to, keawai noa nanún tettibullikanne, na-uwil koa noa Krithtnuġ Yehóa-úmba.

²⁷ Ġatun noa uwa Marai toa hieron kako: ġatun bula ba porikullaito puruma wonnai Iethu kin, umulliko bon yanti ko upatoara ko wiyellikanne tako,

²⁸ Mankulla ġaiya bon noa ġikouġ kin turrug ka, ġatun pitálma noa bon Eloinuġ, ġatun wiyelliela,

²⁹ “Wamúnbilla bi tia Yehóa yakita pitálkan, yanti wiya bi ba:

³⁰ Kulla baġ nakulla ġaikouġ ko ġolomullikan ġiroúmba, ³¹ Ġali ko kakilliko ġintoa yantin ko kúri ko mikan tako;

³² Kaibuġ kakilliko barun ethánékal ko, ġatun pitál kakilliko kúri ko Ithárael ġiroúmba ko.”

³³ Ġatun bula Yotheop ġatun Mari kotelliela unnoa wiyatoara ġikouġ kai.

³⁴ Ġatun Thimeon ta noa pitálma barun, ġatun wiyelliela Marinuġ tunkan ġikoúmba, “A! kátan noa unni wonnai kakilliko puntimulliko, ġatun bouġkulliko kauwál-kauwál barúnba Ithárael koba; ġatun túġa ko wiyéa kánun;

³⁵ (Kauwa, yirra ko bin turánun wal marai ġiroúmba kóti,) paipi-uwil koa kotatoara búlbúl labiruġ kauwál-kauwál labiruġ.”

³⁶ Ġatun kakulla wakál Anna, propetkun, yinálkun Panuel koba, konara koba Ather koba; bountoa ta ġurroġéen ġaġkakálin, ġatun kakulla bountoa poribai ta wunál la hepta ta, murrakin tabiruġ bountoa katalla;

³⁷ Ġatun bountoa maboġun kukulla wunál la éty-warra yantikalai tabiruġ, waita uwa korien bountoa hieron kabiruġ, wonto ba ġurrullielia Eloinuġ bon purréaġ ka ġatun tokoi ta ta-korien.

³⁸ Ġatun bountoa uwolliela tanoa-kal-bo, wiyapaiyéan bon Yehóanuġ, ġatun wiyelliela yantin barun ġikouġ kin barun, nakillikan ġupaiyiko Hierothalem kako.

³⁹ Ġatun upá bara ba unni tara yanti wiyatoara Yehóa koba, willuġbo ġaiya bara kakulla Galilaia kako, barun ka tako kóti kako Nadharet tako.

⁴⁰ Ġatun wonnai poaikulléun ġuraki noa maraikan kátan; ġatun pitálmatoara bon Eloi koba.

⁴¹ Waita uwa bula ġikoúmba tunkan ġatun biyuġbai Hierothalem kolaġ yanti-katai wunál la takilligél lako kaiwitoara wokka koa.

⁴² Ġatun noa ba wunál la dodeka ka, waita ġaiya uwa bara Hierothalem kolaġ wirikai ko takilli ko.

⁴³ Ġatun kirun kakulla purréaġ, willuġbo bara ba, wonnai Iéthu noa minka willuġ ka Hierothalem ka; ġatun noa Yotheopko ġatun tunkanto ġurra korien bula.

⁴⁴ Wonto bara ba punta bon barun kin konara, uwa purréaġ ka wakál la; ġatun bara bon tiwa kóti ta ka.

⁴⁵ Ġatun bara na korien bon ba, willuġbo ġaiya bara katéakún Hierothalem kolaġ tiwolliko bon.

⁴⁶ Ġatun purréaġ ka ġoro kulla, nakulla ġaiya bara bon murrug ka hieron ka, yellawolliela willi ka barun kin didathkaloi ka, ġurrullielia barun wiyelliela barun wiyellikanne pulli.

⁴⁷ Ġatun yantinto bara bon ba, ġurra, kotelliela bara bon ġuraki ġatun wiyatoara ġikoúmba.

⁴⁸ Ġatun nakulla bara bon ba, unma ġaiya barun; ġatun tunkanto ġikoúmba-ko wiya bon, Nai, minariġ tin bi kakulla ġearun kai? a! biyuġ ta uwa bali, tiwolliela bali bin, minki-kan-to.

⁴⁹ Ġatun noa wiya barun, Minariġ tin nura tia tiwolliela? keawai nura ba ġurran-upa-uwil koa baġ pintunúmba-kan wiya noa tia ba?

⁵⁰ Ġatun bara ġurra korien unnoa wiyelli ta wiya noa ba barun,

⁵¹ Ġatun noa uwa barun katoa barán Nadharet tako, ġatun ġurrullikan noa kakulla barun kin: wonto bountoa ba tunkan to ġikoúmba miromá unni tara wiyellikanne murrug ka búlbúl la bounnoun kin.

⁵² Ġatun noa Iéthuko poaikulléun ġuraki kakilliko, ġatun kauwál kakilliko, ġatun pitálmulliko bon Eloito ġatun kúriko.

3

¹ Yakita kakulla wunál la pipátin ta piriwál koba Tiberio Kaithar koba, kobána noa Pontio Pilato Iudaia ka, ġatun tetrák noa Herod Galilaia ka, ġatun ġikoúmba kóti Pilip tetrák noa Ituréa ka, ġatun yantin tako Trakoniti ka, ġatun Luthanio tetrák noa Abiléne ka,

² Annath ġatun Kaiapath hiereu piriwál bula kakulla, wiyellianne Eloj koba uwa Ioanne kinko bon, yinal Dhakaria koba, koruġ kaba.

³ Ġatun noa uwa yantin toa purrai toa Iorádan toa, wiyelliela korimulliko kanumaiko, warekulliko yarakai;

⁴ Yanti wupaitoara biblion ka wiyellikanne Ethaia koba propet koba, ġiakai, Pulli wakál koba wiyelléun koruġ kaba, Yapuġ Yehóa koba murrárág umulla nura, tuloa kakillikoyapuġ ġikoúmba.

⁵ Yantin ta pilabai warapal upinún, ġatun yantin ta bulkára umánún puntig; ġatun warin-warin ta umánún tuloa, ġatun yapuġ yarakai wolluġbiara umánún poitoġ;

⁶ Ġatun yantinto nanún wal ġolomullikanne Eloj koba.

⁷ Wiya ġaiya noa barun konara uwa bara korimulliko ġikouġ kinko, Ela béara! konara maiya kiloa nura! ġanto nurun wiya murralliko bukka tin tanan ba uwánún?

⁸ Koito nura ba umullia murrárág minki kabiruġ; ġatun kota yikora nura kóti ka minki ka nurun kin wiyelliko, Abáram ġearun noa ġearúnba biyuġbai; kulla baġ wiyen nurun, Eloj noa kaiyukan kátan umulliko unti tara biruġ tunúġ kabiruġ wonnai kakilliko Abáram kinko.

⁹ Ġatun yakita baibai wúnkulla kúlai ta wirrá ka; koito ba yantin kúlai keawai kátan murrárág kólbúntillánún wal barán, warekulliko koiyuġ kako.

¹⁰ Ġatun kúriko bon wiya, wiyelliela, Minnuġ banún ġaiya géen?

¹¹ Wiya noa barun, wiyelliela, Niuwoa kót-kan buloarikan ġikoúmba, ġumunbilla bon keawai ko; ġatun niuwoa kuntokan ġumúnbilla bon yanti kiloa.

¹² Uwá ġaiya bara telóné korimulliko, ġatun wiya bon, Piriwál, minnuġ banún géen?

¹³ Ġatun noa wiya barun, Manki yikora untoa-kál unnoabo mara wiyatoara nurúnba.

¹⁴ Ġatun bara army-kanko wiya bon wiyelliela, Minnuġ banún géen? ġatun noa wiya barun, Bukkamai yikora yantin kúri, ġatun wiyéa-yemmai yikora ġakoyellaikan yantin kúri; ġatun murrari kauwa nura ġaloakan ġutoarikan nurúnba.

¹⁵ Ġatun bara ba kúri kotelliela, ġatun yantinto kúriko kotelliela murrug ka ba ko, búlbúl la ba ko barun kin ba ko ġikouġ Ioannenuġ, minariġ noa Kritht ta, mirka keawaran.

¹⁶ Ioanneto noa wiya barun yantin ta, wiyelliela, Korimulliko baġ kátan nurun bato ko; wonto ba wakál kaiyukan kauwál-kau wálkan ġatoa kiloa uwánún, murrárág korien baġ poruġbuġgulliko túġġanuġ ko ġikoúmba ko; niuwoa ta korimanún nurun Marai to yirri-yirri ko ġatun koiyuġ ko:

¹⁷ Pituon ġikoúmba mankillin máttara ba, ġatun murkun noa umánún búnkiliġél laba ġikoúmba, ġatun noa ka-umánún wiet ġikoúmba tako kokerá ko; wonto ba tirri koiyuġ-banún wal noa koiyuġ ka talokulli korien ta.

¹⁸ Tarai ta yantin kauwál-kauwál wiya noa: gátun wiyelli ta ba ko barun kúri.

¹⁹ Wonto noa ba Herodnuğ tetráknug piralma bon, noa boun noun kin Herodia kin nukug ka Pilip-úmba gíkoúmba kóti koba, gátun yantin yarakai noa ba uma Herodto,

²⁰ Yanti unni uma, wirriğbakulla bon noa Ioannenuğ jail ka.

²¹ Yakita barunbo karima yantin kúri, kakulla gáiya korimulliea bon Iéthunuğ, gátun wiyelliea, moroko gáiya waruğkalléun,

²² Gátun uwa barán Maraikan yirri-yirrikan murrin kiloa purrouğkan kiloa, gíkoug kin; gátun wakál pulli kakulla moroko tin, wiyelliea, Gíntoa ta emmoúmba yinal pitálmullikanne; pitáلمان bağğirouğ.

²³ Gátun niuwoa bo Iéthu kakilliliea wunál la triakonta ka gíko-úmba, puntelliea bon yinal Yothepúmba, wonto yinal Eli-úmba;.....

³⁸ Wonto yinal Enoth-úmba, wonto yinal Thet-úmba, wonto yinal Adam-úmba, wonto yinal Eloi-úmba.

4

¹ GÁTUN noa Iéthu warapáalkan Maraikan yirri-yirri-kan, willuğbo kakulla Iorádan tabiruğ, gátun bon yatéa Maraito koruğ kolağ,

² Nupitoara bon purreağ ka tettarakonta ka diabollo. Gátun unta tara purreağ ka keawai noa ta ba: gátun góloin ba unta tara kakulla, kapiirri gáiya noa kakulla.

³ Gátun noa diabollo wiya bon, Wiya, bi ba yinal Eloi koba, wiyellia unni tunuğ ka-uwil koa kunto.

⁴ Gátun noa Iéthuko bon wiya, wiyelliea, Wupatoara ta, Keawai kúri kánún moron kunto kabiruğ, wonto ba Eloi koba pulli tabiruğ.

⁵ Gátun noa diabollo yutéa bon waita bulkará ko, nanunbéa bon yantin piriwál koba purrai ta ba tanoa-kál-bo kurrakai.

⁶ Gátun noa diabollo wiya bon, yantin kaiyu kako gunún bag girouğ, gátun pitálmulliko gali tara ko; koito ba gúkulla tia emmouğ; gátun bag gutan ganúmba pitál bag ba kátan.

⁷ Gíntoa ba wiyánún tia, kánún bin yantin giroúmba.

⁸ Gátun noa Iéthuko wiya bon, Kauwa bi, Thátan, willuğ ka emmouğ kin; koito ba wupatoara, Wiyánún wal bi Yehóanuğ giroúmba Eloinuğ, gátun gíkoug bo gurránún wal bi.

⁹ Gátun noa bon yutéa Hierothalem kolağ, gátun wúnkulla bo búlwarra ka hieron ka, gátun wiya bon, Yinalla bi ba unni Eloikoba, warekulla bi unti biruğ barán:

¹⁰ Kulla ba wupatoara ta, Wiyánún noa barun ağelo ko nakilliko girouğ, gólomulliko girouğ;

¹¹ Gátun bara bin manún máttarró wokka lag, tinna koa girouğ pultéa-kún tunuğ ko yantin ta.

¹² Gátun Iéthuko, wiyelliea, wiya bon, Wiyatoara ta, Yanoa wal bi numa yikora bon Yehóanuğ Eloinuğ giroúmba.

¹³ Gátun noa diabollo góloin kakulla unni tara nupatoara, waita gáiya noa uwa gíkoug kinbiruğ yakita ko.

¹⁴ Gátun noa Iéthuko willuğ ko kakulla, kaiyukan Maraikan, Galilaia kako: gátun totóğ bon kakulla yantin ta purrai karig ka.

¹⁵ Gátun noa wiyelliea thunagóg ka barun ka ta, pitál wiyatoara bon yantinto.

¹⁶ Gátun noa uwa Nadharet tako, kakulla noa poaikulléun unta; gátun, yanti katai noa ba, uwa noa thunagóg kako purreağ ka thabbat, gátun garokéa wokka lag wiyelliko.

¹⁷ Gátun gúkulla bon biblion ta propet koba Ethaia koba: gátun buğbuğga noa ba biblion, nakulla gáiya noa giakai upatoara,

¹⁸ Marai ta unni Yehóa koba emmouğ kinba, kulla noa tia putia wiyelliko Euagelion barun kin mirrál la; yuka noa tia turon umulliko minkikan ko, wiyelliko barun wúntoara ko wamunbilliko, gátun na-uwil koa bara munmin to, buruğ buğgulliko barun búntoara,

¹⁹ Wiyelliko * * * gurrabunbilliko wunál la pitálmullikanne Yehóa koba.

²⁰ Ġatun noa wirriġ-buġġa biblion, ġatun noa ġutéa kan bon umullikan ko, ġatun yellawa barán. Ġatun bara bon pimilliela ġaikug ko, yantin thunagóg ka ba ko.

²¹ Ġatun noa barun tanoa bo wiya, Turin-pai-béa unni wiya upatoara nurun kin ġurreáġ ka unti purreáġ ka.

²² Ġatun yantinto bara ġurrullliela bon, ġatun kota bara pulli murray kurraka kabirug ġikoug kinbirug. Ġatun bara wiya, Wiya, unni ta Yothepúmba yinal?

²³ Ġatun noa barun wiya, Nura ta wiyánun tia unni wiyellikanne, Karákal, turon bi umulla ġintoa bo; ġurra ġéen ba umatoara Kapernaum ka, umulla bi unti yantin ta purrai ta ġiroúmba ka.

²⁴ Ġatun noa wiya, Tuloa nurun bag wiyán, keawai propet ġurrá korien ġikoug ka ta purrai ta kóti ka

²⁵ Wonto bag ba nurun wiyán tuloa, kauwál-kauwál ta mabogun Ithárael kulléun purreáġ ka Elia-úmba ka, yakita wirriġbakulla moroko ta wunál ta ġoro ġatun yellenna hek ta, tara-wará kakulla yantin ta purrai kariġ ka;

²⁶ Keawai Elianug yuka ba barun kinko, wonto ba Tbarepta kako Thidoni kako nukug kako mabogun tako.

²⁷ Ġatun kauwáhkauwákan leprokan Ithárael ka, yaki-kálai Eliéu koba propet koba; keawaran wakál barun kinbirug turon umatoara, wonto ba noa Naaman Thuriakál.

²⁸ Ġatun yantin bara kakulla thunagóg ka, ġurra bara unni tara, bukka kauwál kakulla

²⁹ Ġatun bouġkulleún, ġatun yipa bon kokerá birug, ġatun bon yutéa pita kako bulkará ko kokerá ko wittitoara ko, wareka uwil koa bara bon walluġgón barán.

³⁰ Wonto noa ba uwolliela Willi koa barun katoa, waita uwa.

³¹ Ġatun noa uwa barán Kapernaum kako, kokerá ko Galilaia kako, ġatun wiyelliela barun purreáġ ka thabbat ka.

³² Ġatun bara kota wiyellikanne tin ġikoúmba tin; kulla ġikoúmba pulli kaiyukan.

³³ Ġatun kakulla wakál kúri thunagóg ka, ġikoug kin minki ka marai kakulla diabol koba yarakai koba, ġatun noa kaipulléun wokka,

³⁴ Wiyelliela, Kámunbilla ġearun; minnuġ banun ġéen bin ġintoa Iéthu Nadharetkál? uwa bi ġearun tetti-umulli kolaġ? ġimillin banug ġintoa ta; wakál bo ta yirri-yirri-kan Eloi koba.

³⁵ Ġatun bon Iéthuko koakulla, wiyelliela, Kaiyellia bi, ġatun paikulléa ġikoug kinbirug. Ġatun bon ba wareka willi ka diabollo, paikulléun noa ġikoug kinbirug, ġatun keawai bon tetti búntima ba.

³⁶ Ġatun bara yantinto kota, ġatun wiyelliela barabo-barabo, Minariġ unni wiyellikanne! kulla noa wiya kaiyu-kan-to barun diabolnuġ yarakaikan, ġatun barun paikuléun warrai tako.

³⁷ Ġatun totóg ġikoúmba kakulla yantin toa purrai kariġ koa.

³⁸ Ġatun noa uwa thunagóg kabirug, ġatun pológkulléun Thimon kinko kokerá ko. Ġatun tunkán Thimonúmba nukug koba munni kakulla karinkan; ġatun bon bara wiya bounnoun kai kolaġ.

³⁹ Ġatun noa ġarokéa bounnoun kin turruġ ka, ġatun noa koakulla karin; ġatun wareka ġaiya bounnoun karinto; ġatun bounnoa bouġkulléun tanoa-kál-bo, ġatun umullliela barun kaiko.

⁴⁰ Ġatun punnál ba pulóg-kulliléun, yantin bara mankulla munni-munni-kan ġikoug kinko; ġatun noa wunpilléun barun kin máttara yantin ta, ġatun turon uma barun.

⁴¹ Ġatun diabol kauwál-kauwál paikulléun kauwál-kauwal labirug, kaibullliela, ġintoa ta Kritht ta, yinal ta Eloi-koba. Ġatun noa barun koakulla wiya korien; kulla wal bara ġimilléun bon Kritht ta noa unnoa.

⁴² Ġatun purreáġ ba kakulla, waita noa uwa korariġ; ġatun bara kúriko tiwa bon, ġatun uwa ġikoug kin, ġatun mima bara bon, keawai noa waita wapa barun kinbirug.

⁴³ Ġatun noa wiya barun, Wiyánun bo ta wal bag piriwálgél la Eloi koba taraikan ta kokerá; kulla wal tia ġaliko yuka.

5

¹ ĠATUN yakita kakulla, warapa bon ba bara kuriko, ġurrulliko wiyellikanne Eloi koba, ġarokéa noa pitta ka waraka Gennetharet ta,

² Ġatun nakulla buloara murrinawai kakilliela wara ka; wonto ba bara makoroban waita uwa murrinawai tabiruġ, ġatun bara umulliela pika mirkun.

³ Ġatun noa uwa wakál la murrinawai ta Thimon koba ka, ġatun wiya bon yógyóg umullia purrai tabiruġ. Ġatun noa yellawa barán, ġatun wiyelliela barun kùri murrinawai kabiruġ.

⁴ Ġatun ġoloin noa ba wiya, wiya noa Thimónnuġ bon, Tuirkullia pirriko kako, ġatun wura pika nurúnba mankilliko.

⁵ Ġatun Thimónto, wiyelliela, wiya bon, Piriwál, uma ġéen tokoi ta yanti-katai, ġatun man korien; kulla bi wiyán wupinún wal baġ barán pika.

⁶ Ġatun uma bara ba unni, kokoi-kokoi bara uma makoro katai kal, ġatun pika kilpaiya.

⁷ Ġatun bara wokkaimulléun barúnba tarai taba murrinawai taba; wa-uwil koa barun wintamulliko. Ġatun bara uwa, ġatun warapál bara wupéa buloara murrinawai, pillukulliela ġaiya bara.

⁸ Nakulla noa ba Thimónto Peterko, puntimulléan noa Iéthu kin warómbuġ ka, wiyelliela, Ela Piriwál! yuriġ bi wolla emmouġ kinbiruġ; kulla baġ yarakairán kùri kátan.

⁹ Kulla noa kota, ġatun yantin bara ġikouġ katoa ba, kauwálin makorrin mankulla bara ba.

¹⁰ Ġatun yantibo bara Yakobo ġatun Ioanne, yinal ta Lebedaio koba, mankillai bula ba Thimon katoa. Ġatun Iéthako noa wiya bon Thimóunuġ, Kinta kora bi; yakita biruġ manún wal bi barun kùri.

¹¹ Ġatun mankulla bara ba murrinawai barán purrai tako, wúnkulla bara yantin, wirroba bon bara.

¹² Ġatun yakita kakulla, kakulla noa ba tarai ta kokerá, a! wakál kùri kauwál leprokan; nakilliela noa Iéthunuġ puntimulléun ġoarrá ko, ġatun wiya bon, wiyelliela, Piriwál, wiya, bi ba kalyukan kánún, umánún bi tia turon.

¹³ Ġatun noa bon wupilléun máttára ġikouġ kin, wiyelliela, Kauwá; turon bi kauwa. Ġatun tanoa-kál-bo leprota wareka ġikouġ kinbiruġ ko.

¹⁴ Ġatun noa bon wiya, wiyéakún koa noa barun kùri; wonto ba yiruġ uwa túġunbilliko ġintoa bo hieru kinko, ġatun ġüwa kulla bi turon umatoara, yanti to Mothé ka noa ba wiya, ġurrulliko kakilliko barun.

¹⁵ Wonta ba yantin kakulla totóg ġikouġ yantin toa purrai toa: ġatun kauwálko nara uwa ġurrulliko, ġatun turon kakilliko barun munni-munni ġikouġ kinbiruġ ko.

¹⁶ Ġatun noa uwa koruġ kako, ġatun wiyelliela.

¹⁷ Yakita kakulla tarai ta purreáġ ka, wiyelliela noa ba, yellawa ba Parithaioi ġatun didathkaloi wiyellikanne koba, yantin tabiruġ kokerá biruġ Galilaia kabiruġ, ġatun Iudaia kabiruġ, ġatun Hierothalem kabiruġ; ġatun kaiynto Yehóa-úmba kakulla turon umulliko barun.

¹⁸ A! ġatun bara kùri wakál kùri kurréa pirrikilligél la munnikan karál; ġatun numa bara bon kurrilliko kokerá kolaġ, ġatun wúnkilliko bon ġikouġ kinko mikan tako.

¹⁹ Ġatun keawai bara napa wonnén kurrilliko murrúġ kolaġ konara tin, uwa bara wokka laġ kokerá búlwarra ka, ġatun wupéa bon barán kulla koa willi-willi kako pirrikilligélkan Iéthu kin mikan ta.

²⁰ Ġatun nakulla noa ba kotellikanne barúnba, wiya noa bon, Ela kùri, yarakai ġiroúmba wareka ġirouġ kinbiruġ.

²¹ Ġatun bara ġárammateu ġatun Parithaioi kota, wiyelliela, Ġan-ke unni wiyen ba yarakai? Ġanto kaiyu-kan-to warekulliko yarakai, wonto ba wakállo Eloito?

²² Wonto noa ba Iéthuko ġurra kotatoara barúnba, niuwoa wiya wiyelliela barun, Minariġ tin nura kotelliela búlbúl lako nurun kin ba ko.

²³ Wonnén murrárág wiyelliko, giroúmba ko yarakaito wareka girouğ kinbiruğ; ga wiyelliko, Bouğkullia gátun uwolliko?

²⁴ Wonto ba gurra-uwil koa nura kaiyukan noa yinal kúri koba purrai taba yarakai warekulliko (wiya noa munni karál), Wiyan banuğ, bouğkullia gátun mara giroúmba pirrikilligél, gátun waita unwolla girouğ ka tako kokerá ko.

²⁵ Gátun tanoa-kál-bo bouğulléün noa barun kin mikan ta, gátun mánkulla unnuğ gikoúmba pirrikéa noa ba, gátun waita uwa gikouğ ka tako kokerá ko koti kako, pitálmullielá bon Eloinuğ.

²⁶ Gátun yantin bara kotelliela, gátun bara gáiya pitálma bon Eloinuğ, gátun kinta lağ bara kauwál, kátan wiyelliela, Nakulla géen minariğ konéin buğgai.

²⁷ Gátun yakita yukita waita uwa noa, gátun nakulla wakál telónénuğ, giakai yitirra Lebi, yellawollin wúnkilligél la; gátun noa wiya bon, Yettiwolla tia.

²⁸ Gátun noa wúnkulla yanti bo bouğkulléün, gátun noa bon yettiwa.

²⁹ Gátun Lebiko bon noa upéa kauwál takillikanne gikouğ ka ta koti ka kokerá: gátun kauwál kakulla konara telónai ko gátun tarai to yellawa barun katoa

³⁰ Wonto ba barúnba gárammateu gátun Parithaiói koakillan bara barun wirrobullikan gikoúmba, wiyelliela, Minariğ tin nura tatan gátun pittan barun katoa telónai koa gátun yarakai toa?

³¹ Gátun noa Iéthuko wiya barun, wiyelliela, Bara ba moron tai kátan keawai bara wiyan karákál; wonto ba bara munni kátan.

³² Uwa bag wiya korien ko murroğ taiko, wonto ba yarakai willuğ ko minki kakilliko.

³³ Gátun wiya bon bara, Minariğ tin bara mupai kátan murrinmurrin wirrobullikan Ioanne-úmba, gátun wiyan wiyellikanne, gátun yantibo bara Parithaiói koba; wonto ba giroúmba ko tatan gátun pittan?

³⁴ Gátun noa wiya barun, Wiya, nura kaiyukan mupai umulliko barun wonnai kakillaikanne, yakita-kálai poribai ba kátan barun katoa ba?

³⁵ Wonto ba purreäg kánún wal, mánún wal bon ba poribai barun kinbiruğ, gátun yakita gáiya bara mupai-kakillinún purreäg ka unta tara.

³⁶ Gátun wiya noa barun wakál parabol giakai: Keawai kúri ko wupillinún buğgaikál korokál la; ga ba, yanti buğgaikál yirbuğganún gáiya wal, gátun pontol buğgaikál labiruğ keawai korokál kilo kátan.

³⁷ Gátun keawai kúri ko wupinún buğgaikál wain pika ka korokál la; kulla buğgaikállo potopai-yanún wal pika ka, gátun kiroabullinún, gátun pika kánún yarakai.

³⁸ Wonto ba buğgaikál wain wunún wal buğgaikál la pika ka; gátun buloara murrárág kátan.

³⁹ Gátun keawai kúri koba pittánún korokál wain keawai noa mánún buğgaikál wain, kulla noa wiyan korokál ta murrárág.

6

¹ GÁTUN yakita thabbat ka buloara, yukita thabbat ka kurri-kurri, uwa gáiya noa murrúğ koa yeaiğél loa; gátun bara wirbulli-kan-to gikouğ ka to tittia wolluğ yeai, gátun takulla mirro-mirromá máttára barun kin.

² Gátun taraikanto Parithaiói koba wiya barun, Minariğ tin nura uman unnoa keawaran murrárág umulliko unti tara purreäg ka thabbat ka?

³ Gátun noa Iéthoko wiya, wiyelliela, Wiya nura, wiya nura, wiya ba unni, Dabid-to noa ba upa, niuwoabo ba kapirri kakilla gátun bara gikouğ katoa;

⁴ Uwa noa ba kokerá kai Eloi koba, gátun mankulla takulla nulai nakillikanne, gátun gúkulla barun gikouğ katoa ba ko, keawaran murrárág takilliko, wonto ba barúnba ko hiereu koba?

⁵ Gátun noa barun wiya, Yinal ta kúri koba, piriwál noa kátan yantin ko thabbat ko.

⁶ Gátun yakita kakulla tarai ta thabbat ta, uwa gáiya noa thunagóg ka gátun wiyelliela: gátun wakál kúri unta kakulla, máttára gikoúmba túgkağkeri tirrai kakulla.

⁷ Ġatun bara ġàmmateuko ġatun Parithaioiko tumiméa bon, wiya bon noa ba turon umulla purreáġ ka thabbat ta; wiyayemma-uwil koa bara bon.

⁸ Wonto noa ba kota barúnba ġurrullia, wiya bon noa máttàrakan tirraikan, Bouġkullia, ġatun ġarokilla Willi ka. Ġatun noa bouġkulléun, ġatun ġarokéa.

⁹ Wiya ġaiya noa Iéthuko barun, Wiyánún wal bag nurun unni; wiya tuloa ta umulliko, murráráġ ġa yarakai umulliko purreáġ, ka thabbat ta? moron umulliko, ġa warekulliko?

¹⁰ Ġatun nakilliela kari-kari yantin barun, wiya bon noa, Tutullia bi máttàra ġiroúmba. Ġatun upulléun ġaiya noa, ġatun máttàra ġaiya bon turon uma yanti tarai ba.

¹¹ Ġatun bara warapalkan bukkakan kakulla; ġatun murráráġ wiyellan barabo-barabo, minnuġ banún bara bon ba Iéthunuġ.

¹² Yakita unta purreáġ ka, uwa noa bulkára kolaġ wiyelliko, yanti-katai noa tokoi ta wiyelliela bon Eloi-nuġ.

¹³ Ġatun yakita purreáġ ta, kaai ba noa barun wirrobullikan ġikoúmba; ġirimulléun noa barun kinbiruġ dodeka niuwoa, barun wiya ġiakai yitirra apothol;

¹⁴ Thimónnuġ (wiya noa ġiakai yitirra Peternuġ), ġatun ġikoúmba kurrakóġ Andrea, ġatun Yakobo ġatun Ioanne, ġatun Pilip ġatun Bátolomai,

¹⁵ Mattaio ġatun Thoma, ġatun Yakobo Alpai-úmba, ġatun Thimon ġiakai wiya yitirra Dheloté,

¹⁶ Ġatun Iudath kurrakóġ ta Yakobo-úmba, ġatun Iudath Ithákariot, ninwoa ġakoiyayé noa.

¹⁷ Ġatun noa uwa barán barun katoa, ġatun ġarawan tako ġarokéa noa, ġatun konaró wirrobullikan ġikoúmba, ġatun kauwál konara kùri Iudaiakál, ġatun Hierothalemkál, ġatun korowátari Turokál ġatun Thidonikál, uwa bara ġurrulliko bon, ġatun turon umulliko barun ba munni;

¹⁸ Ġatun bara wonkálman yarakai to marai to: ġatun barun umá turon.

¹⁹ Ġatun yantinto konaró numulla bon bara; kulla murráráġ paibéa ġikouġ kinbiruġ, ġatun noa turon umá yantin barun.

²⁰ Ġatun noa wokkalan nakulla ġaikug ko ġikoúmba wirrobullikan, ġatun wiya, Murráráġ umatoara mirrálko; kulla nurun ba piriwálġél la Eloi koba.

²¹ Murráráġ umatoara nura kapirrikan yakita: kulla nura warapan wal kakilliko. Murráráġ umatoara nura túnkillin yakita, kulla nura kintellinún wal.

²² Murráráġ umatoara nura, yarakai umánún ġaiya nurun kùri ko, ġatun warekanún nurun, ġatun yarakai wiyánún nurun, ġatun warekanún yitirra nurúnba yanti yarakai ba, ġikouġ kin biruġ yinal kùri koba kabiruġ.

²³ Pitál nura kauwa ġatun úntellia unta purreáġ ka; kulla nurúnba ġukillianne kauwál kátan moroko kaba; yanti umá bara biyuġbai tako barun ka to barun propetnuġ.

²⁴ Yapal nura porólkan kátan! kulla nura mankulla ta pitál nurúnba.

²⁵ Yapál nura warakan! kulla nura kapirrikánún. Yapal nura kintellan yakita! kulla nura ġirellinun ġatun túnkillinún.

²⁶ Yapal nura, murráráġ wiyánún ba yantinto kuriko nurun! yantibo barúnba biyuġbai ta ko barun ġakoyaye propetnuġ.

²⁷ Ġiakai baġ wiyan nurun ġurrullikan, Pitálumulla barun yarakai willuġ nurúnba; murráráġ umulla barun yarakai nurúnba uman,

²⁸ Murráráġ barun wiyella koatan nurúnba; ġatun wiyella bon Eloinuġ wiyella barun yarakai nurúnba uman.

²⁹ Ġatun búnnún ba wakál ġan kulló tarai to, tarai ġukillia; ġatun niuwoa manún wurabil ġiroúmba, wiya yikora wiwi manki yikora unni doan.

³⁰ Ġuwa barun yantin ko wiyellinún ba ġirouġ kin; ġatun niuwoa ba mankulla tullokán ġiroúmba wiya yikora kari bon.

³¹ Ġatun unnoa la kotan nura la murráráġ umulliko barun kùri nurun, umulla nura yantibo ta barun.

³² Kulla nura pitálman barun pitálman nurun, minariǵko-ke unnoa? kulla bara yarakai-kan-to yantibo uman.

³³ Ğatun murrárǵ nura umánún ba barun ǵali murrárǵ nurun uman, minariǵko-ke unnoa? kulla bara yarakai-kan-to yantibo uman.

³⁴ Ğatun mumbinún nura ba barun kotan nura willuǵbo upilliko barun, minariǵko-ke unnoa? kulla bara yarakai willuǵbo mumbilla barun willuǵbo upilliko yantibo.

³⁵ Wonto ba nura pitálumulla barun yarakai willuǵ nurúnba; ǵatun murrárǵ umulla, ǵatun mumbilla kotan keawai willuǵbo upulliko; ǵatun ǵutoara kauwál kánún nurúnba, ǵatun nura wonnai kánún wokka koba; kulla noa murrárǵ uman barun wiyapaiye korien ǵatun barun yarakai.

³⁶ Kauwa nura minkikan, yantibo Biyuǵbai nurúnba minki kátan.

³⁷ Kota yikora yarakai, ǵatun keawai nurun kotánún yarakai: pirriralmai yikora nura, ǵatun keawai nurun pirriralmanún: warekilla nura, ǵatun nurúnba warekánún.

³⁸ Ğuwa, ǵatun ǵunún wal nurun; warapál, upulla barán, ǵatun tolomulla kaumulliko, ǵatun kiroabullin barán, ǵunún wal kúri nurun ǵielkaǵ ka nurun kin. Kulla yantibo upitoara nura upullin, upéa kánún nurun.

³⁹ Ğatun noa wiya barun wakál parabol; wiya, munminto yutinún tarai munmin? wiya, wal bula-buloarabo warakullinún barán kirun tako?

⁴⁰ Wirrobullikan ta keawaran noa kauwál korien ǵikouǵ kin piriwál la; wonto ba tuloa kátan, kánún noa yanti piriwál ba ǵikouǵ ba.

⁴¹ Ğatun minariǵ tin bi natan moriǵ ǵirouǵ ka ta ba ǵaikuǵ kaba kurrikóǵ kaba, wonto ba na korien bi tulkirri ǵaikuǵ kaba ǵirouǵ kinba kóti kaba?

⁴² Ğa, yakoai bi wiyán bon kurrikóǵ ǵirouǵ ba, Biggai, yakoai tia poruǵbuǵgabunbilla moriǵ ǵirouǵ kinba ǵaikuǵ kaba, keawai bi ba nakillin tulkirri ǵirouǵ kaba? ǵintoa ǵakoiyaye! buruǵbuǵ ǵala kurri-kurri tulkirri ǵaikuǵ kaba ǵirouǵ kinba kóti kaba, ǵatun nanún ǵaiya bi murra-murrárǵ umulliko moriǵ ǵaikuǵ kaba kurrikóǵ kaba ǵirouǵ ka ta ba.

⁴³ Kulla ba kúlai murrárǵ ta kátan, keawai yeai yarakai upin; ǵa keawai kúlai yarakai ta kátan, yeai murrárǵ upin.

⁴⁴ Wonto ba yantin kúlai ǵimilliko kóti tin yeai tin; kulla bara kúri mán korien kokuǵ tulkirri-tulkirri tin, ǵa titi korien bara botru maro tin.

⁴⁵ Murrárǵko noa kúriko wupillin noa murrárǵ wunkilligél labiruǵ minki kabiruǵ búlbúl labiruǵ ǵikouǵ kinbiruǵ; ǵatun noa yarakai wupullin noa yarakai wunkilligél labiruǵ yarakai ta biruǵ minki kabiruǵ búlbúl labiruǵ ǵikouǵ kinbiruǵ; kulla ǵikoúmba ko kurraka ko wiyán kauwál labiruǵ ko búlbúl labiruǵ ko.

⁴⁶ Ğatun minariǵ tin nura tia wiyán, Piriwál, Piriwál, ǵatun uwa korien nura unnoa tara wiyán nurun baǵ ba.

⁴⁷ Ğan tia ba uwánún emmouǵ kin, ǵatun ǵurran wiyellita emmoúmba, ǵatun ǵaloo uman, túǵunbinún baǵ nurun ǵan kiloa noa:

⁴⁸ Niuwoa ba wakál yanti kúri kiloa, wittia noa kokerá ǵatun pinnia pirriko, ǵatun wupéa tuǵǵa tunuǵ ka; ǵatun poaikulléün ba tunta-tunta, waiumbul murrá koribibi kokeroa, ǵatun ǵeawai tolomá pa; kulla wal wittia tunuǵ ka.

⁴⁹ Wonto ba ǵurran ǵatun uma korien, kúri kiloa noa wittia kokera tuǵǵa korien purrai ta: waiumbul murrá koribibi ǵali, ǵatun warakulléün tanoa-kál-bo; kauwála unnoa warakullin kokerá koba.

7

¹ WIYA noa ba ǵoloin ǵikoúmba wiyellikanne, mikan ta yantin ta kúri ka, uwá noa Kapernaun kako.

² Ğatun tarai koba kapátin koba umullikan munni kakilliela muluǵkilliliela tetti, pitál umatoara noa ǵikoúmba.

³ Ġatun, ġurrá noa ba Iéthunuġ, wiyabunbéa noa barun ġarokál Hebáraioi koba, wiyelliela bon uwa-uwil koa noa pirbuġgulliko ġikoúmba ko, umullikan ko.

⁴ Ġatun uwa bara ba Iéthu kin, wiya ġaiya bon bara tanoa-kálbo wiyelliela, Murráràġ noa uma-uwil koa noa bon yanti:

⁵ Kulla noa pitálman ġearúnba kúri, ġatun noa wittia ġearun thunagóg.

⁶ Uwa ġaiya noa Iéthu barun katoa. Ġatun kalog korien ta noa ba kakulla kokerá kolaġ, yuka noa barun kapátinto kóti ta ġikouġ kin wiyelliela bon, Piriwál, yanoa bi; kulla bag keawaran murráràġ korien uwa-uwil koa bi emmouġ kin kokerá:

⁷ Yaki tin baġ kota murráràġ korien bag uwolliko ġirouġ kinko; wonto ba wiyella wakál wiyellikanne, ġatun emmoúmba umullikan pirkullinún wal.

⁸ Kulla baġ ba kaiyukan wiyelliko, emmouġ kinba bara kakillin army-kan; ġatun baġ wiya wakál, Yuriġ, ġatun waita ġaiya noa uwa; ġatun tarai, Kaai, ġatun noa uwa tanan; ġatun emmoúmba umullikan, Umulla unni, ġatun umá ġaiya noa.

⁹ Iéthuko noa ba ġurrá unni tara, kotelliela noa ġikouġ, ġatun warrakulléin noa, wiya ġaiya noa barun wirroba bon ba, Wiyan baġ nurun, keawaran baġ na pa yanti ġurrullikanne kauwál, keawai yanti Ithárael la kátan.

¹⁰ Ġatun bara yukatoara, willuġbo uwolliebla kokerá kolaġ, nakulla bon umullikan munni biruġ pirbuġgatoara.

¹¹ Ġatun yakita purreáġ ka yukita, uwa noa kokeroa, ġiakai yitirra Nain; ġatun kauwál uwa ġikoúmba wirrobullikan ġatun taraikan kúri ġikouġ katoa.

¹² Ġatun uwa noa ba papai pulogkulligél la kokerá kolaġ, ġa, tetti kulwon kurrilliela kúri warai kolaġ, wakál bo ta yinal tunkán koba bounnoun ba, ġatun mabogun bounnoa, ġatun kauwál-kauwál kúri kokerá biruġ uwa bounnoun katoa.

¹³ Ġatun nakulla bounnoun noa ba Piriwálla, ġurrirra bounnoun noa kakulla, ġatun wiya ġaiya noa bounnoun, Túġki yikora.

¹⁴ Ġatun uwa ġaiya noa, numa kurrilligél; ġatun bara kurriá bon ba ġakéa korun. Ġatun noa wiya, Wuġgurra, wiyan banuġ, Bouġkullia.

¹⁵ Ġatun niuwoa tetti kabiruġ yellawa, ġatun tanoa-kál-bo wiya. Ġatun willuġbo bon noa ġukulla bounnoun kin ġikoúmba ka tunkán ta.

¹⁶ Ġatun bara kakulla kinta yantin; ġatun bara bon pitálman Eloinuġ, wiyelliela, Kauwál propet ta paipéa ġearun kin, ġatun noa Eloito nakulla ġikoúmba kúri.

¹⁷ Ġatun unni totóg ġikoúmba kakulla yantin to Iudaia koa, ġatun yantin toa purrai kariġ koa.

¹⁸ Ġatun Ioanne-úmba-ko wirrobullikanto wiya bon unni tara.

¹⁹ Ġatun noa Ioanneto wiya bulun wirrobullikan ġikoúmba, yuka bulun Iéthu kinko, wiyelliko, ġintoa ta uwánún? ġa, na-téa kánún ġéen taraikan?

²⁰ Uwa bara ba kúri ġikouġ kinko wiya bara, Ioanneto korimullikanto ġearun yuká ġirouġ kinko, wiyelliko, ġintoa ta uwánún? ġa, na-téa kánún taraikan?

²¹ Ġatun tanoa-kál-bo hora ka pirbuġġa noa kauwál-kauwál munni-munni, ġatun marai yarakaikan; ġatun kauwál-kauwál munmin umá noa barun nakilliko.

²² Wiya ġaiya noa barun Iéthu, wiyelliela, Waita lag nura, ġatun wiyella bon Ioannenuġ unni tara nakulla nura ba ġatun ġurra; munmin-tabiruġ-ko natan, wiirwiir-biruġ-ko uwan, wamun-wamun-tabiruġ turon kakulla, woġkál-labiruġ ġurran, tetti-kabiruġ bouġkulléin, barun mirrál ko wiyan ta Euagelion.

²³ Ġatun pitál-umatoara yantinto niuwara korien kánún emmouġ kin.

²⁴ Ġatun waita ka ba bara ba puntimai Ioanne-úmba, wiya ġaiya noa barun kúri Ioannenuġ bon, Minariġ tin nura koruġ kolaġ nakilliko? koġka tolo man wibbi ko?

²⁵ Minariġ ko nura uwa koruġ kolaġ nakilliko? wakál upulléin kúri poitoġ korikin to? A! bara upulléin konéin to ġatun bara murráràġ kátan takilliko, yellawa bara piriwálgél la.

²⁶ Minariğ ko nura uwa koruğ kolağ nakilliko? wakál propet Kauwa, wiyan nurun bağ kauwállan noa ba propet kiloa.

²⁷ Ğali noa wiyatoara upa unni, A! yukan bağ puntimai emmoúmba ğirouğ kin mikan ta, umánun wal noa yapuğ ğirouğ.

²⁸ Kulla bağ wiyan nurun, Keawai propet kauwál kátan yanti Ioanne noa ba korimullikan porkullitoara nukuğ labiruğ: niuwoa waréa ta kátan piriwálğél la Eloï koba ka, kauwál noa kátan ninwoa kiloa.

²⁹ Ğatun yantinto kúriko ğurra bon, ğatun bara telónai, pitálma bon Eloï-nuğ, korimatoara kátan bara Ioanne kaibiruğ karimulli biruğ.

³⁰ Wonto ba bara Parithaioi ğatun bara nomikoi ğurramaiğa wiyellikanne Eloï koba barun kin, keawai korimatoara korien Ioanne kai.

³¹ Ğatun noa Piriwállo wiya, Yakoai kiloa bara kúri untikál willuğğél? ğatun minariğ kiloa bara?

³² Bara yanti wonnai kiloa yellawollin ğukilligél la, ğatun kaipullin taraikan, ğatun wiyellin, Tirkima ğéen nurun, ğatun keawai nura úntelli korien; minki ğéen kakulla nurun, ğatun keawai nura tuğkilli korien.

³³ Kulla noa Ioanne korimullikan uwa, keawai kunto ta pa, ğa wain keawai pitta pa; ğatun nura wiyan, diabol noa ğikouğ katoa ba.

³⁴ Yinal ta kúri koba uwa takilliko ğatun pittelliko, ğatun nura wiyan, A! mataye kúri unni, ğatun wain pittaye, kóti ta telónai koba ğatun yarakai willuğ koba!

³⁵ Wonto ba yautinto wonnaito ğuraki koba ko piralman bon ğuraki.

³⁶ Ğatun wakállo Parithaioi koba ko wiya bon ta-uwil koa noa ğikouğ katoa. Ğatun uwa noa kokerá Parithaio koba, ğatun yellawa noa barán takilliko.

³⁷ Ğatun, a! ğapal wakál yarakaikun bountoa ğurrá bountoa ba Téthunuğ bon yellawai takilli taba kokerá Parithaio koba ka, mankulla bountoa wúnkilligél alabathro putillikanne,

³⁸ Ğatun ğarokéa bountoa tinna ka bulka ka ğikoung kin, túğkillin, ğatun bountoa puntia bounnoun ka to ğurrun to tinna ğikouúmba, ğatun pirripa bounnoun ka to kittuğ ko wolluğ koba ko bounnoun ka to, ğatun búğbúğka bon tinna ğikoumba, ğatun putia bon putilligél lo.

³⁹ Yakita nakulla noa ba unni ğali Parithaio, wiya bon ba, wiyelléun ğaiya noa ninwoabo minki ka, wiyelliela, Unni kúri propet ba noa ğurra pa noa wonta-kan-to ka ğapallo numa bon; kulla bountoa yaraikan.

⁴⁰ Ğatun Iéthuko noa wiyayelléun, wiyelliela bon, Thimón, wiya-uwil koa banuğ. Ğatun noa wiya, Piriwál, wiyellia.

⁴¹ Tarai ta kakulla ğukillikan wakál buloara mumbitoara ğikouúmba; wakállo noa mumbilléun pentakothioi denari, ğatun tarai ta pentékonta mumbilléun.

⁴² Ğatun keawai bula ğupaiye pa ba yaruğ ka bon, wareká ğaiya noa bulun ba. Wonta kin bulun kinbiruğ pitálmanún kauwál bon!

⁴³ Thimónto noa wiya, wiyelliella, Mirka ğikouğ wareka noa ba kauwál. Ğatun noa wiya bon, Kota bi tuloa.

⁴⁴ Ğatun noa warrakulléun ğapal ko, ğatun wiya Thimónnuğ Natan bi unni ğapal? uwa bağ kokerá ko ğirouğ ka ta ko, keawai bi tia ğupa bato tinna ko; wonto bountoa ba puntia tia tinna bounnoun ka to ğurrun to, ğatun watia bounnoun ka to wolluğ kabiruğ ko kittuğ ko.

⁴⁵ Keawai bi tia búğbúğ ka pa: wonto ba unni ğapal, búğbúğ-kulliela tia tinna yakita biruğ uwa bağ ba.

⁴⁶ Keawai bi puti pa emmoúmba wolluğ kipai to, wonto ba unni ğapal putia emmoúmba tinna kipai to.

⁴⁷ Ğiakai tin banuğ wiyan, Yarakai umatoara bounnoun ba kauwál ta warekatoara bounnoun ba; kulla bounnoun pitál-ma kauwál: kulla barúnba warekatoara waréa, pitál-ma bara warea.

⁴⁸ Ġatun noa bounnoun wiya, Wareká umatoara ġiroúmba yarakai.

⁴⁹ Ġatun bara yellawan ġikouġ kinba takilli taba, bara bo wiyatan minki ka, ġan-ke unni warekan noa yarakai.

⁵⁰ Ġatun noa bounnoun wiya, ġurrulli ta biruġ ġiroúmba moron bi kátan; yuruġ bi pitál kakilliko.

8

¹ ĠATUN yakita yukita uwa noa yantin toa purrai toa kokerá, wiyelliela ġatun túġunbilliela totóġ pitálmullikanne bathileia koba Eloi koba: ġatun bara dodeka ta ġikouġ katoa ba.

² Ġatun bara nukuġ taraikan, turon umatoara marai yarakai tabiruġ ġatun munni kabiruġ, Mari yitirra ġiakai Magdalakálin, bounnoun kinbiruġ paipéa diabol hepta ta,

³ Ġatun Ioanna porikunbai Kutha-úmba, Herod-úmba umullikan, ġatun Thuhanna, ġatun taraikan kauwál, gala bara ġukulla bon untakál tullokan ba biruġ barun kai.

⁴ Ġatun uwittillin bara ba kúri kauwál-kauwál, ġatun uwa ġikouġ kinko, yantin tabiruġ kokerá biruġ, wiya noa unni parabol:

⁵ Upillikan noa uwa yeai ko upulliko ġikoúmba ko; ġatun upulliela noa ba, winta porkulléun kaiyinkon ta yapuġ ka; ġatun waita-wa barán, ġatun tibbinto takulla moroko tinto.

⁶ Ġatun winta porkulléun tunuġ ka; ġatun poaikulléun ba wokka lag tetti ġaiya kakulla, koito ba bato korien ta.

⁷ Ġatun winta porkulléun tulkirri-tulkirrá; ġatun poaikulléun tulkirri-tulkirri matti, ġatun murrúġkama.

⁸ Ġatun tarai ta pórkuulléun purrai murrárag purrai ta, ġatun poaikulléuun wokka lag, ġatun yeai kurria hekaton ta. Ġatun noa ba wiya unni tara, kaaipulléun ġaiya noa, Niuwoa ba ġurréuġ kan kátan ġurrulliko ġurrunbunbilla bon.

⁹ Ġatun wirrobulli-kan-to ġikoúmba ko wiya bon, wiyelliela, Minariġ ke unni parabol?

¹⁰ Ġatun noa wiya, ġatan ġurrulliko nurun pirriral bathileia koba Eloi-úmba; wonto barun tarai ta parabol la; natan bara keawai bara na pa, ġatun ġurran bara keawai bara ġimilli pa.

¹¹ Ġiakai ta unni parabol: Yeai ta wiyellikanne ta Eloi koba.

¹² Bara kaiyinkon taba yapuġ kaba ġurrullikan bara; uwa ġaiya noa diabol, ġatun mankulla wiyellikanne barun ba minki kabiruġ búlbúl labiruġ, ġurréa-kún koa bara ġatun moron koa bara katéa-kún.

¹³ Bara tunuġ kaba ġurra bara ba wiyellikanne pitálkan to; ġatun unni tara wirra korien kátan, kota bara waréa ba, ġatun yakita numullikanne ta waraka ġaiya bara.

¹⁴ Ġatun unnoa tara pórkuulléun tulkirri-tulkirrá, bara ba ġurra, waita uwa ġaiya, ġatun murrúġkanna umullikannéto ġatun porollo ġatun pirunto moron koba, ġatun yeai kurri korien murrárag kakilliko.

¹⁵ Wonto ba unnoa murrárag kaba purrai taba, bara ba ġurra wiyellikanne, tuloakan ġatun murráragkan búlbúľkan, tuman bara, ġatun yeai kurrin murroi to.

¹⁶ Keawai kúriko wirroġbanún kalbuġ, wutinún ġaiya tenti ko, ġa wutinún bara ka pinkilligélla; wonto ba wupinún kaibuġġél la, na-uwil koa bara uwollita ba ko kaibuġ.

¹⁷ Kulla yantin ta ġetti biruġ ġurranún wal kakilliko; ġatun yantin ta yuropatoara biruġ ġurranún wal kakilliko, ġatun paipinún wal.

¹⁸ Yakoai nura ġurrulla; kulla ġikouġ kinba ġunún wal ġikouġ kin; ġatun keawai noa ka korien, mantillinún wal bon ġikouġ kinbiruġ unnoa ta paipitoara ġikouġ kinba.

¹⁹ Ġatun tunkán ġikouġ kinko ġatun bara kóti ta ġikoúmba uwa, ġatun keawai bara wa pa ġikouġ kinko konarrin, kulla kauwál waitawollan.

²⁰ Wintako bon wiya ġiakai, Garokillin bara warrai taba ġikoúmba tunkán ġatun kóti ta, na-uwil koa bara ġirouġ.

²¹ Ġatun noa wiyayelléun barun, wiyelliela, Unni tara tia kátan emmoúmba tunkán ġatun kóti ta, ġurrullikan wiyellikanne Eloi koba ġatun umullikan.

²² Ġatun yakita tarai ta purreaġ ka, uwa noa murrinawwai ta ko ġikouġ katoa wirrobullikan toa ġikoúmba; ġatun noa barun wiya, Waita géen waíġa-uwil kaiyin kolaġ wara kolaġ. Ġatun bara tolka mureuġ kolaġ.

²³ Wonto ba bara uwolliela, pirrikéa noa kógóg; ġatun wibbi kauwál kakulla wara ka; ġatun bara warapál, ġatun kinta kakilliela.

²⁴ Ġatun bara uwa ġikouġ kin, bouġbuġġa ġaiya bon, wiyelliela, Piriwál, piriwál, tetti kolaġ géen! Bouġkulléun ġaiya noa, ġatun wiya noa wibbi, ġatun tulkun wombul koba; ġatun korun kakulla, ġatun yuraġ ġaiya kakulla.

²⁵ Ġatun noa wiya barun, Wonnug-ke nurun kotellita? Ġatun bara kinta kakulla, kotelliela, wiyalan taraikan-taraikan, Wontakan unni kúri! kulla noa wiyen wibbi ġatun bato, ġatun ġurra ġaiya bon.

²⁶ Ġatun bara uwa purrai tako Gadarén tako, kaiyin taba Galilaia kaba.

²⁷ Ġatun noa ba yankulléun purrai tako, nuġgurrawa bon wakállo kúriko kokerá biruġ ko, diabolkan noa katalla yuraki, ġatun keawai noa upillipa kirrikin to, keawai noa kátan kokerá, nikki ka noa kakulla.

²⁸ Nakulla noa ba Iéthunuġ, kaaibulléun ġaiya noa, ġatun puntimulléun ġikouġ kin mikan ta, ġatun wokka wiyelléun wiyelliela, Minnuġ banún ke bi tia, Iéthu, Yinal ta Eloi koba wokka kaba koba? Yanoa bi tia piralmai yikora.

²⁹ (Kulla noa wiya marai yarakaikan paikulliko kúri kabiruġ. Kulla bon mankulla murrin-murrin; ġatun wirria bon tibon ko; ġatun noa tiirbuġġa tibon, ġatun yuaipéa bon diabollo koruġ kolaġ).

³⁰ Ġatun Iéthuko noa wiya bon, wiyelliela, Wonnén bi yitirra? Ġatun noa wiya, Léjun baġ; kulla kauwál-kauwál diabol uwa murrariġ ġikouġ kinko minki kako.

³¹ Ġatun bara bon wiya, Yanoa, wiya yikora ġearun bi pirriko kolaġ kakilliko.

³² Ġatun kakulla untakál wirrul takilliela bulkára ba ko; ġatun bara wiya bon pulóġkulliko barun minki kako porák kako. Ġatun noa wamunbéa barun.

³³ Uwa ġaiya bara waita diabol minki tabiruġ kúri kabiruġ, ġatun pulóġkulléun porák ka koiro ka; ġatun wirrul murra barán karakai pirriko koba wara kako, kurrin to ġaiya bara.

³⁴ Nakulla bara ba tamunbéa unnoa tara umatoara, murra ġaiya bara, ġatun waita uwa kokerá kolaġ, ġatun ġoruġ kolaġ; wiya ġaiya ġaloa.

³⁵ Uwa ġaiya bara nakilliko umatoara ko; ġatun uwa Iéthu kin, ġatun nakulla bara bon unnoa kúri, paipitoara biruġ bara waita uwa, yellawolliela Iéthu ka ta tinna ka, kirrikinkan ġatun tuloa ġurrullikan; ġatun kinta bara kakulla.

³⁶ Yantinto nakulla unnoa wiya barun, yanti bon ba turon uma diabolkan kauwálkan.

³⁷ Ġatun yantinto konaró purrai tako Gadarén tako wiya ġaiya bon waita uwolliko barun kinbiruġ; kulla bara kintakan kauwál kakulla. Ġatun noa uwa murrinawwai tako, ġatun wulluġbo kakulla.

³⁸ Ġatun unnoa kúri kabiruġ diabol bara waita uwa, wiya bon ka-uwil koa noa ġikouġ katoa: wonto noa Iéthuko yuka bon waita, wiyelliela,

³⁹ Willuġbo bi wolla ġirouġ ka tako kokerá ko, ġatun gurraunbilliko unnoa tara uma noa ba Eloito ġirouġ. Ġatun noa waita uwa, ġatun wiya yantin toa kokeroa, yanti Iéthuko noa uma bon.

⁴⁰ Ġatun yakita kakulla, willuġbo noa ba Iéthu kakulla, pitál tara kakilliela kúri, kulla bara bon mittilliela yantinto.

⁴¹ Ġatun yakita uwa wakál kúri tanan, ġiakai yitirra Yaeiro, wiyellikan noa thunagóg kako; ġatun noa puntimulléun Iéthu kin tinna ka, ġatun wiya uwolliko ġikouġ kinko kokerá ko;

⁴² Kulla bon wakál yinalkun kakulla, dodeka wunál ta bounnoun ba, ġatun bounnoa pirrikilliela tetti kakilliela. Ġatun uwa ġaiya noa, kúriko bon murrugkama.

⁴³ Ġatun wakál nukug, kumarakan dodeka wunal ta bounnoun ba, ġukilléun bountoa kirun tullokan bounnouba karákál ko, keawai bara bounnoun turon uma pa,

⁴⁴ Uwa bountoa bulka kako, ġatun numa pita ġikoúmba kirrikin: ġatun tanoa-kál-bo kumara ġaiya kakulla korun.

⁴⁵ Ġatun noa léthuko wiya ġaiya, Ġanto tia numa? Yantinto wiya keawai, wiya ġaiya noa Peterko ġatun bara ġikoug katoa, Piriwál, konaro bin murrugkama ġatun waita wa, ġatun bi wiyán, Ġanto tia numa?

⁴⁶ Ġatun noa léthuko wiya, Wakállo ta tia numa: kulla baġ ġurran waita ka ba kaiyu emmoug kinbirug.

⁴⁷ Ġatun bountoa ba nukugko nakulla yuropa korien bountoa, uwa bountoa pulul-pulul, ġatun puntimulléun ġikoug kin mikan ta, wiya bon bountoa mikan ta yantin ta kúri ka, minariġ tin bountoa numa bon, ġatun tanoa-kál-bo bountoa kakulla turon.

⁴⁸ Ġatun noa bounnoun wiya, Yinálkun, kauwa bi pitál; ġurrullito ġiroúmba-ko turon bin uma; yuriġ waita pitál kakilliko.

⁴⁹ Ġatun wiyelliela noa ba, tanan uwa wakállo wiyellikan ta birug kokerá birug, wiyelliela bon, Ġiroúmba yinálkun tetti kakulla; yanoa, Piriwál pirriralmai yikora bon.

⁵⁰ Wonto noa ba léthuko ġurra, wiyayelléun noa bon wiyelliela, Kinta kora bi; ġurrulla wal bi, ġatun turon ġaiya wal bountoa kánun.

⁵¹ Ġatun noa ba uwa kokerá ko ba murrirag, keawai noa tarai kan wommumbi pa ġikoug kin, wonto ba Peternug ġatun Jakobonug, ġatun Ioannenuġ, ġatun biyugbai ġatun tunkán murrakin koba.

⁵² Ġatun yantin tuġkilléun ġatun minki kakulla bounnoun kai: wonto noa ba wiya, Tuġki yikora; keawaran bountoa tetti korien, wonto ba ġarabo kakillin.

⁵³ Ġatun bara bon béelma, nakilliela tetti bountoa kakulla.

⁵⁴ Ġatun noa kirun barun yipa warai tako, ġatun noa mankulla bounnoun muttárrin, ġatun wiya, Murrakin, bouġkullia.

⁵⁵ Ġatun bounnoun ba marai katéakan, ġatun bountoa bouġkulléun tanoa-kál-bo: ġatun noa wiya bounnoun takilliko.

⁵⁶ Ġatun kintakan biyugbai ġatun tunkán bounnoun ba: wonto noa ba wiya barun, yanoa wiya yikora taraikan kúri unni umatoara.

9

¹ WIYA ġaiya noa barun dodeka ta ġikoúmba kaumulliko, ġatun ġukulla barun kaiyu kakilliko ġatun wiyellikan kakilliko yantin ko diabol ko, ġatun turon umulliko yantin munnikan ko.

² Ġatun noa barun yuka wiyelliko bathileia Eloi koba, ġatun turon umulliko munnika ko.

³ Ġatun noa wiya barun, Manki yikora waita kolaġ, keawai tupa-tupa mánun, keawai yinuġ, keawai kunto, keawai money, keawai buloara mánun kirrikin taraiko-taraiko.

⁴ Ġatun uwánun nura ba tarai ta kokerá, tanoa kauwa, ġatun waita uwolla untoa birug.

⁵ Ġatun bara keawai nurun wommunbi korien, waita nura ba uwánun untoa birug kokerá birug, tirri-tirrillia yullo kabirug moriġ tinna kabirug nurun kinbirug, túġa kakilliko barun kinko.

⁶ Ġatun waita bara uwa, ġatun uwa kokeroa Willi koa, wiyelliela Euagelion, ġatun turon umulliela yantin ta purrai ta.

⁷ Ġatun noa Herodto tetrákkko ġurra unni tara umá noa ba; ġatun koteiliela niuwoa bo, kulla wiyatoara tarai-kan-to Ioanne noa bouġkulléa tetti kabirug;

⁸ Ġatun winta ka, paipéa noa Elia; ġatun tarai-kan-to, wakál ġaġka-kál propet tabirug bouġkalléun.

⁹ Ġatun noa Herod wiya, Kolbúntia baġ bon Iaonnenuġ wollug; ġan-ke unni ġurran baġ unni tara? ġatun noa na-uwil koa bon.

¹⁰ Ġatun bara apothollo willuġbo bara ba kakulla, wiya ġaiya bon yantin unni tara uwa bara ba. Ġatun noa barun yutéa, ġatun kara uwa mirrulla ko, kokerá ko yitirra Betáthaida kako.

¹¹ Ġatun bara kùri ġurra bara ba, wirropa bara bon; ġarokéa noa wiyelliko barun bathileia Eloi koba, ġatun umá barun turon kakilliko munnikan.

¹² Ġatun purreáġ kakilliela yaréakál, uwa ġaiya bara dodeka ta, ġatun wiya bon, Yukulla barun konara waita laġ, uwa-uwil koa bara yantin toa purrai kariġ koa, yellawolliko, ġatun takilliko; kulla ġéen kátan unti mirrul la.

¹³ Wonto noa ba barun wiya, Ġuwa barun ġaloe ko takilliko. Ġatun bara wiya, Keawai ġearúnba kulla unni pente kunto ġatun buloara makoro; wiya ġéen wirrilla barun ġali ko takilliko yantin ko kùri ko.

¹⁴ Kulla wal kùri kauwál pentakikilioi ta. Ġatun noa wiya barun wirrobullikan, Yellawabunbilla barun konara kakilliko pentékonta tarai taba kakilliko.

¹⁵ Ġatun uma ġaiya bara yanti, ġatun yellawabunbéa barun yantin barán.

¹⁶ Mankulla ġaiya noa unnoa tara kunto pente ġatun makoro buloara; ġatun nakilliela wokka laġ moroko koba, murroi wiyelliela unni tara, ġatun yirbuġġa, ġatun ġukulla barun wirrobullikan ko wunkilliko barun kin mikan ta konara.

¹⁷ Ġatun takulla bara, ġatun warakan ġaiya bara kuttawan yantin; ġatun mankulla bara wan dodeka ka wimbi ka wuntawai biruġ barun kai.

¹⁸ Ġatun yakita wiyelliela noa ba niuwoa-bo púnbai, ġikoúmba wirrobullikan ġikouġ katoa; ġatun noa wiya barun, wiyelliela, Ġannuġ wiyen kùri ko ġan baġ ba.

¹⁹ Wiyayelléun bara; wiyelliela, Ioanne ta bi korimullikan wonto ba taraito wiyen Elia ta ba; ġatun taraito wiyen wakál ġaġka-kál propet koba, bouġkulliakan katéa-kán.

²⁰ Wiya noa barun, ġanto tia nura wiyen ġan baġ ba? Peterko noa wiyayelléun, wiyelliela, Kritht ta bi Eloi-úmba.

²¹ Ġatun noa barun piralma, wiyéa-kán koa bara unnoa tara tarai ko kùri ko;

²² Wiyelliela, Yinal ta kùri koba yarakai kauwál wal bon umánun, ġatun warekánun wal bon bara ġaġkakal ġatun bara hiereukan piriwál, ġatun bara ġárammateukan, ġatun búnnun wal tetti, ġatun bouġġánun ġaiya bon tarai ta purreáġ ġoro ka.

²³ Ġatun wiya noa barun yantin, Wanún tia ba taraikan kùri uwánun, ġurrullia noa niuwoa-bo, ġatun mara-uwil koa noa taligkabillikanne ġikoúmba yantin ta purreáġ ka, ġatun wirbullia tia.

²⁴ Ġanto ba mirománun moron ġikoúmba, warekánun wal noa? kulla noa warekánun moron ġikoúmba emmouġ kin, ġaloe noa moron umánun.

²⁵ Wonnuġ-ke murrárag kùri ko, mankilliko purrai kariġ ko, ġatun noa tetti wal ġaiya kánun niuwoa-bo, ġa warekánun wal?

²⁶ Ġan tia ba koyun kánun emmouġ kai, ġatun wiyellikanne emmoúmba, Yinal kùri koba koyun ġikouġ kai, uwánun noa ba killibinbinkan kóti ġikouġ kinba, ġatun Biyuġbai koba, ġatun aġelo yirri-yirri-kan koba barúnba.

²⁷ Kulla baġ wiyen nurun tuloe, unni winta ġarokéun ba, keawai bara tetti kánun, kabo na-uwil koa bara bathileia-nuġ Eloi koba.

²⁸ Ġatun yakita kakulla purreáġ ka ét ta yurika-ta unni tara wiyellikanne, yutéa noa barun Peternuġ, ġatun Ioannenuġ, ġatun Jakobonuġ, ġatun uwa wokka laġ bulkára kolaġ wiyelliko.

²⁹ Ġatun noa ba wiyelliela, takin bon tarai warrakulléun, ġatun ġikoúmba kirrikin purrul kakulla, ġatun killibinbin kakulla.

³⁰ Ġatun wiyelliela bon kùriko Mothéko ġatun Eliako:

³¹ Paipéa bula killibinbin, ġatun wiya bula ġikoúmba (tetti?) tin ka-uwil koa Hierothalem ko.

³² Wonto ba Peter noa ġatun bara ġikouġ katoa porrólkan bara birikéa kóġoġ; ġatun bara kakulla tiraġ, nakulla bara ġikoúmba killibinbin, ġatun buloara bula kùri ġarokéa ġikouġ katoa.

³³ Ġatun kakulla yakita bula ba waita uwolliela ġikouġ kinbiruġ, Peterko noa wiya bon Iéthunuġ, A! Piriwál, murraràġ ġearun unti ko kakilliko; ġatun umabunbilla ġoro kokerá; wakál bin, ġatun wakál Mothénuġ, ġatun wakál Elianuġ, ġurra korien minariġ noa wiya.

³⁴ Wiyelliela noa ba, yareil kakulla, ġatun wutéa barun; ġatun bara kinta kakulla, waita bara ba wolliela murrariġ yareil la.

³⁵ Ġatun pulli kakulla yareil labiruġ, wiyelliela, Unni ta emmoúmba kóti yinal pitálmullikan; ġurrulla bon.

³⁶ Ġatun pulli ba kakulla korun, Iéthu noa kakilliela púnbai. Keawai bara unni tara wiya pa untatoara, natoara purreáġ ka taraikan ta.

³⁷ Ġatun yakita kakulla purreáġ ka tarai ta unta, uwa bara ba barán bulkára biruġ, kauwállo kúriko nuġgurra wa bon.

³⁸ A! ġatun wakál kúri konara koba kaaibulléun, wiyelliela, Piriwál, kai bi, na-uwillia yinal emmoúmba; kulla noa emmoúmba wakál wonnai.

³⁹ A! ġatun maraito bon mankulla, ġatun ġaiya noa kaaibulléun wokka; ġatun yiirbuġġa bon, ġatun kurraġtoanbuġġa; ġatun búntoara noa, waita ġaiya ġikouġ kinbiruġ uwa.

⁴⁰ Ġatun baġ wiya barun wirrobullikan ġiroúmba warekulliko bon; keawai bara kaiyu korien.

⁴¹ Ġatun noa Iéthuko wiya, wiyelliela, A! ġurra korien ġatun pirriral unni willuġ-ġél! Yakounta-laġ baġ kánun nurun kin, ġatun wal baġ kámunbinún nurun? Mara bon tanan ġiroúmba yinal unti ko.

⁴² Ġatun uwolliela noa ba tanan diabollo bon puntima barán ġatun yiiryiir uma. Ġatun noa Iéthuko koakulla bon marai yarakai ka, ġatun bon wonnai turon uma, ġatun ġutéakan ġaiya bon biyuġbai ta ġikoúmba tin.

⁴³ Ġatun yantin bara kinta kakulla kaiyu tin kauwál lin Eloi koba tin; ġatun kotelliela bara ba yantin unni tara Iéthuko noa ba uma, wiya ġaiya noa barun wirrobullikan ġikoúmba,

⁴⁴ Kámúnbilla unni tara wiyellikanne murrirag ġurréuġ kako nurun kin; kulla noa Yinal kúri koba wupinún wal bon mattára kúri ka.

⁴⁵ Keawai bara ġurra pa unni wiyellikanne, ġatun yuropa ġali barun kinbiruġ, keawai bara ġimilli korien; ġatun bara kinta kakulla wiyelliko bon ġali tin wiyellikanne tin.

⁴⁶ Yakita ġaiya bara wiyellan barabo-barabo, ġan-ke kánun kauwál piriwál barun kinbiruġ.

⁴⁷ Ġatun Iéthuko noa ġimilléun kotatoara búlbúl labiruġ barun kinbiruġ mankulla noa wonnai, ġatun yellawabunbéa bon ġikouġ kin taruġ ka,

⁴⁸ Ġatun noa barun wiya, Ġanto ba unni wonnai pitáلمانún kinba, pitáلمانún ġaiya tia; ġatun ġanto ba tia pitáلمانún, pitáلمانún bon ġala yuka tia ba; ġatun niuwoa kátan waréa nurun kinba yantin taba, yantibo ta wal noa kauwál kánun.

⁴⁹ Ġatun noa Ioanneto wiya, wiyelliela, Piriwál, nakulla géen wakállo paibuġġullia barun diabol ġirouġ katoa biruġ yitirra biruġ; wiya géen bon yanoa, koito ba keawai noa wa pa ġearun katoa.

⁵⁰ Ġatun noa Iéthuko bon wiya, Wiwi yikora; koito noa ba keawai bukka korien ġearun, niuwoa ġearun katoa ba.

⁵¹ Ġatun yakita kakulla purreáġ mánun bon ba wokka kolaġ, pirral noa kakilliela waita Hierothalem kolaġ,

⁵² Ġatun noa yuka barun puntimai ġikoúmba ġanka; ġatun bara uwa kokerá kolaġ Thamaria kako, umulliko ġikouġ.

⁵³ Ġatun bara bon keawai pitálma pa, kulla noa pirral kakulla wa pa Hierothalem kolaġ.

⁵⁴ Ġatun bula wirrobullikan ġikoúmba, Yakobo ġatun Ioanne, nakulla bula unni, wiya bula, Piriwál, wiya bi, wiya-uwil koa géen koiyuġ koa kauwál barán moroko kabiruġ winawwil koa barun, yanti Elia noa ba unnoa?

⁵⁵ Wonto noa ba wakulléün, koakulla gaiya barun noa, gátun wiya, Keawaran nura gimilli korien nurúnba kóti búlbúl.

⁵⁶ Koito ba noa yinal kúri koba keawaran noa tanan wa pa, búnkilliko kúri ko barun, wonto ba murrin umulliko. Gátun bara uwa tarai tako kokerá ko.

⁵⁷ Gátun yakita kakulla, uwolliela bara ba yuriğ yapuğ koa, taraito bon wiya, Piriwál, wirrobuğbinün banuğ, wontariğ bi ba uwállün,

⁵⁸ Gátun noa Iéthuko bon wiya, Murroğ-kai-ko kumiri barúnba, gátun tibbin moroko ka koba kunta barúnba, wonto ba yinal kúri koba keawaran bon gikoúmba birrikilli-ğél walluğ ko gikoúmba ko.

⁵⁹ Gátun noa tarai wiya, Wirrobulla tia. Wonta noa ba wiya, Piriwál, wamunbilla tia ganka bapa-uwil koa bağ emmoúmba biyuğbai.

⁶⁰ Wiya bon noa Iéthuko, Bapabunbilla barun tetti-tetti barúnba; gintoa yuriğ bi wolla wiyelliko piriwál koba Eloi koba.

⁶¹ Gátun taraito wiya, Piriwál, wirrobanún banuğ; wamunbilla tia ganka wiyellikoa barun bağ unni emmouğ kinba kokerá ba.

⁶² Gátun noa Iéthuko bon wiya, Keawai tarai-kan-to upillinün máttara purrai-ğél lo, gátun willuğ-wuminün, keawaran noa murraräg korien kakilliko piriwál ko Eloi koba ko.

10

¹ YAKITA gaiya kakulla unni tara, Piriwállo noa gearimulléün thebenty taraikan ta, gátun yuka barun buloara-buloara gikouğ kin mikan ta, yantin tako kokerá ko uwánun noa ba niuwoa-bo.

² Gátun noa barun wiya, Kauwál-lan unni nulai kátan, keawai bo katillikan kúri kauwálkál; gali tin wiyella nura bon, Piriwál nulai-ğél koba yuka-uwil koa noa barun katillikan nulai ko katilliko gikouğ kaiko.

³ Waita nura yuriğ wolla: A! yukan nurun bağ waita kolağ yanti kiloa waréa ta éipu barun kin murroğ ka ta.

⁴ Kurri yikora yanoa munnigél, gátun yinuğ, keawai tuğganuğ; gátun yanoa wiya yikora yapuğ koa taraikan kúri.

⁵ Gátun uwánun nura ba kokerá ko taraikan tako, wiyella, kurri giakai, Pitál kauwa unni kokerá ba.

⁶ Gátun ba yinal koba pitál koba kánun unta, nurúnba pitál kánun gaiya unta; keawai ba nurun kin katéa kánun willuğbo.

⁷ Gátun yellawánun nura unta kokerá, takilliko gátun pittelliko,gunün bara ba nurun; kulla noa umulli-kan-to man ba gutoara gikoúmba. Uwai yikora kokerá kolağ kokerá kolağ.

⁸ Gátun uwánun nura ba yantin ta kokeroa, gátun bara nurun pitálmanün, ta-uwa untoa tara wunün ba mikan ta nurun kin.

⁹ Gátun turon barun umulla unta tara; gátun wiyella barun, Piriwál koba Eloi koba papai uwa nurun kinba.

¹⁰ Uwánun nura ba tarai ta kokeroa, gátun bara keawai pitálma korien nurun, uwéa ka nura warai tako yapuğ kako, gátun wiyella,

¹¹ Umulléün géen punul untikál gearun kinba nurun kin; A! kotellia nura unni ta uwan ta papai kátan nurun kin piriwál koba Eloi koba.

¹² Wiyan nurun bağ, murraräg kánun unta ta tarai ta purreäg, ka Thodom kako, keawaran gala ko kokerá ko.

¹³ Yapallun bi Koradhin! yapallun bi Betáthaida! kulla umatoara ba kauwál-kauwál kaiyu biruğ ka pa Turo ka gátun Thidoni ka uma girouğ kin, minki bara ka pa yuraki, yellawa pa bara pirral la kirrikin ta gátun bonoğ ka.

¹⁴ Murraräg buloara kánun Turo gátun Thidoni unta purreäg wiyellaikanne ta keawaran bi.

¹⁵ Gátun gintoa, Kapernaum, wunkulla wokka lağ moroko ka, yuaipinün wal barán pirri kako.

¹⁶ Niuwoa ġurran nurun ba, ġurran ta noa tia; ġatun niuwoa waitiman nurun ba, waitiman noa tia; ġatun niuwoa tia waitiman, waitiman noa bon yuka noa tia ba.

¹⁷ Ġatun bara thebenty ta willuġbo kakulla pitálkan, wiyelliela, A Piriwál! ġurrullikan bara diabollo ġearun ġirouġ katoa yitirra.

¹⁸ Ġatun noa barun wiya, Nakulla bon baġ Thatannuġ puntimulléun barán moroko tin yanti málma kiloa.

¹⁹ A! ġutan baġ nurun kaiyu waitawolliko maiya ko ġatun wuarai ko, ġatun yantin ko kaiyu bukkakan ko; ġatun keawai wal nurun yarakai umulliko.

²⁰ Pitál-mai yikora nura-nura, ġali tin ġurullikan tin bara marai nurun ba; unti biruġ pitálma nura, kulla yitirra nurúnba upatoara moroko ka ba.

²¹ Yakita ta noa pitál-lan kakulla marai ta, ġatun wiyelliela, Kauwa tia yanti, Biyuġ, Piriwál ta moroko koba ġatun purrai koba, kulla bi ba unnoa tara yuropa ġali unti biruġ ġuraki ta biruġ, ġatun bi túġkaiya unnoa tara barun boboġ ko; kauwa yanti, Biyuġ, koito ba murraràġ ta ġirouġ kin kátan mikan ta.

²² Yantin ta tia wupéa emmouġ kinko Biyuġbaito; ġatun keawai kùriko bon yinal ġimilli pa, wonto ba Biyuġbaito; ġatun Biyuġbai yinallo ġimilléun, ġatun niuwoa yinallo túġunbinùn bon Biyuġbai.

²³ Ġatun noa willariġ kakulla ġikouġ kai koba wirrobullikan, koba, ġatun wiyelliela kara, Kauwa yanti murraràġ ta natan ġaikouġ ko unni tara natan nura ba:

²⁴ Kulla baġ nurun wiyan, kauwállo propetto ġatun piriwállo na pa unni tara natan nura ba, ġatun bara keawai na korien; ġatun ġurra pa unni tara ġurran nura ba, ġatun keawai ġurra korien.

²⁵ A! tarai wakál nomiko ġarokéa wokka laġ, ġatun wiya bon, wiyelliela, Piriwál, minnuġ banùn baġ moron kakilliko yantikatai?

²⁶ Wiya bon noa, Minariġ upa wiyellikanne? yakoai bi wiyan?

²⁷ Ġatun noa wiyayelléun, wiyelliela, Pitál kakilliko bi Piriwál ko Eloi ko ġiroúmba ko yantin to búlbuúl lo ġiroúmba ko, ġatun yantin to marai to ġiroúmba ko, ġatun yantin to kaiyu ko ġiroúmba ko, ġatun yantin to kotellitó ġiroúmba ko; ġatun kóti ta ġiroúmba yanti ġintoa bo ba.

²⁸ Ġatun noa wiya bon, ġintoa wiyayelléun tuloa; unni ta umulla ġatun moron koa bi kauwál

²⁹ Wonto noa ba kotelliela tuloa ko ninwoa bo, wiya bon noa Iéthunuġ, Ġan-ke tia kóti ta emmoúmba?

³⁰ Ġatun noa Iéthuko wiya, Taraikan waita uwa barán Hierothalem kabiruġ Jeriko kako, ġatun nuġġurrawa mankiye, mantilléun bon kirrikin, ġatun búnkulla, ġatun bara waita uwa wareka ġaiya bon búntoara.

³¹ Yakita ġati uwa wakál hiereu barán yapuġ koa; ġatun nakulla bon noa ba, uwa noa taruġ koa kaiyin ta koa.

³² Ġanti yanti kiloa wakál Lebikan kakulla noa ba unta, uwa nakulla ġaiya bon, ġatun noa uwa taruġ koa kaiyin ta koa.

³³ Wonto ba wakál kùri Thamariakál uwolliela ba, uwa yapariġ kakilliela noa ba; ġatun nakulla bon noa ba, minki bon noa kakulla ġikouġ kai,

³⁴ Ġatun uwa ġikouġ kai koba, ġatun ġira bon búntoara ġikoúmba, kiroabullliela kipai ġatun wain, ġatun yellawabunbéa bon ġikouġ ka ta kóti ka buttikaġ, ġatun yutéa bon takilligél lako, ġatun miroma bon.

³⁵ Ġatun tarai ta purreàġ ka wakál la waita noa ba uwa, mankulla ġaiya noa buloara denari, ġatun ġukulla kokeratin ko, ġatun bon wiya, Golomulla bon; kirun bi ba upinún, uwéa kánùn baġ ba willuġbo, ġutéa kánùn ġaiya banuġ.

³⁶ Wonnuġ-ke kóti ta ġikoúmba nuġġurrawa mankiye unti biruġ ġoro kabiruġ kùri kabiruġ, kotella bi?

³⁷ Ġatun noa wiya, Niuwoa ġoloma bon. Wiya noa bon Iéthu ko, Yuriġ, yanti kiloa umulla bi.

³⁸ Ġatun yakita kakulla, uwa bara ba, uwa noa murrug koa kokeroa; ġatun taraito nukugko, Maráthako yitirra, wamunbéa bon bounnoun kin kokerá.

³⁹ Wúggunbai bounnoun ba ġaiya kai, yitirra Mari, yellawa bountoa Iéthu kin yallo ka, ġatun ġurra bon wiyellita

⁴⁰ Wonto ba Marátha kámullan buntoa marai-marai umullita, ġatun uwa bountoa ġikoug kin, ġatun wiya, Piriwál, kora bi natan tia wareka tia wúggunbai emmoúmba umulliko wakálo? wiyella bounnoun umulli koa bountoa tia.

⁴¹ Ġatun noa Iéthako wiyelléun, ġatun wiya bounnoun, Ela! Marátha, Marátha, ġintoa kámullan marai-marai minnambo-minnambo ka;

⁴² Wonto ba wakál murrarág kátan: ġatun Mariko bountoa ġeremulléun unnoa murrarágbo, keawai wal mantillinún bounnoun kinbirug.

11

¹ ĠATUN yakita kakulla, wiyelliela noa ba tarai ta purrai ta, kaiulléun noa ba wiyelli ta, wakálo bon wiya ġikoug-ka-to wirrobullikanto, Piriwál, wiyella gearun bi wiyelliko, yanti kiloa Ioanneto noa wiya barun ġikoúmba wirrobullikan.

² Ġatun noa wiya barun, wiyánún nura ba, ġiakai nura wiyánún nura, Biyugbai gearúmba wokka ka ba moroko ka ba kátan, Kámunbilla yitirra ġiroúmba yirri-yirri kakilliko. Paipibunbilla Piriwál koba ġiroúmba. Ġurrabunbilla wiyellikanne ġiroúmba, yanti moroko ka ba, yanti ta purrai ta ba.

³ Ġuwoa gearun purreág ka takilliko.

⁴ Ġatun warekilla gearúnba yarakai umatoara, kulla géen yanti ta wareka yanti ta wiyapaiyéun gearúnba. Ġatun yuti yikora gearun yarakai umullikan kolaġ; miromulla gearun yarakai tabirug.

⁵ Ġatun noa barun wiya, Ġan nurun kinbirug kóti ġikoúmba, ġatun uwánún ġikoug kin tokoi ta, ġatun bon wiyánún, Ela! kóti, mumbilla tia wokkai to ġoro ko;

⁶ Kulla noa emmoúmba kóti uwa kalog tin emmoug kinko, ġatun keawai baġ wún korien ġikoug kin mikan ta takilliko?

⁷ Niuwoa murrug ka ba ko wiyánún, Wai tia wiyellan; kulla unni kurraka wirriġbakulla, kulla wonnai tara emmoúmba emmoug katoa ba birrikilligél laba; keawaran baġ bouġkulli korien ġukilliko ġiroug.

⁸ Wiyánún nurun baġ, Keawai noa bouġkulli korien ġulliko bon, kulla noa ba ġikoúmba kóti; kulla wal noa bon pirriral-mulli tin bouġkullinún ġaiya noa ġulliko bon wiyellinún noa ba.

⁹ Ġatun nurun baġ wiyánún, Wiyella, ġatun ġunún ġaiya nurun; ġatun tiwolla, ġatun karawollinún ġaiya nura; wirrillia, ġatun umánún ġaiya nurun.

¹⁰ Yantin ba wiyellinún, manún wal; ġatun noa tiwollinún, karawollinún ġaiya noa; ġatun ġikoug wirrillinún noa ba, umánún ġaiya wal.

¹¹ Yinallo ba wiyánún nulai yantin ta nurun kin, biyugbai ta ba, wiya, noa ġunún tunug? ġa makoro, wiya, noa maiya ġunún makoró?

¹² Ga ba wiyellan noa ba yarro, wiya, noa bon ġupaiyinún wuarai?

¹³ Nura ba yarakaikan kátan, ġukilliko ġutoara murrarág wonnai ko nurúnba ko; kauwa yanti ġunún noa Biyugbaito moroko ka ba ko Marai murrarág barun wiya bon ba?

¹⁴ Ġatun noa ba paibuġgulliela wakál diabol, ġatun noa ġogo. Ġatun yakita ġaiya kakulla, waita ba uwa diabol, wiya ġaiya noa ġogo kabirug ko; ġatun bara kúri kotelliela.

¹⁵ Wonto ba tarai-kan-to wiya, Paibuġġa noa barun diabol Béeldhebul kátan birug, piriwálloa birug diabol koba ko.

¹⁶ Ġatun tarai-kan-to wiyelliela, wiya bon túġa moroko tin.

¹⁷ Wonto noa ba ġimilléun barúnba kotellikanne, wiya barun, Yantin piriwál koba ġaruġgara umulla barabo tetti bara kánún; ġatun kokerá koba barabo warakullia bara.

¹⁸ Thatan noa ba ġaruġgara kánún niuwoa-bo, yakoai ġikoúmba piriwál koba kánún? kulla nura wiyánún paibuġġa baġ ba barun diabol Béeldhebul katoa birug.

¹⁹ Ġatun ġatoa ba paibuġġaanun barun diabol Béeldhebul biruġ, ġan katoa biruġ nurúnba-ko yinal-lo paibuġġa?

²⁰ Gatoa paibuġġanun máttarroa biruġ Eloi koba ko barun diabol, kauwa tuloa uwa ġaiya piriwál koba Eloi koba nurun kin ba.

²¹ Ġolománun noa ba tarai kúri mokál porrol ġikouġ kin kokerá, ġikoúmba tullokkan murroi kátan.

²² Wonto ba tanan uwánun tarai mokál porrolkan kauwál kan ġikouġ kin, ġatun kéakéa-ma noa bon, mantillinun ġaiya wal bon kirun mokál ġikoúmba pirral-matoara; ġatun ġutillinun noa mokál ġikoúmba.

²³ Niuwoa keawai emmouġ katoa, niuwoa kátan kóti korien; ġatun noa keawai boa-ma korien emmouġ katoa, ware-ware-kan.

²⁴ Paikullinun ba marai yarakai kúri kabiruġ, uwan noa yuriġ purroi toa tarawaroa, nakilliko korilliko; ġatun noa keawai na korien, wiyan noa, Willuġbanun wal baġ willuġbo kokerá ko emmouġ ka ta ko, unta biruġ uwa baġ ba.

²⁵ Ġatun uwánun noa ba, nakulla ġaiya noa ba wiréa kiriiri ġatun konéin.

²⁶ Uwan ġaiya noa ġatun yutéa taraikan theben ta marai yarakai kauwál yanti niuwoa ba; ġatun bara uwa murrariġ ġatun kakulla ġaiya bara unta; ġatun yarakai kauwál noa unnoa kátan yakita, kakulla noa ba kurri-kurri.

²⁷ Ġatun yakita kakulla, wiyelliela noa ba, kaaibulléun tarai nukuġ ġali koba konara koba, ġatun wiya bon bountoa, Murrárág kauwa yanti pika kurréa bon ba, ġatun paiyil pitta bi ba.

²⁸ Wonto noa bo wiya, Kauwa yanti, murrárág kauwál kátan bara ġurrullikan wiyellikanne Eloi koba, ġatun mirromulli-ko.

²⁹ Ġatun yakita kakulla, wittillan bara ba kúri, wiya noa kurri-kurri, Unni ta yarakai kátan willuġġél; nakillin bara túġa; keawai wal barun ġunún, unni bo ta wal tuúġa Iona-úmba propet koba.

³⁰ Yanti kiloa Iona túġa kakulla noa barun kúri Ninebi ka, yanti bo ta wal kánun noa yinal kúri koba barun ġali ko willuġġél ko.

³¹ Bouġkullinun wal piriwál kirin pakai biruġ purreáġ ka wiyelligél la kúri koa untikál loa willuġġél loa, ġatun pirralmanun barun; kulla bountoa uwa kaloġ kabiruġ purrai tabiruġ wirán tabiruġ ġurrulli bon ġuraki ko Tholomón ko; A! kauwál kátan Tholomón kiloa unnibo.

³² Bouġkullinun wal bara kúri Ninebikál purreáġ ka wiyelligél la kúri koa untikál loa willuġġél loa, ġatun pirral-manun barun; kulla bara minki kakulla wiyelli ta Iona-úmba ka; A! kauwál kátan Iona kiloa unnibo.

³³ Keawai kúriko tarai-kan-to wirrouġ buġġanun kaibuġ wunún ġaiya ġati ta, keawai baria ka wimbi ka, wonto ba kaibuġġél la, bara ba uwánun na-uwil koa bara kaibuġ.

³⁴ Kaibuġ ta murrin koba ġaikuġ; wonto ba ġiroúmba ġaikuġ tuloa kátan, yantin bin kátan murrin kaibuġkan; wonto bin ba ġaikuġ yarakai, kánun murrin bin warapa tokoi to.

³⁵ Yakoai bi, mirka unnoanuġ kaibuġ ġirouġ kinba tokoi ta ba kátan.

³⁶ Kulla ba yantin ta ġiroúmba murrin ta ba warapan kaibuġ ko, keawai taraikan tokoi, kánun yantinbo ta wal warapan kaibuġ ko, yanti kaibuġ koba wupin ġatun binkirréun.

³⁷ Ġatun wiyelliela noa ba, taraito Parithaioko wiya bon tauwil koa noa ġikouġ katoa; ġatun noa uwa murrariġ ġatun yellawa takilliko.

³⁸ Ġatun noa ba Parithaioko nakulla, umulli korien noa bato ka kurri-kurri takilli kolaġ, kotelliela noa.

³⁹ Ġatun bon noa Piriwállo wiya, Yakita nura Parithaioiko umullia mirkun karai-ġon tunti ġatun pikirri; wonto ba nurúnba murrin warapan williró ġatun yarakai to.

⁴⁰ Woġkál nura! yan ta noa uma unnoa yanti unnoa ba warrai ta ba, yantibo uma noa murrug ka ba?

⁴¹ Guwa nura untoakál nurun kinbiruġ, ġatun yantin nurun ba tuloa ka kátan.

⁴² Yapal nura Parithaioi! kulla nura ġukillan wintakál mentha tabiruġ, ġatun ruta tabiruġ, ġatun yaki tara, ġatun ġurramaġan tuloa ġatun pitálumullikanne Eloi koba: unni tara nura uma pa, ġatun keawai taraikan wareka pa uma korien.

⁴³ Yapal nura Parithaioi! kulla nura pitálman yellawollikanne wokka kaba thunaġóg kaba, ġatun umullikanne ġukilligél lako.

⁴⁴ Yapal nura ġarammateu ġatun Parithaioi, ġakoiyaye! kulla nura yanti tulmun kiloa paipi korien, ġatun bara kúri uwan wokka laġ tulmun toa, keawaran bara na korien.

⁴⁵ Wiyayelléun ġaiya wakállo nomiko-ko wiyelliela bon, Piriwál, ġiakai bi wiyán, pirralman bi gearun.

⁴⁶ Ġatun noa wiya, Yapal nura nomikoi yantinbo! kulla nura wuntan kúri ka porrol ta lo kauwál porrol kurrilliko, ġatun keawai nura unnoa porrol numa korien nurun ka to máttárró.

⁴⁷ Yapal nura! kulla nura ba wittiman tulmun barúnba propet koba, ġatun biyugbaito nurúnba-ko bunkulla barun tetti kulwon.

⁴⁸ Kauwa tuloa ta pirralman nura umatoara biyugbai koba nurúnba; kulla bara yuna bo ta barun búnkulla tetti, ġatun nura wittillin tulmun barúnba.

⁴⁹ Yaki tin wiya ġurakita Eloi koba ko, Yukánún wal baġ barun propet ġatun apothol barun kin, ġatun winta barun kinbiruġ búnún wal bara ġatun yarakai umánún;

⁵⁰ Wiya-uwil koa ġoroġ yantin koba propet koba kiroabatoara yaki tabiruġ kurri-kurri tabiruġ purrai tabiruġ, unni barun willuġgél;

⁵¹ Ġoroġ kabiruġ Abelúmba kabiruġ, ġoroġ kako Dhakariaúmba kako búntoara Willi ka bómo ta ġatun hieron; kauwa tuloa to wiyán nurun baġ, wiya-uwil koa unni barun willuġgél.

⁵² Yapal nura nomikoi! kulla nura mankulla wirriġbakilligél ġurakita koba; keawai nura wa pa, ġatun nura miya barun uwa bara ba.

⁵³ Ġatun wiya noa ba unni tara barun, pirralma bon bara ġarammateuto ġatun Parithaioiko, wiya-uwil koa noa minnambo wiyelliko;

⁵⁴ Mittillin bara bon, ġatun nakillin ġurrulliko ġikouġ kin ba ko kurraka ba ko, wiyayéun koa bara bon.

12

¹ YAKITA kakulla, wittillan bara ba yantibo konara kúri, wata-watawollan barabo, wiya noa kurri-kurri barun wirrobullikan ġikoúmba, Yakoai nura lebben barúnba Parithaioi koba, ġakoiyaye ta unnoa.

² Yantin ba wutéa ta túġunbinún ġaiya wal; ġatun yantin yuropa ta namunbinún ġaiya wal.

³ Yaki tin, wiyellan nura tokoi ta ġurrabunbinún wal kaibuġ ka; ġatun unni ta wiya nura ba ġurréuġ ka waiyakan ta, wiyellinún wal wokka ka kokera.

⁴ Ġatun baġ nurun wiyán kóti ta emmoúmba, Kinta kora nura barun kin búnkillikan tin murrin tin, ġatun yukita tantoa bo ta wal bara kaiyukanto banún.

⁵ Túġunbinún wal baġ nurun ġan-kai nura kinta wal kánún: Kinta bon kauwa ġikouġ kai, yukita noa ba búnkulla kaiyukan noa warekulliko koiyuġ kako pirriko kako; kauwa wiyán baġ nurun, Kinta bon kauwa ġikouġ kai.

⁶ Wiya, pente tibbin waréa ta ġupaiye ko buloara assari, ġatun keawai wakál unti biruġ woġgunti korien ġikouġ kin Eloi kin?

⁷ Kulla yantin wolluġ kaba kittuġ murrapatoara kátan. Kinta kora nura ġali tin; kulla nura murrárag kauwálkan kátan, keawaran ġali tarako tibbinko waréa-ta-ko kauwál-kauwál-ko.

⁸ Unni ta nurun baġ wiyán, Yantinto emmouġ wiyánún mikan ta kúri ka, ġikouġ wiyánún noa Yinal kúri koba mikan ta aġelo ka Eloi koba ko.

⁹ Wonto ba niuwoa ġanbullinún tia emmouġ mikan ta kúri ka, ġanbullinún wal bon mikan ta aġelo ka Eloi koba ka.

¹⁰ Ġatun ġanto ba yarakai wiyánùn ġikouġ Yinal kùri koba, kámunbinùn wal bon; wonto bon ba yarakai wiyellikan Maraikan yirri-yirri-kan, keawai bon kámunbinùn.

¹¹ Ġatun manùn nurun bara thunagóg kako ġatun wiyellikan tako, ġatun kaiyukan tako, kota yikora nura wonnuġ nura ba wiyayellinùn, ġa minnuġ nura wiyánùn.

¹² Kulla nurun Marai-kan-to yirri-yirri-kan-to wiyánùn wal yakita bo ġaiya minnuġ wal nura wiyánùn.

¹³ Ġatun wiya bon wakállo konara biruġ ko, Piriwál, wiyella emmoúmba biġ-gainuġ, ġukulli koa noa purrai emmouġ kai.

¹⁴ Ġatun noa bon wiya, Kùri, ġanto tia uma wiyellikan, ġa ġukillikan ġirouġ kin?

¹⁵ Ġatun noa barun wiya, Yakoai ġatun murroi kauwa williri koba; kulla moron kùri koba ka korien ta kauwál-kauwál la tul lokan ka ġikouġ ka ta.

¹⁶ Ġatun noa wiya barun unni parabol, wiyelliela, Purrai ta porrólkan koba poaikulléún kauwál:

¹⁷ Ġatun noa kotelléún niuwoabo, wiyelliela, Minnuġ banùn baġ, kulla wal unni tuntan uwa, wiya wal baġ wonta wura-uwil unni tara emmoúmba?

¹⁸ Ġatun noa wiya, Unni baġ umánùn; umánùn wal baġ barán wunkilligél emmoúmba, ġatun wittia kánùn kauwál; ġatun unta baġ wunùn yantin emmoúmba nulai ġatun tullokan.

¹⁹ Ġatun baġ wiyánùn emmoúmba marai, A marai! Kauwál tullokan ġiroúmba wúnkulla kauwál lako wunál lako; yellowolla murroi bi, tauwa, pittella, ġatun pitál kauwa.

²⁰ Wonto ba Eloito bon wiya, Woġkál-lan bi! unti tokoi ta ġiroúmba marai mantillinùn wal ġirouġ, kinbiruġ; ġanto ġaiya unnoa tara tullokan manùn tuiġko bi ba uma?

²¹ Yanti niuwoa ba wupéakan tullokan ġikoúmba ko, ġatun keawai porrol korien Eloi kai koba.

²² Ġatun noa wiya barun wirrobullikan, Yaki tin wiyánùn baġ nurun, Yanoa, kota yikora nurúnba moron takilliko; ġa keawai murrin ko wupulliko.

²³ Moron ta kauwál kátan murrárág takillikanne keawaran, ġatun murrin ta kauwál kátan murrárág kirrikin keawaran.

²⁴ Kotella wákun barun; koito bara ba keawai wupa korien, ġatun keawai kol bunti korien; keawai barúnba tuiġko wupilligál, keawai barúnba kokera; ġatun noa Eloito ġiratiman barun; kauwál-kauwál nura kátan murrárág tibbin bara keawaran.

²⁵ Ġatun ġan nurun kinbiruġ kotellita kánùn, uméa kánùn moron ġikoúmba waréa ka kakilliko kubit kako?

²⁶ Wiya nura ba kaiyu korien to umulliko unni waréa, minariġ tin nura kotellin unnoa tara?

²⁷ Kotella nura kenukùn turukin bara ba; keawai bara uma korien wupi korien bara; ġatun baġ wiyánùn nurun, Tholomón noa ba, konéinkan keawai bon wupa korien yanti kiloa wakál unti tara biruġ.

²⁸ Upánùn noa ba Eloito woiyo yanti, yakita purreáġ ka unta ba purrai ta kátan, ġatun kumba warekakin murrug ka wollo ka; wiya, nurun noa upánùn, A! nura ġurrullikan waréakan?

²⁹ Ġatun na-ki yikora nura minariġ nurúnba takilliko ġatun pittelliko, ġa kota yikora nura minki ko.

³⁰ Koito ba bara yantinto purrai ta ba ko natan yantin unni tara; ġatun nurúnba-to-Biyuġbai-to ġurran unni tara ġukillikanne nurun ba murrárág kakilliko.

³¹ Wonto ba nura nauwa piriwál koba Eloi koba, ġatun yantin unni rara ġunun nurun kin.

³² Kinta kora, wirrul waréa; kulla pitálman bon Biyuġbai nurúnba ġukilliko piriwál-ġél ta nurun kin.

³³ Ġukilléa nurúnba, ġatun ġuwa ġukillikanne: umulla nura yinuġ nurúnba, keawai koa korokál katéa-kún, porrólkan ta moroko ka ba kakilliko ka korien kakilliko, keawai ba unta ko uwa korien mankiye, ġatun keawai ba yarakai puntaye.

³⁴ Wonnun ta nurúnba tullokan, untabo kánún nurúnba búlbúl yantibo.

³⁵ Ğirullia nura winnal nurúnba, ğatun nurúnba kaibuğ winabunbilla;

³⁶ Ğatun nurabo yanti kiloa kúri ba mittillin barúnba ko Piriwál ko willuğ-banún noa ba mankilligél labiruğ; uwánún noa ba ba tanan ğatun wirrillinún, umánún ğaiya bon tanoa-kal-bo.

³⁷ Pitálmatoara kánún bara unnoa tara mankillikan, yakita Piriwál noa ba uwánún, noa ba barun kin nanún noa ba barun nakilli ta; wiyan bag tuloa nurun, ğirullinún noa kótibo, ğatun yellawabumbéa barun takilli kolağ, ğatun uwánún noa ğukilliko barun.

³⁸ Ğatun tanan uwánún noa ba, yakita buloara nakillikan ta, yakita ğoro ka nakillikan ta, ğatun nanún barun yantibo nakilli ta, pitálmatoara bara unnoa tara mankillikan.

³⁹ Ğatun ğurrulla unni, wiya noa ba kokera-tin-to ğurra pa, yakounta ba uwa pa mankiye na pa noa, keawai ğaiya kokera ğikoúmba potobunti pa.

⁴⁰ Yanti tin kauwa nura nakilliko; kulla noa Yinal kúri koba uwánún yakita kota korien nura ba.

⁴¹ Wiya ğaiya noa bon Peterko, Piriwál, wiyan bi unni parabol ğearunbo, ğa ğearun yantin?

⁴² Ğatun noa Piriwálla wiya, Gan-ke noa mankillikan murrárág ğatun ğuraki, piriwálla noa umánún bon wiyellikan kakilliko kokera ko ğikoug ka ta ko, ğu-uwil koa noa takilliko yakita ğukilligél la?

⁴³ Pitálmatoara kátan unnoa mankillikan, umánún noa ba ğikoúmba piriwál nanún ğaiya noa bon umulli ta yanti.

⁴⁴ Wiyan bag tuloa, umánún bon noa wiyellikan kakilliko yantin tako.

⁴⁵ Wonto noa ba wiyánún gala mankilli-kan-to, búlbúl la, Emmoúmba piriwál minkin uwa korien; ğatun ğaiya noa búnkilli kolağ barun kúri mankillikan ğatun ğapal, ğatun takilli kolağ, ğatun pittelli kolağ, ğatun kuttawai kolağ;

⁴⁶ Piriwál gala koba mankillikan koba uwánún wal noa purreág ka na korien ta, ğatun yakita ğaiya kota korien ta bon, ğatun búnnún bon buloarakan, ğatun ğunún bon winta ğikoug kai barun kin ğurra korien ta.

⁴⁷ Ğatun unnoa mankillikan ğurran noa kotelli ta piriwál koba ğikoúmba, ğatun keawai uma korien, keawai noa uma pa yanti kotelli ta ğikoúmba, búnnún wal ğaiya bon kauwál-kauwál.

⁴⁸ Wonto noa ba niuwoa ğurra korien, ğatun yarakai umatoara yaki tin bún ba bon, búnnún wal waréa. Kulla bon ğupa kauwál, wiyapaiyanún wal kauwál ğikoug kinbiruğ; ğatun kúriko ğukulla kauwál, wiyellia kánún bara ğaiya kauwál-kauwál ğikoug kinbiruğ.

⁴⁹ Uwan ta bag unni yukulliko koiyuğ ko purrai ta ko; minnuğ-bullinún bag kauwa ba tanoa-kal-bo wirroğ-kulléa?

⁵⁰ Kulla tia korimullikanne emmouğ kinba korimulliko; ğatun yakoai bag kátan ğoloin koa ka-uwil kakilliko!

⁵¹ Kotan nura, uwa bag ba pitál ğukilliko purrai ta ko? wiyan bag ba, keawai; wonto ba ğurruğgurra kakilliko;

⁵² Kulla wal unti biruğ kánún kakilliko pente kokerá wakál la, ğurruğgurra biruğ, ğoro bulun kinbiruğ, ğatun buloara ğoro kabiruğ.

⁵³ Biyuğbai ğurruğgurra kánún yinal labiruğ, ğatun yinal biyuğbai tabiruğ; ğatun tunkan yinálkun tabiruğ, ğatun yinálkun tunkán tabiruğ, túngaikun bounnoun ba kurrinanbai tabiruğ, ğatun kurrinanbai bounnoun ba túngaikun tabiruğ.

⁵⁴ Ğatun noa barun kúri wiya, Nanún nura ba yareil wokka lağ punnál ba pulóğkulligél lin, wiyánún ğaiya nura koiwon tanan ba; ğatun kauwa yanti.

⁵⁵ Ğatun kareawuğ ba kánún, wiyellinún ğaiya nura, karol kánún; ğatun yanti ğaiya kánún.

⁵⁶ A nura nakoiyaye! natan nura tarkin moroko koba ğatun purrai koba; minariğ tin koa nura na korien unti yakita?

⁵⁷ Kauwa, kora koa nura kota ba nurun kinbiruğ tuloa?

⁵⁸ Uwánún bi ba ñikouğ katoa bukkakan toa ñikouğ kinko wiyellikan tako, yapuğ koa nuiyellia bi bon, wamunbi-uwil koa biloa murroi kakilliko ñikouğ kinbiruğ; yutéa-kún koa biloa wiyellikan kauwál lako, ñatun wiyellikanto kauwálo wamunbinún biloa yarakan tako, ñatun yarakanto wupinún biloa jail kako.

⁵⁹ Wiyan banuğ, keawai bi waita uwa korien unta biruğ, ñukillinun bi ba lepton ta kirun waréa ta.

13

¹ KAKULLA bara unta yakita taraikan, wiya bon barun Galilaiakál, ñoroğ barúnba taroğkama Pilato-to thuhia barun barúnba.

² Ğatun noa Iéthuko wiyayelléún, wiyelliela noa barun, Wiya, nura kotellin unnoa tara Galilaiakál yarakai bara kakulla kauwál barun kinbiruğ Galilaiakál labiruğ, kulla barun ba mankulla unnoa tara?

³ Wiyan nurun bağ, Keawai; kulla nura keawai minki kátan, yantin ñaiya nura tetti tetti kánún.

⁴ Ga barun etin ta wunkulléún kokera barán, ñatun tetti-tetti barun wirria, wiya, nura kotellin barun yarakai bara ba kakulla kauwál barun kúri kabiruğ kakillin Hierothalem ka?

⁵ Wiyan nurun bağ, Keawai; kulla nura keawai minki kátan, yantin ñaiya nura tetti-tetti kánún.

⁶ Wiya noa unni yanti parabol: Taraikan ta kúriko wupéa yirriwilbin purrai ta ñikouğ ka ta; ñatun noa uwa yeai ko nakilliko, ñatun noa keawai ñaiya na pa.

⁷ Wiya ñaiya noa bon upullikan, Ela! ñoro ka wunál la unti, uwa bağ nakilliko yeai ko unti biruğ ko yirriwiltabin tako, ñatun keawai ñaiya bağ na pa; kólbúntilla unnoa barán; minariğ, tin unnoa kátan purrai ta?

⁸ Ğatun noa wiyayeléún, wiyelliela bon, Piriwál, kámunbilla unnoa unti wunál la, pinni-uwil koa bağ untoakál ko, ñatun konuğ koa bağ wupi-uwil;

⁹ Ğatun yeai ba kánún, murraráğ ñaiya kánún; ñatun ka korien ba, ñatun yukita ñaiya kólbúntinún; wal bi unni barán.

¹⁰ Ğatun noa wiyelliela wakál la thunagóg ka purreáğ ka thabbat ka.

¹¹ Ğatun, a! kakulla unta wakál nukuğ munni-lan bountoa ba kauwál-kauwál wunál étin ta, ñatun woinu bountoa, ñatun keawai bountoa kaiyu korien wokka-lan kakilliko.

¹² Ğatun nakulla noa ba Iéthuko bounnoun, kaaipa bounnoun noa, ñatun wiyelliela bounnoun, Nukuğ, ñintoa buruğ-kulléún woinu kabiruğ ñirouğ kinbiruğ.

¹³ Ğatun noa upilléún mátara bounnoun kin; ñatun tanoakal-bo bounnoun tuloa uma, ñatun bountoa pitálma bon Eloinuğ.

¹⁴ Ga-tun piriwálo thunagóg kako, wiyayelléún bukka-kan-to, kulla noa Iéthuko turon uma purreáğ ka thabbat ka, ñatun wiya barun kúri, Hek ta purreáğ ka umilliko kúri ko; unti tara purreáğ ka tanan uwolla turon umullilo, ñatun keawai thabbat ta purreáğ ka.

¹⁵ Piriwálo noa bon wiyayelléán ñatun wiyelliela, Ğintoa ñakoiyaye! wiya, yantinto nura buruğbuğgan ñikoúmba boo ñatun athino, purreáğ ka thabbat ka, unta biruğ kokerá biruğ, yemmama-uwil koa kokoin kolağ pittelliko?

¹⁶ Ğatun keawai wal unni ñapal, yinálkun ta Abúramúmba, ñiratoara bounnoun Thatánto noa unni tara étin ta wunál la, buruğbuğgulliko yanti biruğ, unti thabbat ta purreáğ ka?

¹⁷ Ğatun wiya noa ba unni tara, koiyun bara ñaiya kátan yantin bukkamaiye ñikouğ kai; ñatun yantin kúri pitál kakulla yantin tin umatoarrin kauwál lin ñikouğ, biruğ.

¹⁸ Wiya ñaiya noa, Minariğ kiloa Piriwál koba Eloi koba? Ğatun yakoai kiloa pağgunbinún?

¹⁹ Yanti kiloa ta yeai ba mutard koba, mankulla kúriko, ñatun meapa purrai ta ñikouğ, kai ta; ñatun boaikulléún wokka lağ, ñatun kakulla kauwál kúlai; ñatun tibbin moroko tin yellawa wiran ta.

²⁰ Ğatun noa wiyéa-kún, Yakoai kiloa bağ túgunbinún piriwál koba Eloi koba?

²¹ Yanti lebben kiloa, mankulla ġapallo ġatun yuropa ġoro ka ġukilligél la nulai ta, kakulla wal yantibo lebben kiloa.

²² Ġatun noa uwa kokeroa ġatun kauwál loa kokeroa, wiyatin, ġatun uwollin Hierothalem kolaġ.

²³ Wiya ġaiya bon wakálo, Piriwál, wiya, warai moron kakilliko? Ġatun noa wiya barun,

²⁴ Nuwolla pulóġkulli kolaġ tuloa tin yapuġ tin: kulla baġ nurun wiyan, kauwál-kauwálo nuwanún murráraġ pulóġkulli kolaġ ġatun keawai wal kaiyu korien.

²⁵ Bouġkullinún noa ba kokeratin wokka laġ, ġatun wirriġbakulla pulóġkulligél, ġatun nura ġarokéa warrai ta, ġatun wirrilléun toto pulóġkulligél, wiyellin, Piriwál, Piriwál, umulla ġearun; ġatun noa wiyayellinún ġatun wiyánún, Keawaran baġ nurun ġimilli korien wonta biruġ wal nura:

²⁶ Wiyánún ġaiya wal nura, Takéun géen ġatun pittakéun ġirouġ kin mikan ta, ġatun ġintoa wiyakéun ġearun kin yapuġ ka.

²⁷ Wonto wal noa ba wiyánún, Wiyan baġ nurun, keawaran baġ nurun ġimilli korien, wonta biruġ wal nura; yuriġ tia uwolla emmouġ kinbiruġ, yantin nura yarakai umullikan.

²⁸ Unta ta wal tuġkillinún ġatun tirra-ġatpuntullinún, nanún ġaiya nura ba barun, Abáramnuġ, ġatun Itháknug, ġatun Yacóbnug, ġatun yantin propetnuġ, kakillin bara ba piriwál koba ka Eloi koba, ġatun nurunbo yuaipéa warrai tako.

²⁹ Ġatun bara uwánún muriuġ tin, ġatun krai tin, ġatun kummari tin, ġatun pakai tin, ġatun yellawánún wal piriwál koba ka Eloi koba ka.

³⁰ Ġatun, a! bara willuġ kátan, kabo wal bara ġanka kánún ġatun bara ġanka kátan, kabo wal bara willuġ kánún.

³¹ Unta purreáġ ka winta uwa Parithaioi kabiruġ wiyellin bon, Yuriġ ba waita wolla unta biruġ, kulla noa Herodto biloa buúnnún tetti.

³² Ġatun noa barun wiyá, Yuriġ nura wolla, wiya-uwil koa bon unnoa alópék, A! paibuġġan baġ barun diabol, ġatun turon baġ uman buġġai ġatun kúmba, ġatun kúmba-ken-ta wal ġoloin tia kánún.

³³ Yantin tin uwánún wal baġ buġġai ġatun kúmba, ġatun kúmba-ken-ta; kulla wal keawaran wal wakál propet ka korien tetti Hierothalem kabiruġ.

³⁴ Yapallun Hierothalem, Hierothalem! búнкиye tetti wirriye barun propet, ġatun pintia barun tunuġ ko yupitoara ġirouġ kinko; murrin-murrin baġ kauma pa baġ barun wonnai tara ġiroúmba, yanti kiloa tibbinto ba kauma-uwil yirriġ ka bara ka bounnoun ba waréa tara, ġatun keawaran nura kauma korien.

³⁵ A! nurúnba kokera kakillin mirrál kakilliko: ġatun baġ wiyan tuloa nurun, Keawai nura tia nanún, yakita ko kánún ba wiyánún wal nura ba, Pitálkámunbilla bon uwan noa ba yitirroa Piriwál koba koa.

14

¹ ĠATUN yakita kakulla, uwa noa ba murrariġ kokerá piriwál koba ka Parithaioi koba takilliko nulai ko purreáġ ka thabbat ka, tumiméa ġaiya bon bara.

² Ġatun, a! ġaroka ba kakulla wakál kúri kokoin-kan warakaġ.

³ Ġatun Iéthuko noa wiyayelléun wiya barun nomikoinuġ ġatun Parithaioinuġ, wiyelliela, Wiya, murráraġ turon umulliko purreáġ ka thabbat ka?

⁴ Ġatun bara tullama pulli. Ġatun noa bon turon uma, ġatun wamunbéa bon;

⁵ Ġatun wiyayelléun noa barun, wiyelliela, Ġanto nurun kinbiruġ-ko puntimanún buttikaġ ba athino ba ġa boo ba nurúnba kirai ta, ġatun keawai ġaiya bon manún wokka laġ purreáġ ka thabbat ka?

⁶ Ġatun keawai bara bon wiyayelli pa unni tara.

⁷ Ġatun noa wiya wakál parabol barun ġala ko wiyatora ko, nakulla noa ba ġiriméa bara murráraġ waiyakan; wiyelliela barun,

⁸ Wiyánùn bin ba taraito kùriko uwa-uwil koa bi mankilli kolağ nukuğ kolağ, yellawa yikora wokka waiyakanto, mirka ta tarai kùri piriwál wlyatoara ta;

⁹ Ğatun noa ninwoa wiya biloa ğatun ğikouğ tanan uwolliko ğatun wiyelliko bin, Ğuwa bon ğali ko; ğatun ğintoa koiyun bi ba kánùn waita uwánùn waiyakan kolağ bará ka bo.

¹⁰ Wonto ba bin wiyánùn ba, yuriğ bi yellawolli ta ka bará kako waiyakan kako; ğatun uwánùn noa ba wiya biloa ba wiyánùn biloa, Kóti, yuriğ wokka lağ uwolla: yakita ğaiya pitálmánùn bin mikan ta barun kin tanún ba kunto ğirouğ katoa.

¹¹ Ğan umullinùn ninwoa bo wokka kako, umánùn wal bon bará kako; ğatun ninwoa umullinùn niuwoa ba bará kako, umullinùn wal wokka kako.

¹² Wiya ğaiya noa ğala wiya bon noa ba, Ğunún bi ba takilliko búlwára ka ğa yaréa ka, wiya yikora bi ğiroumba kóti, ğa kótita, ğa porrólkan; wiyéa kánùn bin ba bara, ğatun ğupaiyéa kánùn bin yaruğ ka.

¹³ Wonto bi ba umánùn takilliko, wiyella barun mirrál-mirrálkan, ğatun munni-munni-kan, ğatun wiir-wiirkan, ğatun munminkan:

¹⁴ Ğatun bin pitálmánùn; kulla bara keawai ğupaiye korien yaruğ ka; kulla bin ğupaiyéa kánùn yaruğ ka, yakita ba moron kánùn murráràğ-tai tetti-tetti kabiruğ.

¹⁵ Ğatun wakál barun kinbiruğ yellawa ğikouğ kin takilliela, ğurra noa ba unni tara, wiya bon noa, Pitálmatoara noa tanún wal kunto piriwál lako Eloï koba ka.

¹⁶ Wiya ğaiya noa bon, Taraito kùriko wupéa kauwál takilliko yaréa ka, ğatun wiya barun kauwál-kauwál kuri:

¹⁷ Ğatun yarea ka yuka noa bon ğikoúmba mankillikan, wiyelliko barun wiyatoara ko, Tanan; kulla yantin unnuğ tara wupea yakita.

¹⁸ Ğatun bara yantin wiyellan wakál-wakál ğakoiyellan. Kurri-kurrito wakállo wiya ğikouğ, Ğukilléún bağ winta purrai, ğatun waita wal bağ uwánùn nakilliko ğala ko; wiyan biloa wamunbilliko tia.

¹⁹ Ğatun taraito wiyá, Ğukilléún bağ pente tumba boo buttikağ, ğatun bağ waita uwan numulliko barun; wiyan biloa wamunbilliko tia.

²⁰ Ğatun taraito wiyá, Mankulla bağ nukuğ emmoúmba, yaki tin keawai bağ uwa korien.

²¹ Uwa ğaiya noa unni mankillikan, ğatun wiya bon piriwál ğikoúmba unni tara. Wiya bon ğaiya noa kokeratinto bukka-kanto ğikoúmba mankillikan, Yuriğ wolla kurrakai yapuğ koa kokeroa, ğatun yutilla barun tanan untiko mirrál-mirrál-kai, ğatun munni-munni-kai, ğatun wiir-wiir-kai, ğatun munmin-kai.

²² Ğatun noa mankillikanto wiyá, Piriwál, upatoara ta yanti bi ba wiya, ğatun kauwál-kauwál lako ka untiko.

²³ Ğatun noa bon piriwállo wiya mankillikan, Yuriğ, uwolla yapuğ koa ğatun koruğ koa, ğatun pirrirmulla barun tanan uwolliko, emmoúmba koa kokera warapa-uwil.

²⁴ Kulla bağ wiyan nurun, Keawai wal bara untoakállo wiyatoara nutunún emmoúmba kunto.

²⁵ Ğatun kùri kauwál-kauwál uwa ğikouğ katoa: ğatun noa willariğ, warkulléún, ğatun wiya ğaiya barun,

²⁶ Uwánún tia ba taraikan kùri emmoùğ kin, ğatun wareka korien ğikoúmba biyuğbai ğatun tunkan, ğatun nukuğ, ğatun wonnai tara, ğatun kóti tara, ğatun wuğgunbai, kauwa, ğikoúmba kata moron, keawai noa kánùn emmoúmba wirrobullikan.

²⁷ Ğanto-bo ba kurri korien ğikoúmba talig-kabillikanne, ğatun uwolla emmoùğ katoa, keawai noa kánùn emmoúmba wirrobullikan.

²⁸ Ğanto nurun kinbiruğ-ko, kotellin wittimulliko kokera, wiya, noa yellawánùn kurri-kurri, ğatun tuigko umulliko, mirka keawai ğoloin witti korien?

²⁹ Mirroma, yukita wupéa noa ba tuğga, ğatun keawai noa kaiyu korien ğoloin wittilliko, yantinto ba nanún béelmánùn ğaiya bon,

³⁰ Wiyellinún, Ğali kùriko nutéa wittimulliko, ğatun kaiyu korien noa ğoloin wittimulliko.

³¹ Ġa, ġan piriwál uwánún noa ba wuruwai kolaġ, tarai ko piriwál ko, yellawa noa kurri-kurri, ġatun kotelliela, wiya, noa ba kaiyukan uwa-uwil koa dekem-millia to nuġgurrawa-uwil koa bon taimin to ke bith-dekem-millia to?

³² Ġa ba, kaloġ ka ba noa piriwál taraito, yuka noa wakál puntima wiyelliko pitál koa kakillai.

³³ Yanti kiloa, yantinto nurun kinbiruġ-ko wareka korien noa yantin ġikoúmba, keawai noa kánún emmoúmba wirrobullikan.

³⁴ Pulli ta unni murráràġ; wonto ba pulli ka korien, yakoai kánún upilliko!

³⁵ Keawai murráràġ, korien ta purrai ko, ġa ba konuġġél ko; wareka ġaiya kùriko. Niuwoabo ġurréuġkan ġurrulliko, ġurrabilla bon.

15

¹ PAPAĠ ġaiya bara uwa ġikouġ kin yantin telónai ġatun yarakaiwilluġ, ġurrulliko bon.

² Ġatun koiya bara Parithaioiko ġatun ġarammateuko, wiyelliela, Unni kùri murráràġ korien, noa uman barun yarakai-willuġ ġatun tatan noa barun katoa.

³ Ġatun noa wiya barun unni parabol, wiyelliela,

⁴ Ġan kùri nurun kinbiruġ, hekaton ta cípu ġikoúmba, wákál noa ba yuréa umámún barun kinbiruġ, wiya, noa wunún barun nainty-nain ta koruġ ka, ġatun waita noa uwánún na-uwil koa noa yuréa-matoara, kara-uwilli koa noa?

⁵ Ġatun karawolléún noa ba, wúnkilléún ġaiya noa bamirruġ ka ġikouġ kin, pitállo ba.

⁶ Ġatun uwa noa ba ġura kako, wiya noa barun kótita ġatun taraikan wiyellin barun, Pitállia kanwa emmouġ katoa; kulla baġ karawolléún cípu ta emmoúmba unni, yuréa ba kakulla.

⁷ Wiyan baġ nurun, yanti kiloa pitál kánán kauwállan moroko ka ba minki noa ba wakál yarakai, keawai barun kai murráràġ-tai tin nainty-nain ta tin, minki korien.

⁸ Ġa wonnuġ-ke nukuġ púndol arguro ten ta bounnoun kinba, yuréa bountoa ba umánún wakál púndol, wiya, bountoa wirroġ-banún kaipuġ ġatun wirrillinún wirril-likanneto kirra-kirra-uwilli koa bountoa?

⁹ Ġatun karawolléún bountoa ba, wiya ġaiya bountoa ba kóti-ta ġatun taraikan tuiġko, wiyellin, Pitállia kauwa emmouġ katoa; kulla baġ karawolléún yuréa baġ ba umá.

¹⁰ Yanti kiloa, wiyan baġ, nurun, unnuġ, ta pitál kátan mikan ta aġelo ka Eloi koba wakál lin ba yarakai-willuġ minki kánún.

¹¹ Ġatun noa wiya, Taraito kùriko yinal bula-buloara ġikoúmba:

¹² Ġatan mittiko bulun kinbiruġ-ko wiya bon biyuġbai ġikoúmba, Biyuġ, ġuwa tia winta tullokan ka-uwil koa emmoúmba. Ġatun túnbilliela noa bulun tullokan.

¹³ Ġatun keawai kauwál-kauwál, korien ta purreàġ ka yukita, kauma noa mittiko yinallo, ġatun waita noa uwa kaloġ koba, ġatun unta noa wari-wareka tullokan ġikoúmba pittelligél la.

¹⁴ Ġatun wari-wareka noa ba kirun, kauwál kakulla unta kunto korien; ġatun tanoa-kál-bo kakulla ġaiya noa kapirrikan.

¹⁵ Ġatun uwa ġaiya noa umulliko kùri kako unta ko purrai ta ko; ġatun noa bon yuka ġikouġ, ka tako purrai tako ġiratimulliko buttikaġ, ko poràk ko.

¹⁶ Pitál ġaiya noa kakulla takilliko, ta-uwil ba buttikaġko: ġatun keawai kùriko bon ġupa.

¹⁷ Ġatun noa kakilliela ba niuwoabo, wiyelliela ġaiya noa, Kauwál-kauwála umullikan biyuġbai koba emmoúmba koba kunto kauwál barúnba takilliko ġatun ġukilliko, ġatun ġatoa kapirró wirribanbillin!

¹⁸ Bouġkullinún wal baġ, waita biyuġbai tako, ġatun wiyánún wal bon, Biyuġ, yarakai baġ umá mikan ta moroko ka, ġatun ġirouġ kin,

¹⁹ Ġatun keawai baġ murráràġ korien wiya-uwil koa tia ġiroúmba yinal yitirra: umulla tia wakál yanti umullikan ġiroúmba.

²⁰ Ġatun noa bouġkulléun, uwa ġaiya noa biyuġbai tako. Wonto noa ba kaloġ ka kauwál kakulla, nakulla noa bon biyuġbai-to ġikoúmba-ko, minki ġaiya noa kakulla, murrá ġaiya noa, puntimulléun ġaiya noa ġikouġ kin wuroka, ġatun búmbúmbea-kan ġaiya bon.

²¹ Ġatun noa bon yinallo wiyá, Biyuġ, yarakai baġ umulléun mikan ta moroko ka ġatun ġirouġ kin, keawai baġ murráráġ korien wiya-uwil koa tia ġiroúmba yinal yitirra.

²² Wonto noa ba biyuġbaito wiya barun mankillikan ġiroúmba, Mara unnoa-unnug upilligél, ġatun upilla bon konéin kako, ġatun upilla riġ ġikouġ kin máttára, ġatun upilla bon tuġġanoġ yulo ka ġikouġ kin:

²³ Ġatun mara tanan untiko buttikaġ italo ġiratimatoara kipai, ġatun turulla; tamunbilla ġearun, ġatun pitál koa ġéen kauwál:

²⁴ Koito ba unni emmoúmba yinal tetti kakulla, yakita ġaiya noa moron kátan: ġarawatilléun noa, ġatun yakita bummilléun ġaiya bon. Ġatun pitál bara kakilli kolaġ.

²⁵ Unta ta ġarro ġikoúmba kakilliela upulligél la purrai ta; ġatun uwolliela noa ba papai kokerá koba, ġurra noa tekki ġatun untelli ta.

²⁶ Ġatun noa kaai pa wakál mankillikan, ġatun wiya minnuġ-ban ġali tara minariġ tin.

²⁷ Ġatun wiya bon noa, Unni ta uwan ġiroúmba biġġai; ġatun ġiroúmba-ko biyuġbaito tura ġiratimatoara buttikaġ italo kipai ta, kulla wal pitál noa ġikouġ kai moron tin kátan.

²⁸ Ġatun noa niuwara kakulla, keawai noa murrug kolaġ uwa pa; yaki tin noa biyuġbai ġikoúmba uwa ġatun pirriralma bon.

²⁹ Ġatun noa bon wiyayelliela ġikoúmba biyuġbai, Ela! kauwál-kauwála wunála umala baġ ġirouġ; keawai baġ ġiroúmba wiyellikanne umá korien; ġatun keawai bi tia ġupa waréa buttikaġ kid, pitál koa tia ka-uwil baraj emmoúmba kótita:

³⁰ Wonto ba tanoa-bo ġiroúmba yinal uwa ġali, wari-wareka ġiroúmba tullokkan yarakai-willuġ koa ko ġapal loa, tura ġaiya bi ġikouġ buttikaġ italo ġiratimatoara.

³¹ Ġatun noa wiya bon, Yinal, yellawan bi emmouġ kin yantikatai, ġatun yantin unni tara emmoúmba ġirouġ kin kánun.

³² Murráráġ ta kakulla takilliko ġatun pittelliko; koito ba unni ġiroúmba umbeara-kóġ tetti kakulla, ġatun moron katéakan; ġatun ġarawatilléun, ġatun bummilléun bon yakita.

16

¹ ĠATUN noa wiya barun ġikoúmba wirrobullikan, Untoa ta tarai ta wakál kúri tullokkan porrólkan, mankillan piriwál ġikoúmba; ġatun wiyayéma bon ġikouġ wareka noa ġikoúmba tullokkan.

² Ġatun noa wiya bon, wiyelliela, Yakoa baġ ġurra ġirouġ kinba? wiyella bi tia minariġ bi ba umulliela; keawai bi kara kánun umullikan.

³ Wiyelléun ġaiya noa mankillikan niuwoabo, Minnuġ, banun baġ? kulla wal lia piriwálo emmoúmba ko mantilléun keawai baġ mankillikan kánun; keawai baġ pinninun; koiyun baġ poiyelliko.

⁴ Ġali wal baġ umulliko, yipanun tia ba emmoúmba mankilligél labirug, wamunbi-uwil koa tia bara kóti ko kokerá ko.

⁵ Yanti ba wiya noa barun wiyatoara piriwál koba ġikoúmba, ġatun noa wiya wakál kurri-kurri ka, Minnan ba wiyapaiyéun emmoúmba piriwál koba?

⁶ Ġatun noa wiya, Hekaton ta wimbi ka karauwa. Ġatun noa wiya bon, Mara bi unni, yellawa kurrakai, upulla pentékonta koa ka-uwil.

⁷ Wiya ġaiya noa tarai, Minnan bi wiyapaiyéun piriwál koba? Ġatun noa wiyá, Hekaton ta wimbi wiet. Ġatun bon noa wiyá, Mara bi unni, upulla éty koa ka-uwil.

⁸ Ġatun noa piriwallo murráráġ bon wiya unnoa mankillikan yarakai ka, kulla noa umá ġurakito; kulla bara wonnai tara unti ko purrai tako barúnba willuġġél koba ġuraki bara, keawai bara wonnai kaibuġ koba.

⁹ Ġatun ġatoa nurun wiyen, Umulla nura bo kótita kakilliko tullo-yarakai tabirug; tetti nura ba kánun, wamunbilla ġaiya nurun kokerá yuraki ba kátan yanti-katai.

¹⁰ Niuwoa miroman ġali waréa ta, yanti miroman noa kauwál ġali ta; ġatun niuwoa yarakai-maye ġali waréa ta, yanti yarakaimaye ġali kauwál ta.

¹¹ Yaki tin keawai nura ba miroma pa tullo yarakai ta, ġanto wal nurun ġunún tullo tulua ta miromulliko?

¹² Ġatun keawai nura ba miroma pa tarai koba, ġanto wal ġunún nurúnba kóti tako?

¹³ Keawai wal mankillikanto umánún buloara-bulun piriwál bula; kulla noa yarakai umánún wakál bon, ġatun murrárąg umánún tarai; ġa ba kánún noa wakállá, ġatun béelmánún bon tarai. Keawai nura kaiyu korien umulliko Eloi ko ġatun tullokan ko yarakai ko.

¹⁴ Ġatun unni tara bara ġurra Parithaioiko, willirrikan bara kátan, ġatun bon bara béelma.

¹⁵ Ġatun noa barun wiyá, Kauwa murrárąg koa nura ka-uwil mikan ta barun kin kúri ka; wonto noa ba Eloito ġurran nurúnba búlbúl la ba; kulla unni tara murrárąg ta kátan barun kinba kári ko, yakaran ta kátan mikan ta Eloi kin.

¹⁶ Wiyellikanne-ta ġatun bara propet kakulla loanne noa ba paipéa; yaki tabiruġ piriál koba Eloi koba wiyabunbéa, ġatun yantin kúri waita-waitawolléun murrug kolaġ.

¹⁷ Ġatun moroko ta ġatun purrai ta kaiyukan kánún waita kolaġ, keawai waréa ta wiyellikanne koba ka korien kakilliko.

¹⁸ Ġanto ba warekullinún porikunbai ġikouúmba ġatun tarai búmbéa ka, yarakai búmbéa noa: ġatun ġanto ba buúmbinún warekatoara poribal tabiruġ, yarakai búmbéa noa.

¹⁹ Kakulla ta noa wakál porrólkan, upulléun noa ġoroġ-ġoroġ ko ġatun murrárąg ko kariġkareuġ ko, ġatun bon kakulla minnuġbo-minnuġbo kauwál takilliko ġatun pittelliko yantin ta pureąg ka:

²⁰ Ġatun kakulla ta wakál poiyaye ġiakai yitirra Ladharo, wúnkulla bon ba yapuġġél ġikouġ ka ta, warapál mita-mitaġ,

²¹ Ġatun wiya bon ba mutuġ ko takilliko ġikouġ kai porroólbín tin takilligél labiruġ; ġatun warikál uwa bara, woatá ġaiya bon mita-mitaġ.

²² Yakita-kálai tetti kakulla poiyaye, ġatun kurriá bara bon aġelo-ko Abáram kinko parrąg kako: tetti ġaiya noa porrólkan kakulla, ġatun bon núlka.

²³ Ġatun noa unta koiyuġ ka hell ka bouġkulléun ġikouúmba ġaikúġ, kakilliela tirriki ka, ġatun nakilliela bon Abáramnuġ kalog ka, ġatun noa Ladharo parrąg ka kakilliela Abáram kin.

²⁴ Ġatun noa kaaibulléun, wiyelliela, Biyuġ Abáram, ġurrara tia kauwa, ġatun yukulla bon Ladharonuġ, kurrimulli koa noa kokoin to, ġatun moiya koa tia tálląg wupi-uwil; kulla wal baġ kirrin kátan unti tirriki ka koiyuġ ka.

²⁵ Wonto noa ba Abaramko wiyá, Yinal, ġurrulla ġintoa yakita moron ta mantala murrárąg-tai ġiroúmba, wonto noa ba Ladharo yakaran mantala ġatun noa yakita pitál kátan, wonto bi ba kirrin kátan.

²⁶ Ġatun yanti umni ba, ġearun kinba willika ba pirriko wún-kulla; keawai uwánún untikál untoa kolaġ: keawai bara unta biruġ, uwánún untiko ġearun kinko.

²⁷ Wiya ġaiya noa, Wiyan banuġ, Biyuġ, yuka-uwil koa bon bintun kinko kokerá kolaġ:

²⁸ Kulla wal lia emmoúmba kotita pente; wiya-uwil koa noa barun yanoa bara ba tanan uwánún unti kolaġ tirriki-tirriki kako.

²⁹ Abáramko noa wiya bon, Mothé noa ġatun bara propet barun katoa ba; ġurrabun-billa barun.

³⁰ Ġatun noa wiyá, Keawaran, biyuġ Abáram; wakál ba uwolla barun kin unta biruġ tetti kabiruġ, ġurránún ġaiya wal bara.

³¹ Ġatun noa bon wiyá, Keawai bara ba ġurránún bon Mothénuġ ġatun barun propetnuġ; keawai wal bara ġurránún wakál ba paikullinún moron tetti kabiruġ.

17

¹ WIYA ġaiya noa barun wirrobullikan ġikoúmba, Kauwa yanti kánún bo ta wal yarakai; yapalla noa ġikouġ kinbiruġ yarakai tabiruġ!

² Murrá ka ba noa ġira-uwil kea kulleuġ koa bon tunuġ, ġatun wareka uwil koa bon korowa ka, unni noa yanoa yarakai umabunbi yikora unti tara biruġ wakál wonnai tara biruġ.

³ Yakoai nura kauwa: Kótiko ba ġirouġ, yarakai umánún ġirouġ ka to, wiyella bon; ġatun minki noa ba kánún, kámunbilla bon.

⁴ Ġatun kauwál-kauwál-la biloa ba yarakai umánún wakál la purreáġ ka, ġatun kauwál-kauwál-la biloa willariġ noa kánún wakál la purreáġ ka, wiyellinún biloa, Minki baġ kátan; kámunbinún wal binuġ.

⁵ Ġatun bon bara apothol wiyá, Piriwál, kauwál koa ġearúnba ġurrulli-ta ka-uwil kakilliko.

⁶ Ġatun noa Piriwállo wiyá, Ka ba nurúnba ġurrulli-ta yanti kiloa mitti yeai mutard koba, wiyella wal nura ba unni kúlai thukamin, Wokka laġ bi kauwa wirrakan-bo, ġatun meapullia bi korowa ka; ġatun gala nurun ġurránún ġaiya wal.

⁷ Ġan nurun kinbiruġ-ko upullin purrai nurun ka to mankillikan-to, ġa tamunbin buttikaġ, wiyánún bon kabo, uwánún noa ba upulligġél labiruġ, Yuriġ bi wolla, yella-wolliko ta-uwil koa?

⁸ Ġatun wiya bon noa wiyánún, Kurrakai umulla ta-uwil koa baġ, ġatun ġirullia bi ġintoabo, ġatun mara-uwil koa bi tia ta-uwil koa baġ ġatun pitta-uwil; ġatun willuġ ġaiya bi tanún ġatun pittánún?

⁹ Wiya noa, wiyapaiyéún bon mankillikan, koito noa ba uma unni tara wiya bon ba? Kotan baġ kearan.

¹⁰ Yanti nura wiyella, umánún nura ba yantin unni tara wiyatoara nurun, Umullikan ġéen murráráġ korien kátan; umá ta ġéen unni wiyatoara umulliko ġearun.

¹¹ Ġatun yakita kakulla, uwolliela noa ba Hierothalem kolaġ, uwa willi koa noa Thamaria koa ġatun Galilaia koa.

¹² Ġatun noa uwolliela ba tarai toa kokeróa, nuġġarawa bon bara kúri ten ta purrul-wommun-wommun, ġarokéa kaloġ ka;

¹³ Ġatun bara paibuġġa pulli, ġatun wiya Iéthu, Piriwál, ġurráramulla ġearun.

¹⁴ Ġatun nakulla noa barun, wiya barun noa, Yuriġ nura wolla, túġunbillia nura barun kin hieru ko. Ġatun yakita kakulla, uwolliela bara ba, turon bara kakulla tanoa-kál-bo.

¹⁵ Ġatun wakállo barun kinbiruġ-ko, nakilléún noa ba turon noa kakulla, willuġbo noa uwa, ġatun kaaipulléún noa wokka, pitálmullia bon Eloinuġ,

¹⁶ Ġatun puntimulléún noa barán ġoara ko ġikouġ kin tinna ka, murráráġ noa bon wiyelléún; ġatun noa Thamaria-kál.

¹⁷ Ġatun noa Iéthuko wiyayelléún, wiyelliela, Wiya, ten ta turon kakulla? ġa wonnuġ-ke bara taraikan nain ta?

¹⁸ Keawai bara willuġ pa ba pitálmulliko bon Eloinuġ, wakál ba noa unni ġowikan ko.

¹⁹ Ġatun noa wiya bon, Bouġkullia, yuriġ bi wolla; ġirouġ ka ba ko ġurrulli biruġ ko turon bi kátan.

²⁰ Ġatun wiya bon ba Parithaioiko, yakounta-ke paipinún piriwál koba Eloi koba, wiyayelléún noa barun, wiyelliela, Tanan uwan piriwál koba Eloi koba keawai na korien.

²¹ Keawai bara wiyánún wal, A unni ta! ġa unta ta! kulla, a! piriwál koba Eloi koba murruġ kaba kátan nurun kinba.

²² Ġatun noa wiya barun wirrobullikan, A! purreáġ ta wal kánún, na-uwil koa nura wakál purreáġ Yinal koba kúri koba, ġatun keawai wal nura nanún.

²³ Ġatun bara nurun wiyánún wal, Na-uwa unni; ġa, na-uwa unnuġ: yanoa barun uwa yikora, wirroba yikora.

²⁴ Yanti kiloa pirruġġun-to uwan tarai tabiruġ ko moroko biruġ ko, tarai ta kako moroko kako; kauwa yanti kiloa wal kánún Yinal kúri koba purreúġ ka ġikouġ ka ta.

²⁵ Ġatun kurri-kurri ta bon umánùn minnuġbo-minnuġbo, ġatun warekatéa wal bon ġali koba willuġġél koba.

²⁶ Ġatun yakita ba kakulla purreaġ ka Noe-úmba ka, yanti bo ta wal kánùn purreaġ ka Yinal koba kúri koba.

²⁷ Takillala bara, pittellala bara, búmbillala bara nukuġ, ġukillala búmbilli ka, yakita purreaġ ka kakulla noa ba Noe uwa murrariġ murrinawai ka, ġatun tunta-tunta kakulla, ġatun kirun ġaipa barun nuropa.

²⁸ Ġatun yanti yakita ba kakulla purreaġ ka Lot-úmba, takillala bara, pittellala bara, wirrillala bara, ġukillala bara, meapala bara, wittiala bara;

²⁹ Wonto ba yakita unta purreaġ ka Lot noa uwa Thodóm kabiruġ, patéa ġaiya koiyuġ-ko ġatun brimtón-ko wokka tin moroko tin, ġatun kiyupa barun yantin kirun tetti-tetti.

³⁰ Yanti kiloa kánùn yakita purreaġ ka paipinùn noa ba Yinal kúri koba.

³¹ Unta yakita purreaġ ka kátan noa ba wokka kokerá, ġatun ġikoúmba tullokkan murrug kaba kokerá ba, keawai bon uwabunbi yikora barán mankilliko tullokkan ko; ġatun kátan noa ba upulligél laba, keawai bon uwabunbi yikora willuġ, kolaġ.

³² Kotella bounnoun kai nukuġ Lot-úmba tin.

³³ Ġanto ba ġikoúmba moron mirománùn moron kakilliko, wogúntinún wal noa; ġatun ġanto ba wogúntinún ġikoúmba moron, kánùn wal moron kakilliko.

³⁴ Wiya nurun baġ, yakita unta-unta tokoi ta buloara ta kánùn birrikilligél la wakál la; manún wal wakál, ġatun tarai ġaiya wunún.

³⁵ Buloara umullinún bula; mánún wal wakál, ġatun tarai ġaiya wunún.

³⁶ Buloara katéa-kánùn upulligél la; mánún wal wakál, ġatun tarai ġaiya wunún.

³⁷ Ġatun wiyelléun bon bara, wiyelliela, Piriwál, wonnuġ-ke? Ġatun noa wiya barun, Unta wonto ba katéa-kánùn murrin ta, unta kolaġ ba kautillinún bara porowi.

18

¹ ĠATUN noa wiya barun wakál parabol, wiya-uwil koa bon bara kúriko Eloinuġ, ġatun yari koa bara kaiyaléa-kún;

² Wiyelliela, Unta ta kokerá tarai ta wakál wiyellikan piriwál kakulla, kinta korien kakulla noa bon Eloi kai, ġatun keawai noa tuma korien barun kúri:

³ Ġatun kakulla wakál mabogun unta kokerá; ġatun bountoa uwa ġikouġ kin, wiyelliela, Timbai kakillia tia emmoúmba bukkakaye.

⁴ Ġatun keawai wal noa ġurra pa kabo kakullai tako; wonto noa ba yukita wiya ġikouġ kinko minki ka, Keawai baġ kinta korien bon Eloi kail kátan, ġa keawai kúri tuman korien;

⁵ Kulla bountoa tia unni mabogunto pirralman, ġatoa timbai kánùn bounnoun kin, murrin-murrin koa bountoa tia uwa-uwil kumburrobawanl bountoa tia.

⁶ Ġatun noa Piriwállo wiya, Gurrulla bon unni yarakai wiyellikan piriwál wiyen ba.

⁷ Ġatun wiya noa Eloito timbai katillinún barun ġikoúmba ġirimatoara bara wiyen bon purreaġ ka ġatun tokoi ta, ġurralin noa barun wiyelli ta kaloġ tinta?

⁸ Wiyen nurun baġ, timbai wal noa katillinán barun kurrakai. Wonto noa ba uwánùn wal Yinal kúri koba tanan, wiya, noa nanún ġurrullikanne purrai taba?

⁹ Ġatun noa wiya barun unni parabol tarai tako kotelléun bara ba murraràġ-tai barabo, ġatun yarakai bara kotellin taraikan:

¹⁰ Buloara-bula kúri uwa hieron kolaġ wiyelliko: wakál la noa Parithaio ġatun tarai ta teloné;

¹¹ Ġarokéa noa Parithaio ġatun noa yanti wiyelliela niuwoabo ġiakai: A Eloi! pitálman baġ ġirouġ, kulla baġ ka korien yanti tarai ba kátan, bara kau-maye, tuloa uma korien mankiye nukuġ ka, ġa ka korien baġ yanti unni noa ba telóné:

¹² Ta korien baġ buloarakál kátan wakál la thabbat biruġ ka, ġutan baġ winta untikal emmouġ kai yantin tabiruġ.

¹³ Ġatun noa telóné ġarokilliela ba kalog̃ ka, keawai noa ġaikug̃ ka wokka laġ na pa moroko koba, wonto noa ba minki motilliela wiyelliela ba, A Eloi! miromulla bi tia, yarakai bag ba katan.

¹⁴ Wiyan nurun baġ, unni noa kúri uwa baran kokerá koba ġikoug̃ ka tako ġurrá-matoara, keawai tarai ta: kulla yantin bara piriwál-buntelliko, kánún wal bara koiyun-barátaro; ġatun niuwoa bo koai-koai korien bon, umánún kauwál bon kakilliko.

¹⁵ Ġatun mankulla bara ġikoug̃ kinko wannai tara numa-uwil koa barun noa: wonto ba nakulla bara ba wirrobullikanto, yipa bara barun.

¹⁶ Wonto ba noa Iéthuko wiya barun, wiyelliela, Wamunbilla barun wannai tara emmoug̃ kinko, ġatun yanoa barun yipai yikora; kulla barun-kai-kál katéa-kánún piriwál koba Eloi koba.

¹⁷ Wiyan baġ tuloa nurun, Ganto ba ġurra korien piriwál koba Eloi koba yanti wannai waréa ba, keawai wal noa pulógkullinún unta kolaġ.

¹⁸ Ġatun taraito umullikanto piriwálo wiya bon, wiyelliela, Piriwál murráráġ-tai, minnuġ-bullinún bag moron kakilliko yantikatai?

¹⁹ Ġatun noa Iéthuko wiya bon, Minariġ tin bi tia wiyán murráráġ-tai emmoug̃? keawai wal wakál murráráġ-tai, wonto noa ba wakálbo, Eloi ta.

²⁰ Ġurran bi yantin wiyellikanne, Yanoa manki yikora nukug̃ taraikan koba, Yanoa búнки yikora tetti, Yanoa manki yikora, Yanoa nakoiya yikora, Ġurulla bon biyuġbai ġatun tunkán ġiroúmba.

²¹ Ġatun noa wiya, ġurra bag unni tara wiyellikanne yakikalai tabiruġ, wannai baġ ba kakulla.

²² Ġatun yakita ġurra noa ba Iéthuko unnoa tara, wiya bon noa, Wakál unnoa-unnug̃ uma korien bi ba; ġukillia yantin tullokan ġiroúmba, ġu-uwil koa barun mirrál ko, ġatun tullokan ġiroúmba kánún wal wokka ka moroko ka; ġatun kaai, wirroba-uwil koa bi tia.

²³ Ġatun ġurra noa ba unni, minki noa kakulla kauwál; kulla noa porrol kakulla kauwálkan.

²⁴ Ġatun noa ba Iéthuko nakulla bon minki noa ba kakulla kauwál-lan, wiya ġaiya noa, Pirral ta pulógkulliko bara tullokan ta ba piriwál koba kako Eloi koba kako!

²⁵ Kamel noa kaiyukan katan pulógkakilliko tigkuġkoa ko aku lako, keawai porrólkan pulógkakilliko piriwál koba kako Eloi koba kako.

²⁶ Ġatun bara ba ġurra, wiya bara, Ġan-ke wal moron kánún kakilliko?

²⁷ Ġatun noa wiyá, Unni tara kaiyu korien kúri ko umulliko, kaiyu-kan-to Eloito noa umulliko.

²⁸ Ġatun Peterko noa wiyá, Ela! wúnkulla géen yantin ta, ġatun wirroba géen bin.

²⁹ Ġatun noa wiya barun, Wiyánún baġ tuloa, Niuwoa wareka kokera ġikoúmba, ġa biyuġbai, ġa tunkán, ġa ġapal, ġa wannai, ġikoug̃, kinko piriwál koba tin Eloi koba tin,

³⁰ Mánún wal noa kauwál unti yakita, ġatun untoa tarai ta purrai ta tanan kakilliko, moron noa kánún yanti-katai.

³¹ Mankulla ġaiya noa barun dodeka ta wirrobullikan, ġatua wiya barun, A! waita géen wokka kolaġ Hierothalem kolaġ, ġatun yantin tara wiyatoara propet to ġikoug̃, kai Yinal lin kúri koba tin kánún wal umatoara kakilliko.

³² Ġatun bon ġunún wal barun kin ethánékál kinko, ġatun bon bukka-manún wal, ġatun karaġkobinún:

³³ Ġatun wéłkorinún wal bara bon, ġatun wal bon wirrinún; ġatun kúmba-ken-ta bouġkullinún ġaiya noa willuġbo.

³⁴ Ġatun keawai bara ġurrapa unni tara wiyatoara: ġatun unni wiyellikanne yuropa barun kai, keawai bara ġurrápa unni tara wiyatoara.

³⁵ Ġatun yakita kakulla, uwolliela noa ba papai Yeriko ka, wakál munmin kúri yellawolliela yapuġ ka bitta ka, poiyeilliela:

³⁶ Ġatun ġurrulliela noa barun konara yapuġ koa, wiya noa minariġ unni?

³⁷ Ġatun bara bon wiyá, Uwan noa Iéthu Nadharet-kál.

³⁸ Ġatun noa kaaipulléun, wiyelliela, Ela Iéthu! yinal Dabidúmba, ġurrára-mulla bi tia.

³⁹ Ġatun bara uwa ġanka, wiya bon koyelli koa noa: wonto noa ba butti paiyelléun, Yinal Dabidúmba ġintoa, ġurrára-mulla bi tia.

⁴⁰ Ġatun ġarokéa noa Iéthu, ġatun wiya bon yutilliko bon ġikouġ kinko; ġatun uwa noa ba papai, wiya bon noa,

⁴¹ Wiyelliela, Minnuġ-bulliko bi tia wiyan? Ġatun noa wiyan, Piriwál, namunbilliko tia umulla.

⁴² Ġatun noa Iéthuko wiya bon, Kámunbilla bin nakilliko; ġiroumba tin ġurrulli tin moron uma.

⁴³ Ġatun noa tanoa-kál-bo nakulla, ġatun bon noa wirropa, pitálmulliela bon Eloinuġ; ġatun yantin unni kúri nakulla bara ba, pitálma bon Eloinuġ.

19

¹ ĠATUN noa Iethu uwa Willi koa Yeriko koa.

² Ġatun kakulla untakál wakál kúri ġiakai Dhakké yitirra, piriwál telónékál noa kakulla, ġatun noa porrólkan.

³ Ġatun noa numéa nakilliko Iéthunuġ, ġan noa ba; ġatun noa keawai, kulla konaró núntima, kulla noa waréa ġoiyoġ.

⁴ Ġatun noa murra ġanka, ġatun noa kulliwa wokka-laġ, kúlai tin nakilliko bon, kulla noa unta kolaġ uwolli kolaġ.

⁵ Ġatun Iéthu noa ba uwa untako, nakulla noa wokka-laġ, ġatun bon nakulla, ġatun bon wiyá, Ela Dhakké! tanan kurrakai tirabulla, kulla buġgai koa baġ yellawánun ġirouġ ka ta kokerá.

⁶ Ġatun tiraba noa kurrakai barán, ġatun pitál ma-uwa bon.

⁷ Ġatun nakulla bara ba, wiyellan niuwarakan bara yantinto, wiyelliela, Waita noa uwa yarakai toa kóti kakilliko.

⁸ Ġatun noa Dhakké ġarokéa, ġatun wiya bon Piriwálnuġ, Ela Piriwál! winta baġ ġutan emmoúmba tullokkan kabiruġ mirrál kai ko; ġatun mankulla baġ ba tullokkan taraikan tabiruġ yaki tin ġakoiyaye tin, wupinún ġaiya bon baġ willuġbo warán tako.

⁹ Ġatun noa Iéthuko bon wiyá, Tanan uwa moron unti buġgai purreaġ ka unti ko kokera ko, kulla noa kátan yinal ta Abáramuúmba.

¹⁰ Kulla Yinal kúri koba uwa tiwolliko ġatun tumulliko woġúntitoara ko.

¹¹ Ġatun ġurra bara ba unni tara, wiyéakan butti noa ġatun wiya wakál parabol, kulla noa papai ta ba Hierothalem ka, ġatun kulla bara kota paipillinún piriwál koba Eloi koba tanoa-kál-bo.

¹² Yaki tin noa wiyá, Tarai ta piriwál uwa tarai tako purrai tako kaloġ kako, mankilliko ġikouġbo piriwálkanne-ta, ġatun willuġbulliko.

¹³ Ġatun wiya noa barun ġikoúmba mankillikan ten ta, ġatun ġukulla noa barun kin mina ta ten ta, ġatun wiya barun, Miromulla uwánun baġ ba willuġbo.

¹⁴ Wonto ba ġikoúmba-ko konara niuwama bon, ġatun yuka bon puntimai ġikouġ, wiyelliela, Keawai wal noa unni piriwál katillinún gearun.

¹⁵ Ġatun kakulla yakita, willuġ ba noa ba, mantoara piriwálkoba, wiya ġaiya noa barun unnoa mankillikan ġan kin noa ba ġukulla money, tanan ġikouġ kin, ġurra-uwil koa noa minnan barun kinba ġutoara ġukilli tabiruġ.

¹⁶ Tanan ġaiya uwa kurri-kurri wakál, wiyelliela, Ela Piriwál! ġiroúmba ta mina unni wittia kauwál ten mina ta.

¹⁷ Ġatun bon noa wiyá, Kauwa yanti, ġintoa mankillikan murrarág; kulla bi miroma unnoa waréa ta, kaiyukan bi kanwa ten ta kokera.

¹⁸ Ġatun tarai uwa, wiyelliela, Ela Piriwál! ġiroúmba ta mina unni wittia kauwál pente mina ta.

¹⁹ Ġatun noa wiya ġaiya bon, Kauwa bi kaiyukan pente ta kokera.

²⁰ Ġatun tarai uwa, wiyelliela, Ela Piriwál! na-uwa unni ta mina ġiroúmba, wúnkulla baġ ba koroka wurobilla:

²¹ Kulla bağ kinta kakulla ġirouğ kai, kulla bi bukka kauwál; mantan bi wokka-lağ keawai bi ba wunpa barán, ġatun kólbúntia bi unnoa keawai bi ba meapa ba.

²² Ġatun noa bon wiyá, ġirouğ kinbiruğ kóti ko kurraka ko wian pirriral-manún banuğ, ġintoa ta mankillikan yarakai. Ġurra bi tia bukka kauwál bağ; mantillin wokka-lağ keawai bağ wunpa barán, ġatun kólbúntillin unnoa keawai bağ ba meapa ba:

²³ Kora koa bi ġupa emmoúmba money ġukilligél lako, marauwil koa bağ emmoúmba kóti ġatun kopatoara ta, emmouğ ka ta uwolli ta?

²⁴ Ġatun noa wiya barun ġarokilliela bara ba taruğ ka, Mantillia unnoa mina unti biruğ bon, ġatun ġuwa bon gala ko tenkan ko ġikouğ.

²⁵ (Ġatun bara wiya bon, Piriwál, ten ta mina mantan noa).

²⁶ Wian nurun bağ, Yantinko barun mantan bara ba ġunún wal butti; ġatun keawaran noa ba, unnoa ta mantan noa ba mantillinún wal bon ġikouğ, kinbiruğ.

²⁷ Kulla bara unnoa emmoúmba niuwa-maye, keawai bara emmouğ kánún bi ba piriwál barun, mara barun, bú-uwil koa barun emmouğ kin mikan ta

²⁸ Ġatun wiya noa ba unnoa, waita ġaiya noa ġanka uwa wokka-lağ Hierothalem kolağ.

²⁹ Ġatun kakulla yakita, uwa noa ba papai Bethábage tako ġatun Bethany tako, bulkára ta ġiakai yitirra Elaión ka la, yakunbéa noa buloara-bulun ġikoúmba wirrobullikan,

³⁰ Wiyelliela, Yuriğ nura wolla kokeraá ko kaiyin tako; uwollinún nura ba untariğ, nanún ġaiya nura wirritoara waréa buttikağ keawai yellawa pa kúri bulka ka: buruğbuğgulla unnoa, ġatun yemmamulla untiko.

³¹ Ġatun tarai-kan-to ba wiyánún, Minariğ tin nura unnoa ta buruğbuğgan? ġiakai nura wiyella bon, Kulla noa Piriwállo wiyá.

³² Ġatun bara ba yukatoara, waita uwa, ġatun nakulla ġaiya bara yanti noa ba wiya barun ba.

³³ Ġatun buruğbuğgullielia bara ba unnoa waréa buttikağ, ġikoúmba-ko wiya barun, Minariğ tin nura buruğbuğgan unni waréa buttikağ?

³⁴ Ġatun bara wiyá, Piriwállo noa wiya gala.

³⁵ Ġatun bara yemmama bon kinko: ġatun bara wupéa barun ba kirrikin bulka ka buttikağ ka, ġatun wupéa bon bara Iéthunuğ wokka ka.

³⁶ Ġatun uwolliela noa ba, wupéa bara yapuğ ka kirrikinkan nurúnba.

³⁷ Ġatun uwa noa ba papai, bará ka Elaión ka ba koba bulkára koba, yantin konara wirrobullikan pitál ġaiya kakulla, ġatun pitálmullielia bon Eloinuğ kauwál lo pulli to, yantin tin kauwál lin uma ba nakulla bara ba;

³⁸ Wiyelliela, Pitálmabunbilla bon Piriwál ta uwan noa ba Yehóa-úmba koa yitirroa: pital-kámunbilla moroko ka, ġatun killibinbin kámunbilla wokka ka.

³⁹ Ġatun winta-ko Parithaioi kabiruğ konara biruğ wiya bon, Piriwál, koawa bi barun ġiroúmba wirrobullikan.

⁴⁰ Ġatun noa wiyayelléún barun, wiyelliela, Wian nurun bağ, wiya, bara ba kaiyellinún mupai, kaibullinún wal ġaiya unni tara tunuğ tanoa-kál-bo.

⁴¹ Ġatun uwa noa ba papai, nakulla noa kokera kariğ, ġatun noa tuğkillimilléún ġalao rin,

⁴² Wiyelliela, Ġurrapa bi ba, ġintoa ta, unti purreağ ka ġirouğ ka ta unni tara pitál-kakilliko ġiroúmba ko! wonto ba yakita yuropa ta ġirouğ, kai nakilli tin ġaikuğ tin.

⁴³ Kulla purreağ, ta kánún ġirouğ kin, bukka-kan-to ġirouğ wirrinún wal bara kirrai kirai-karai ġirouğ, ġatun karai-karai wirrinún ġirouğ, ġatun mirrámanún bin willi ka yantin ta kaiyinkaiyin ta,

⁴⁴ Ġatun pirikibunpinún bin purrai ta, ġatun ġiroúmba wonnai tara murruğ kaba ġirouğ, kinba; ġatun keawai bara wupinún tunuğ tarai ta wokka ka; kulla keawai bi ba ġurra pa yakita natala ba ġiroúmba.

⁴⁵ Ġatun noa uwa murrariğ kolağ, ġatun yipa ġaiya noa barun ġukillikan, ġatun barun mankillikan unta biruğ;

⁴⁶ Wiyelliela barun, Upatoara unni, Emmoúmba kokera ta wiyelligél kokera; wonto ba nura uma unni wollo kakilliko barun nankiye-ko.

⁴⁷ Ġatun wiyelliela noa purreağ ka yantin ta murrug ka hieron ka. Wonto ba piriwál hiereu, ġatun bara ġarammateu, ġatun bara piriwál kùri koba, numa bara bon búnkilli kolağ;

⁴⁸ Yakoai bara ba umulliko ġatun keawai bara, kulla yantin ta kùri pitál kakilliela ġurrulliko bon.

20

¹ ĠATUN yakita kakulla, wakál la tarai ta purreağ ka, wiyelliela noa ba barun kùri ka, ġatun wiyelliela euagelion, uwa ġaiya bon bara piriwál ġatun bara ġarammateu ġatun bara pàrethbuteroi,

² Ġatun wiya bon, wiyelliela, Wiyella ġearun, minariğ tin kaiyu tin umullia bi unni tara? ġa ġanto-ke noa bin unni ta kaiyu ġukulla ġirouğ?

³ Ġatun noa wiyayelléun, ġatun wiyelliela barun, Ġatoa wiyánun nurun unni ta wakál; ġatun wiyayelléa tia;

⁴ Korimullikanne-ta Ioanne-úmba, wiya, ta morokó kabirug, ġa kùri koba?

⁵ Ġatun bara wiyatan barabo, wiyelliela, Wiyánun géen ba, Morokó kabirug ta; wiyánun, ġaiya noa, Kora koa nura ġurrapa bon?

⁶ Kulla géen wiyánun ba, Kùri koba ta; yantinto ġaiya ġearun kùriko pintinun tunuğ ko: kulla bara kotan bon Ioannenuğ propet ta kakulla.

⁷ Ġatun bara wiyá, keawai bara ġurrapa wonta birug ta.

⁸ Ġatun noa barun Iéthuko wiya, Keawai bağ, wiyánun nurun minariğ tin kaiyu tin uman bağ unni tara.

⁹ Ġatun potopaiyá ġaiya non barun kùri wiyelliko unni-ta parabol: Taraito kùriko meapa wain-ğel la, ġatun wúnkulla barun kin upullikan ta, ġatun uwa ġaiya noa kalog kolağ, yuraki.

¹⁰ Ġatun yakita poaikulléun ba, yuka noa bon wakál umullikan barun kin upullikan ta, ġu-uwil koa bara bon yeai wainğél labirug; wonto bara ba búnkulla bon, ġatun yuka bara bon waita yeai korien.

¹¹ Ġatun noa toanta yukéa-kan tarai umullikan: ġatun bara bon búntéa-kan yantibo, ġatun yarakai uma bara bon, ġatun bon bara yuka waita yeai korien.

¹² Ġatun noa toanta yukéa-kan ġoro-ta, ġatun bara bon mularéa-kan, ġatun wareka bara bon warrai tako.

¹³ Wiya ġaiya noa piriwállo wain-ğél koba, Minnuğ banun kan bağ? Yukánun wal bağ emmoúmba yinal pitálmatoara; mirka bara bongurránun, nanun bon bara ba.

¹⁴ Wonto bara ba upulli-kan-to nakulla bon ba, barabo ġaiya wiyellan, wiyelliela, Unni ta wúğgurra piriwál: kaai géen búwil bon, purrai koa ka-uwil ġearúnba.

¹⁵ Yanti bon bara wareka wain-ğél labirug, ġatun búnkulla ġaiya bon tetti. Minnuğ banun noa barun piriwállo wain-ğél koba ko?

¹⁶ Uwánun wal noa tanan búnkilliko barun upillikan-ko, ġatun ġunun wal wain-ğél taraikan ko. Ġatun ġurra bara ba unni, wiya ġaiya bara, Kámunbi yikora Eloito.

¹⁷ Ġatun noa barun nakilliela, ġatun wiyá, Minariğ-ke unni upatoara yanti, Tunuğ ta wareka wittilli-kán-to, unnoa ta katéakanun wokka ka waiyakan ta wolluğ?

¹⁸ Ġan-ba puntimullinun untoa tunuğ ka tiirpuntimullinun, wal; ġan kinba puntimullinun, minbinun wal bon muta-mutan.

¹⁹ Ġatun tanoa-kál-bo kota bara piriwállo hiereuko ġatun ġarammateuko mankilliko bon; ġatun bara kinta kakulla konará tin; kulla bara ġurrá, wiya noa ba unni parabol barun kin.

²⁰ Ġatun bara bon tuminéa, ġatun yuka barun ġakoiyellikan, ġakoğkilliko barunbo kùri murraràğ-tai, ġurra-uwil koa bara ġikoúmba wiyellikanne, yaki tin mara-uwil koa bara bon kaiyu kabo kobána kinko.

²¹ Ġatun wiya bon bara, wiyelliela, Piriwál, ġurran géen wiyan bi ba tuloa, kinta kora bi kauwa taraikan tin kúri kurriġ tin, wonto bi ba wiyan tuloa wiyellikanne Eloi koba:

²² Wiya tuloa ta ġukilliko ġearun tullokkan ġikouġ kin Kaithari kin, ġa keawai?

²³ Wonto noa ba ġurra ġakoiya barúnba, ġatun wiya barun, Yakoai nura tia numan?

²⁴ Túġunbilla tia wakál denari. Gan kiloa unnoa ġoara ġatun upatoara unni ta? Wiyayelléun bon bara ġatun wiyelliela, Kaitharúmba ta.

²⁵ Ġatun noa wiya barun, Koito Kaithari kinko ġuwa Kaitharúmba ta, ġatun Eloi kinko unnoa tara Eloi-úmba ta.

²⁶ Ġatun keawai bara man pa ġikoúmba wiyelli-ta mikan ta barun kin kúri ka: ġatun mupai kakulla bara.

²⁷ Uwa ġaiya taraikan barun kinbiruġ Thadukaioi kabiruġ bara ġurramaigaye moron ta katéa-kánun tetti kabiruġ; ġatun bara bon wiyá,

²⁸ Wiyelliela, Ela Piriwál Mothéto noa upa ġearun, Taraikan koba ba kóti tetti kánun ba porikunbai ġikoúmba ta, ġatun tetti noa ba kánun, wonnai korien, mara-uwil koa ġikoúmba kóti bounnoun ġikoúmt porikunbai ka-uwil koa wonnai ġikoúmba koti koba.

²⁹ Yakita ġaiya warán kakulla kótita theben ta: ġatun kurri biruġ ko búmbéa porikunbai kakilliko, ġatun tetti kakulla, wonnai korien.

³⁰ Ġatun willi-kaba-ko deuteroto búmbéa bounnoun porikun bai kakilliko, ġatun tetti noa kakulla, wonnai korien.

³¹ Ġatun willi-kaba-ko trito-to búmbéa bounnoun porikunbai kakilliko; ġatun yaki-bo thebento; ġatun bara keawai wimba wonnai, ġatun tetti bara kakulla.

³² Willuġ ta tetti ba bountoa nukuġ.

³³ Ġanúmba barun kinba unnoa porikunbai kánun kakilliko moron ba katéa-kánun tetti kabiruġ? kulla bara thebento bounnoun búmbéa porikunbai kakilliko.

³⁴ Ġatun noa Iéthuko wiyayelléun, wiyelliela barun, Wonnai ta untikal búmbillan porikunbai ġatun ġukillaiko búmbilliko:

³⁵ Wonto ba bara murrárag-tai kánun uwolliko unta kolaġ tanai tako purrai tako, ġatun moron kakilliko tetti kabiruġ, keawai bara búmbúmbillan, keawai ġukitan búmbilliko:

³⁶ Keawai wal bara tetti banún yukita; kulla bara yanti kátan aġelo kiloa; ġatun wonnai tara kátan Eloi-úmba, kátan bara wonnai tara ġali koba moron kánun tetti kabiruġ.

³⁷ Ġatun Mothéko noa ba túġaiya wakál la kúlai ta, bouġbuġġa barun tetti-tetti kabiruġ, wiya noa ba bon Yehóanuġ, Eloi ta Abáramúmba, ġatun Eloi ta Ithákúmba, ġatun Eloi ta Yacobúmba.

³⁸ Keawai noa Eloi ta barúnba tetti-tetti koba, wonto ba barúnba moron koba; kulla yantin moron kátan ġikouġ kin.

³⁹ Taraito bara ġárammateukállo wiya ġaiya, Piriwál, murrá rag bi wiyan.

⁴⁰ Ġatun yukita keawai bara bon wiya pa kinta-kan-to.

⁴¹ Ġatun noa barun wiyá, Yakoai bara wiya Kritht ta yinal ta Dabidúmba?

⁴² Ġatun Dabidto noa niuwoabo wiyá, biblion kaba tehillim koba, Yehóako noa wiya bon Piriwál emmoúmba, Yellawolla bi túġkaġkeri ka emmouġ kin,

⁴³ Uma-uwil koa baġ barun bukkakan ġikoúmba yuloġél ko kakilliko ġikouġ.

⁴⁴ Dabidto noa ba wiya bon Piriwál yitirra, yakoai ġaiya noa yinal ta ġikoúmba?

⁴⁵ Wiya ġaiya noa barun ġikoúmba wirrobullikan mikan ta yantin ta kúri ka,

⁴⁶ Yakoai nura barun kai ġárammateu tin, pitál koa bara uwa-uwil kurrawitaikan, ġatun umulliko ġukilligél laba ko, ġatun yellawolligél la wokka ka thunagóg ka, ġatun piriwál-ġél takilligél laba;

⁴⁷ Mantan bara kokera ba mabogun koba, ġatun umánun wiyellikanne-ta kurra-uwai túġunbilliko: yaki tin bara kánun kauwál tetti kakilliko.

21

¹ ĠATUN noa nakulla wokka-laġ, ġatun nakulla barun porrólkan wúnkilliela ġutoara barúnba wúnkilligél la.

² Ġatun noa nakulla tarai mabogun mirrálkan wúnkilliela bountoa leptu buloara unta ko taroġ kako.

³ Ġatun noa wiya barun, Wiyan baġ nurun tuloa, ġali mabogunto mirrállo wúnkulla kauwál ta bara yantin kearan.

⁴ Kulla yantin ġali wúnkulla bara tullokan barúnba kauwál labiruġ ġutoara Eloi koba ko: wonto bountoa ba bounnoun kinbiruġ mirrál koba wúnkulla yantin tullokan bounnounba.

⁵ Ġatun winta koba wiyelliela hieron tin, umatoara unni korien tunuġ ko murràràġ ko ġatun ġutoara, wiya noa,

⁶ Unni tara natan nura ba, uwanàn ta purreaġ kariġ ka; korien ġaiya ba wakál tunuġ wokka-ka-wokka-ka, yantin wal warekullinún barán.

⁷ Ġatun bara bon wiyá, wiyelliela, Piriwál, yakounta-ke unni tara kánún? ġatun minariġ túġa kánún unni tara ba ġaiya kánún?

⁸ Ġatun noa wiyá, Yakoai nura, ġakoiya kora koa nura ka-uwil; kulla kauwál-kauwállo tanan uwánún emmouġ kin yitirra, wiyellinún, ġatoa ta (Kritht ta); ġatun papai ta kakillin; yanoa uwa yikora nura barun.

⁹ Ġurránún ġaiya nura ba wurawai kauwál ġatun koakillai ta ba, kinta kora nura: kulla unni tara kánún wal kurri-kurri, kulla wirán keawai kánún kabo.

¹⁰ Wiya ġaiya noa barun, Bara kúriko wuruwai wal kánún barun kúriko, ġatun bara piriwál koba barun piriwál koba ko:

¹¹ Ġatun purrai tako pulululu kakilliko winta ka bo, ġatun kunto korien ta ko, ġatun munni kauwálkan; ġatun kinta nakilli tara ġatun kauwál kánún túġa morokó kabiruġ.

¹² W onto ba kurri-kurri ka unni tara ba kánún, manún wal bara máttarro nurun, ġatun yarakai nurun umánún, ġumullinún nurun thunagóġ kako, ġatun jail ko, mantoaro nurun mikan ta ko piriwál lako, ġatun wiyellikan tako emmouġ kinko yitirra ko.

¹³ Ġatun unni ta kánún nurun túġa kakilliko.

¹⁴ Yanoa nura kota yikora minki ko, minariġ nura wiyayellinún.

¹⁵ Kulla baġ ġunún nurun kurraka ġatun ġuraki kakilliko, keawai wal yantin bara nurúnba bukka-kan-to kaiyu kánún wiyayelliko ġa pirriral umulliko.

¹⁶ Ġatun nura ġakoiyellinún wal nurun biyuġbaito ġatun kóti tako kariġ ko, ġatun winta nurun kinbiruġ búnnún wal tetti barun kai.

¹⁷ Ġatun nurun yarakai umánún yantinto, emmoúmba tin yitirra tin

¹⁸ Wonto ba keawai wal wakál kittuġ ġikouġ, kinbiruġ wolluġ kabiruġ tetti kánún.

¹⁹ Murrái kakillikanne nurúnba ka, miromulla nura marai nurúnba?

²⁰ Ġatun nanún nura ba Hierothalem kirrai-kirrai ta ba konara ba ġurrulla papai ta ba ġaiya wari-warekulli ta ba unnuġ.

²¹ Murrabunbilla ġaiya barun Iudaia kaba waita bulkará kolaġ; ġatu uwabunbilla barun willi kaba waita warai tako; ġatun uwabunbi yikora barun tanan koruġ kaba untako.

²² Kulla yakita unti tara purreaġ ka bukka kakillikanne, kauwil koa yantin upatoara kánún wal kakilliko.

²³ Yapallun bara wonnaikun ġatun bara pittallikun, yakita ġaiya purreaġ ka! kulla wal kánún kauwál yarakai purrai ta, ġatun bukka unti yantin ta kúri ka.

²⁴ Ġatun bara tetti kapaiyinún yirrá biruġ, ġatun barun yutinún wal mantoara kakilliko yantin tako purrai kariġ kako: ġatun Hierothalem wattawánún barán bara ethánékál-lo, yakita kalai tako barúnba koba ġoloin kánún ethánékál.

²⁵ Ġatun ġaiya kánún wal túġa punnál la, ġatun yellana ka, ġatun mirri ka; ġatun purrai taba yarakai ta barun kin kúri ka, ġatun kinta kauwál korowa ta ġatun bókkaloġ kólbilaġbullin;

²⁶ Kúri koba búlbúllo kotan kinta-kan-to, ġatun nakilli tabiruġ ġaloa tara kotanan ba uwánún purrai kolaġ; kulla wal barun tolománún wal kaiyukan ta moroko koba.

²⁷ Ġatun yakita ġaiya wal nanún Yinal ta kúri koba tanan uwollillún yareil loa kaiyu koa, ġatun killibinbin koa kauwál loa.

²⁸ Ġatun kánùn ba unni tara paipinún, na-uwa wokka-lağ, ġatun wokka-lağ kauwa kia-kia nurúnba wolluğ; kulla tanan uwánùn paipai nurúnba wommunbillikanne-ta.

²⁹ Ġatun noa wiya barun wakál parabol; Na-uwa kokuğ ta, ġatun yantin kúlai ta;

³⁰ Paikullinún bara ba, nanún nura ġatun ġuurránún nura nurun kinbiruğ wunál kátan paipai taba.

³¹ Yaki kiloa nura, nanún nura ba unni tara paikulliko, ġurulla ġaiya nura piriwál koba Eloi koba kátan papai taba.

³² Wiyan tuloa nurun bağ, Keawai unni willuğğél tetti-tetti kánùn, yakita-ko ġoloin ba kánùn.

³³ Moroko ta ġatun purrai ta kánùn wal waita uwánùn, wonto ba keawai wal emmoúmba wiyellikanne unni tara keawai wal waita uwánùn.

³⁴ Ġatun yakoai nura nurabo, kauwa ba yantin ta nurúnba búlbúl matayel koa katéa-kún ġatun kuttawaiban koa katéa-kún, ġatun umillikéún koa katéa-kún ġali koba moron koba, ġatun yanti ta purreağ ka paipinún ġati nurun kin.

³⁵ Kulla pika kiloa yanti uwánùn untoa purreağ ka barun kin yellawan yintin ta yaki tin purrai ta.

³⁶ Tumimilla nura, ġatun wiyellia yanti-katai to, ka-uwil koa nura murraràğ kakilliko moron ko unti tara biruğ paikullinún wal ġatun ġarokilliko mikan tako yinal lako kúri koba ko.

³⁷ Ġatun purreağ ka wiyelliela noa murrug ka hieron la; ġatun noa uwa waita tokoi ta, ġatun yellawa noa bulkára ġiakai yitirra Elaión ka la.

³⁸ Ġatun yantin bara kúri uwa ġorokan ta ġikouğ kinko hieron lako, ġurrulliko bon.

22

¹ YAKITA kakulla papai takillikanne nulai lebben korien koba, ġiak yittira Pathak.

² Ġatun bara piriwál hiereuko ġatun ġarammateuko nukilliela búncilli kolağ bon tetti wirrilliko; kulla bara kinta kakulla kúri tin

³ Pulóğkulléún noa Thatánto murrug ka bon Iudathkin, tarai yitirra ġiakai Ithákariot, wakál noa dodeka kabiruğ.

⁴ Ġatun noa waita uwá, ġatun wiyelliela barun piriwál hiereunug ġat barun kapátin, yakoai noa ba ġakoyánún bon barun kin.

⁵ Ġatun pitál kakulla, ġatun bara wiya ġukilliko bon arguro.

⁶ Ġatun noa wiyai, ġatun mittilliela noa ġakomulliko bon barun kin, yakita bara ba konara waita ġaiya uwa.

⁷ Kakulla ġaiya purreağ nulai lebben korien ta, yakita Pathak bunnúm wal ba tetti.

⁸ Ġatun noa yuka Peternuğ ġatun Ioannenuğ, wiyelliela, Yuriğ uwolla umulliko Pathak ta, ta-uwil koa ġéen.

⁹ Ġatun bara bon wiyá Wonta-ke ġéen umánún?

¹⁰ Ġatun noa barun wiyá, A! nauwa nura, yakita uwánún nura ba kokerá kariğ ka, unta ġaiya nurun wakállo kúriko wimbi-kaba-kan-to kokoin-kan-to nuğgurra uwánún nurun; wirrobulla bula bon murrug kolag kokerá kolağ unta-ko pulóğkullinún noa ba.

¹¹ Ġatun wiyánún nura bon kokeratin, Piriwallo wiyán bin, Wonnug waiyakan takilligél, untoa bağ ba tanun Pathak ta emmoúmba katoa wirrobullikan toa?

¹² Ġatun nurun túğkaiyánún wal noa kauwál ta waiyakan wokka kaba wupitoara: unnuğ umulla.

¹³ Ġatan bara waita uwa, ġatun nakulla bara unni tara yantin ba wiya barun: ġatun bara upéa Pathak ta.

¹⁴ Ġatun yakita kakulla hóra ba, yellawa noa barán, ġatun dodeka ta apothol ta ġikouğ katoa.

¹⁵ Ġatun noa barun wiyá, Kauwál ta emmoúmba kotatoara takilliko unni Pathak ta nurun katoa, ta-uwil koa kurri-kurri tetti kolağ ke bağ:

¹⁶ Kulla bağ wiyan nurun, Keawai wal bağ tanùn unta-kál kabo ba kánùn piriwál koba ka Eloi koba.

¹⁷ Ġatun noa mankulla wimbi, ġatun pitálma ġaiya noa, wiyelliela, Mara unni ġukillai koa nurabo:

¹⁸ Kulla bağ wiyan nurun, Keawai wal bağ pittánùn yeai tabiruğ ampelo tabiruğ, kabo koa uwa-uwil piriwál koba Eloi koba tanan.

¹⁹ Ġatun noa mankulla arto ta, ġatun pitálma ġaiya noa, ġatun yiirbuğga, ġatun ġukulla barun, wiyelliela, Unni ta emmoúmba murrin ġutoara nurun kin: umulla unni yanti ġurrulliko tia.

²⁰ Yantibo wimbi takilli biruğ yaréa ka, wiyelliela, Unni wimbi ta wiyatoara ta buğgaikál emmouğ kinbiruğ ġoroğ kiroapa nurun kai.

²¹ A! na-uwa, unni ta máttára ġikoúmba ġakoyelli-kan-to tia, emmouğ katoa ba takilligél laba.

²² Yuna bo ta wal noa uwánùn Yinal kúri koba, yanti wiyatoara; yapallun unnoa kúri ġakoyelli-kan-to bon ba!

²³ Ġatun bara wiyellan barabo, ġan-to barun kinbiruğ-ko umánùn ta unni.

²⁴ Ġatun koakillan bara barabo, ġan-ke kánùn piriwál barun kinbiruğ.

²⁵ Ġatun noa wiya barun, Bara ta piriwál ethánékál koba katilléun bara; ġatun bara ta katillikan ġiakai yitirra murroğ-tai.

²⁶ Wonto nura ba keawai yanti kánùn; wonto noa kurrikóg nurun kinba, kámunbilla bon yanti mitti; ġatun noa piriwál kátan, yanti umullikan ta.

²⁷ Wonnuğ-ke kauwál unnuğ, niuwoa yellawan noa ba takilli ta, niuwoa umánùn noa ba? wiya, unni ta noa yellawollin ba takilli taba? wonto bağ ba kátan nurun kinba yanti niuwoa ba umullikan ta.

²⁸ Nura ta emmouğ kin minkéa emmouğ ka ta numatoara:

²⁹ Ġatun ġutan nurun bağ kakilliko piriwálgél lako, yanti tia emmoúmba Biyuğbaito ġukulla tia;

³⁰ Ta-uwil koa nura ġatun pitta-uwil emmouğ ka ta takilligél la emmouğ ka ta piriwálgél la, ġatun yellawa-uwil yellawolligél la piriwál koba ka, wiyellin barun konara dodeka ta Ithárael koba.

³¹ Ġatun noa piriwálo wiyá, Ela Thimon, Thimon! ġurrulla, Thantánto noa wiyan bin mankilliko kirrai-kirrai koa biloa uma uwil yanti wiet kiloa:

³² Wonto bağ ba wiyelléun ġirouğ kai ġurra-uwil koa bi; ġatun minki bi ba kánùn, pirralmulla ġaiya barun bi kóti ta ġiroúmba.

³³ Ġatun noa wiya bon, Piriwál, kátan bağ unni miriğil uwolli kolağ ġikouğ katoa ko jail kolağ ġatun tetti kakilli kolağ.

³⁴ Ġatun noa wiyá, Wiyan banuğ, Peter, keawai wal mukka ko tibbinto wiyánùn unti purreag ka, kurri-kurri ka bi ba ġakoyánùn tia ġoro-ka ġimillin bi tia ba.

³⁵ Ġatun noa wiya barun, Yuka nurun bağ ba yinuğ korien, ġatun pika korien, ġatun tuğganóg korien, wiya, nura minariğ lo? ġatun bara wiyá, Keawai.

³⁶ Wiya ġaiya noa barun, Wonto ba yakita unti, niuwoa ba yinuğkan, mamunbilla bon unnoa, ġatun yanti pika; ġatun niuwoa yirra korien, ġumunbilla kirrikin ġikoúmba, wakál koa noa ġukilli ko.

³⁷ Wonto bağ ba wiyan nurun, unni ta upatoara ka-uwil koa emmouğ kin kakilliko ġiakai, Tumbitoara noa barun kin yarakai willuğ ka: kulla unni tara emmouğ kin ba kakillinùn ġoloin ko.

³⁸ Ġatun bara wiyá, Piriwúl, na-uwa unni tuloa buloara yirra. Ġatun noa wiya barun, Tantoa-bo-ta

³⁹ Ġatun noa uwa warrai koba, ġatun waita uwa uwolli kolağ bulkára kolağ Elaión ko la kako; ġatun ġikoúmba wirrobuli-kan wirroba bon.

⁴⁰ Ġatun uwa noa ba unta, wiya ġaiya noa barun, Wiyella, keawai koa nura pulóğkulli korien yarakai kolağ.

⁴¹ Ġatun noa waita uwa barun kinbiruġ yanti kiloa tunuġ koba pintia, ġatun waroġbugko upullin barán, ġatun wiyá,

⁴² Wiyelliela, Biyuġ, wiya bi unni wimbi manún emmouġ kinbiruġ: yanoa emmoúmba kotellikanne ġiroúmba ta kámunbilla kakilliko.

⁴³ Ġatun paipéa wakál aġelo moroko kabiruġ pirrirmullin bon.

⁴⁴ Ġatun kirrinkan noa kanwálkan, wiyelliela noa pirriral butti; ġatun ġikoúmba kurrol upulléun barán purrai kolaġ yanti kiloa komonba kauwál ġoroġ koba.

⁴⁵ Ġatun bouġkulléun noa ba wiyelli tabiruġ, ġatun uwa ġikoúmba tako wirrobullikan tako, nakulla ġaiya noa barun birriki birriki minkikan,

⁴⁶ Ġatun noa wiya barun, Minariġ tin nura birrikin? Bouġkullia ġatun wiyella, uwéa-kun koa nura yarakai kolaġ.

⁴⁷ Ġatun yakita wiyelliela noa ba, a! konara, ġatun noa yitirra ġiakai Iudath, wakál ta dodeka kabiruġ, uwa ġanka barun kin, ġatun uwa ġaiya noa papai léthu kin, búmbúmkakilliko.

⁴⁸ Wonto noa ba léthuko bon wiya, Ela Iudath! ġakoman binuġ Yinal kúri koba búmbuġgullito?

⁴⁹ Nakulla bara ba ġikouġ kinba minnuġ-bulli kolaġ, wiyabon bara, Ela piriwál! wiya, ġéen búntan yirra ko?

⁵⁰ Ġatun wakál barun kinbiruġ kunbuntéa wakál umullikan hiereu koba piriwál koba, ġatun kunbuntéa bon túġkaġ-keri ġurréuġ.

⁵¹ Ġatun léthuko noa wiyayelléun, ġatun wiyelliela, Kamunbilla nura unni. Gatun bon noa numa ġurréuġ ġatun turon bon uméa-kan

⁵² Wiya ġaiya léthuko barun piriwál hiereu koba, ġatun barun kapátin hieron koba, ġatun barun ġarrokal, uwa bara ġikouġ kin, Wiya, nura tia uwan yanti mankiye ko yarakaikan ta, yirraikan ġatun kotarakan?

⁵³ Kakulla baġ ba nurun kin yanti-katai purreaġ ka hieron ka, keawai nura tia manpa máttarro: wonto ba unni yakita ta katan nurúnba ġatun kaiyukan tokoi tako.

⁵⁴ Mankulla ġaiya bara bon, ġatun yutéa bon, mankulla ġaiya bon kokera ko piriwál koba kako hiereu koba kako. Gatun Peterko noa wirroba kaloġ kolaġ.

⁵⁵ Ġatun upilléun bara ba koiyuġ ko willi ka kokera, ġatun yellawa yantin, Peter ġaiya noa yellawa barun kin.

⁵⁶ Ġatun taraito murrakinto nakulla bon, yellawa noa ba koiyuġ ka ġatun pimmilliela bon pirrallo, ġatun wiya, Unni noa kúri kakulla ġikouġ katoa.

⁵⁷ Ġatun noa ġakoiya bon, wiyelliela, Ela murrakin! keawai bon baġ gimilli korien.

⁵⁸ Ġatun toanta taraito bon nakulla, ġatun wiyelliela, Gintoa ta yanti bo barúnba. Gatun noa Peterko wiyá, Kúri, keawaran baġ.

⁵⁹ Ġatun, yakita toanta, wakál hora ta yukita, taraito wiya pirralma wiyelliela, Yuna bo ta unni kuri kakulla ġikouġ katoa; kulla noa Galilaiakál.

⁶⁰ Ġatun noa Peterko wiyá, Ela kúri! keawai baġ gurran yakoai bi ba wiyán. Ġatun wiyelliela noa ba, tanoa-kal-bo muk-kaka-ko ġaiya wiya tibbinto.

⁶¹ Ġatun noa Piriwál warkulléun, ġatun nakilléun bon Peternuġ. Ġatun Peterko noa ġurra wiyellita Piriwál koba, wiya bon noa ba ġiakai, Gikoyánun wal bi tia kurri-kurri tibbinto mukkaka ko wiyánun ġoro-ka.

⁶² Ġatun Peter noa uwa warrai koba, ġatun túġkilléun ġaiya noa kauwál.

⁶³ Ġatun bara kúriko mankulla bon léthunuġ béelma bon, ġatun búnkulla bon.

⁶⁴ Ġatun munmin bara ba upéa bon, búnkulla ġaiya bon bara goará, ġatun wiya bon, wiyelliela, Wiyella bi, ġanto-ke bin búnkulla?

⁶⁵ Ġatun kauwál-kauwál taraikan yarakai wiya bara ġikouġ kin.

⁶⁶ Ġatun purreaġ ba kakulla, kau-umullan ġaiya bara ġarrota kúri koba, ġatun bara piriwál hiereu koba, ġatun bara ġárammateu, ġatun yutéa ġaiya bon kau-umulligél lako barúnba tako,

⁶⁷ Wiyelliela, Kritht ta bi unni? wiyella gearun. Ġatun noa wiya barun, Wiyánun nurun baġ ba, keawai ġaiya wal nura ġurránun:

⁶⁸ Ġatun wiyánun nurun baġ ba, keawai wal nura wiyaiyellinún tia, keawai wal nura tia wamunbinún.

⁶⁹ Kabo noa Yinal kúri koba yellawánun túgkaġ ka kaiyukan ta Eloi koba ka.

⁷⁰ Wiya ġaiya bara yantinto, Yinal ta bi unni Eloi koba? Ġatun noa wiya barun, Wiyan nura ġatoa ta unni.

⁷¹ Ġatun bara wiya tantoa ta, Yanoa gearun kin ġurrullikanto taraito? kulla ġéen ġurra ġéebo kurraka kabirug, ġikouġ kinbirug kóti kabirug.

23

¹ ĠATUN bara yantin konara bouġkulléun, ġatun yutéa bon Pilato kin.

² Ġatun bon bara pirralma, wiyelliela, Ġurra ġéen bon unni ġakoyelliela noa ba barun kúri willuggél, ġatun wiyelliela, yanoa ġuki yikora tullokan Kaitharinuġ, wiyelliela, niuwoa-bo-ta Kritht ta wakál ta Piriwál.

³ Ġatun Pilato-to wiya bon, wiyelliela, Ġa ġintoa ta Piriwál kátan barúnba Iudaioi koba? Ġatun noa wiyayelléun bon, ġatun wiyá, Ġintoa ta wiyan.

⁴ Wiya ġaiya noa Pilato-to barun piriwál hiereu ġatun barun kúri, Keawai baġ ġurra pa yarakai unti kúri ka.

⁵ Ġatun bara bukka-buttibuġkéa, wiyelliela, Pirralman noa barun kúri wiyellin, yantin ta Iudaia ka, Galilaia tinto unti kolaġ.

⁶ Ġurra noa ba Pilato-to Galilaia ka, wiya noa, Unni kúri Galilaiakál?

⁷ Ġatun ġurra noa ba Herodúmba-kan noa wottaikan, yuka bon noa Herod kinko, yakita ġaiya niuwoabo kakulla Hierothalem ka.

⁸ Ġatun nakulla bon noa ba Herodto Iéthunuġ, pitál ġaiya noa kátan kauwál, kulla noa natelli ba bon yuraki tabirug, kulla noa ġurra kauwállan ġikouġ kinba; ġatun nakilliko tarai umatoara ġikouġ kai.

⁹ Wiya ġaiya bon noa wiyellikanne kauwál-kauwál; wonto noa ba keawai wiyelli pa bon.

¹⁰ Ġatun bara piriwál hiereu ġatun bara ġárammateu ġarokilliela, ġatun pirralmulliela bon kauwál.

¹¹ Ġatun Herod katoa ba bara wuruwai koba ġurramaíġa bon bara, ġatun béelma bon, ġatun wuda bon konéin to kirrikin to, ġatun yukéa-kan bon Pilato kinko.

¹² Ġatun unta purreaġ ka wakál la, Pilato ġatun Herod kóti bula umullan: yakita unta kakillan bula bukkakan bula-bo.

¹³ Ġatun Pilato-to noa kau-wiya noa ba barun piriwál hiereu, ġatun barun piriwál, ġatun barun kúri,

¹⁴ Wiya ġaiya barun, Mankulla nura bon unni kúri eummouġ kinko yanti wakál noa ġakoya-uwil ba kúri; ġatun, a! ġurulla, nuiya ta bon baġ unni mikan ta nurun kin keawai baġ ġurrapa yarakai ġikouġ kin, ġino-tara tin pirralma bon nura:

¹⁵ Keawaran, keawai Herodto: kulla baġ yuka nurun ġikouġ kin; ġatun nauwa, keawai ġali tin tetti korien noa kánun.

¹⁶ Wélkorinún wal bon baġ, ġatun wamunbinún ġaiya bon.

¹⁷ (Kulla noa buruġbuġġánun wal wakál yakita ta takillikan ne ta.)

¹⁸ Ġatun bara kaaibulléun wakála purawai, wiyelliela, Yuriġ unni kúri; ġatun buruġbuġgulla bon Barabbanuġ gearun kinko: ¹⁹ (Ġali noa wakál wuruwai tin kokerá ġatun búnkilli tin tetti tin wúnkulla bon jail ka.)

²⁰ Koito noa ba Pilato-to kotelliela buruġbuġgulliko bon Iéthunuġ, wiyéa ka barun.

²¹ Wonto bara ba wiyá, wiyelliela, Buwa bon tetti, buwa bon tetti.

²² Ġatun noa barun wiya yukita ġoro-ka, Minariġ tin? minariġ noa yarakai umá? keawai baġ ġurrapa taraikan ġikouġ kin ġaloa kolaġ búnkilli kolaġ tetti wirrilliko; wélkorinún wal bon baġ, ġatun wamunbinún bon.

²³ Ġatun bara tanoa-kál-bo pulli kakulla kauwál, wiyelliela, búwil koa bon tetti. Ġatun pulli barúnba ġatun barúnba piriwál hiereu pirral kakulla.

²⁴ Ġatun Pilato-to noa wiyá, ka-uwil koa yanti wiya bara ba.

²⁵ Ġatun noa bon buruġbuġġa barun kin unni bon wuruwai tin ġatun bunkilli tin tetti tin wúnkulla bon jail ka wiyatoara barúnba; ġatun noa bon Iéthunuġ wamunbéa barun kin.

²⁶ Ġatun yutéa bon bara ba yuriġ, mankulla ġaiya bara wakál Thimónnuġ Kureniakál ta, tanan uwolliela koruġ tin, ġatun wupéa bara ġikouġ kin taliġkabillikanne, kurri-uwil koa noa willuġ tin Iéthu katoa.

²⁷ Ġatun wirroba bon bara kauwállo konaro, ġatun bara nukuġ-ko, túġkilliela ġatun minki kakilliela ġikouġ kai.

²⁸ Wonto noa ba Iéthu warkulléun barun kai koba, wiyá, Yináلكun Hierotilalemkálin, túġki yikora emmouġ kai, wonto ba túġkillia nura nurunbo, ġatun nurun kaiko wannai tara ko.

²⁹ A! na-uwa, purreuáġ kariġ tanan uwollinún, yakita unta wiyánún bara ba, Murrárúġ bara wannai korien, ġatun unnuġ tara pika keawai pórkuilli korien, ġatun paiyil keawai pittelliko.

³⁰ Yakita ġaiya bara wiyellan bulkára kariġ, Puntimullia ġearun kin, ġatun yúnko ko, Wutilla ġearun.

³¹ Ġatun uwollinún bara ba unni tara kúlai ta kiruġ ka, minnuġ banún wal kúlai ta turrál la?

³² Ġatun unnuġ bula taraikan yarakai willuġ, yutéa ġikouġ katoa wúnkilliko tetti wirrilliko.

³³ Ġatun uwa bara ba unta ko, ġiakai yitirra Kalábary, unta ġaiya bara búnkulla bon ġatun bulun yarakai bula, wakál ta túġkaġ-keri ka ġatun tarai ta wunto-keri ka.

³⁴ Wiya ġaiya noa Iéthuko, Biyuġ, kámünbilla barun, kulla bara keawai ġurra korien umulli ta. Ġatun toinbillan bara kirrikin ġikoúmba, ġatun wupillan woiyo.

³⁵ Ġatun bara nakilliela ġarokito. Ġatun bara piriwál yantibo barun katoa béelmulliela, wiyelliela, Miromá noa taraikan; miromabunbillia bon ġikouġ kóti, wiya noa ba Kritht ta, ġirimatoara Eloi-úmba.

³⁶ Ġatun bara militiko béelma bon, uwolliela ġikouġ kin, ġatun nupilliela bon aket,

³⁷ Ġatun wiyelliela, Wiya bi ba piriwál Iudaioi koba, miromullia bi ġintoabo kóti.

³⁸ Ġatun upulléun wakál upatoara wokka ka ġikouġ kin pulli Hellenik koba, ġatun Latin koba, ġatun Hebáraio koba, ġiakai, Unni ta Piriwál Iudaioi koba.

³⁹ Ġatun wakállo yarakai bulun kinbiruġ-ko, kakilliela ba kúlai ta, béelmulliela bon, wiyelliela, Wiya bi ba Kritht ta, miromullia bi ġintoabo ġatun ġearun.

⁴⁰ Wonto ba taraito wiyayelléun, koakilliela bon, wiyelliela, Keawai bi kinta korien Eloi kai, ġatun ġintoa ta kátan wakál la umatoara?

⁴¹ Ġatun ġalin yakita murráráġ umá; yaki tin ġalin kai umatoara tin: wonto noa ba ġali kúriko, keawai noa yarakai umá pa.

⁴² Ġatun noa wiya Iéthunuġ, Piriwál, ġurrulla bi tia, uwánún ġaiya bi ba piriwálġél lako ġirouġ ka tako.

⁴³ Ġatun noa Iéthuko wiya bon, Yuna bo ta wal baġ wiyán ġirouġ, Unti buġġai purreáġ ka kánún bi tia emmouġ katoa Parádeith ka tako.

⁴⁴ Ġatun yakita kakulla hora ka hekto ta, tokoi ta kakulla yantin ta purrai ta katéa ka hóra kako nain tako.

⁴⁵ Ġatun punnál ta tokoi kakulla, ġatun kirrikin ta hieron kako yiirkulléun búlwa koa.

⁴⁶ Ġatun noa ba Iéthuko kaaibulléun wokka wiya noa, Biyuġ, wunún baġ emmoúmba marai ġirouġ kin máttára; ġatun wiyelléun noa ba unni, wúnkulla ġaiya noa marai

⁴⁷ Yakita ġaiya noa ba kenturionko nakulla unni umatoara, pitálma noa Eloiunuġ, wiyelliela, Yuna bo ta wal murráráġ unni kúri.

⁴⁸ Ġatun bara yantin kùri uwa nakilliko ġala ko umatoara ko, wirrilléun bara wapara, ġatun willuġbo bara uwa.

⁴⁹ Ġatun yantin ġikoúmba kóti ta, ġatun bara nukuġ wirroba bon Galilaia kabiruġ, ġarokéa kaloġ ka, nakilliela unni tara.

⁵⁰ Ġatun kakulla wakál kùri, ġiakai yitirra Yothep, wiyellikan kátan; murraràġ kakillikan, ġatun tuloa kakillikan:

⁵¹ Ġali keawai noa pitál korien barúnba ko wiyellikanne ko ġatun barúnba umatoara ko; Arimathéakál noa, wakál ta kokera Iudaioi koba; niuwoa ba mittilliela piriwál lako Eloi koba kako.

⁵² Unni noa uwa Pilato kin, bon wiyelliko murrin ko Iéthu koba ko.

⁵³ Ġatun noa mankulla barán, ġatun muġġama kirrikin ta, ġatun wúnkulla tulmun ta umatoara tunuġ ta; keawai ba unta kùri wúntelli ta.

⁵⁴ Ġatun unta purreàġ ka tupoi-tupoi-kanne-ta, ġatun papai kakulla thabbat ta.

⁵⁵ Ġatun bara nukuġ uwa ġikouġ katoa Galilaia kabiruġ wirroba yukita, ġatun nakulla tulmun, yakoi ba wúnkulla murrin.

⁵⁶ Ġatun bara willuġbo, ġatun mankulla aromata ġatun mura; ġatun koréa purreàġ ka thabbat ta, yaki tin wiyatoara tin.

24

¹ YAKITA kakulla puneàġ ka yukita thabbat biruġ ka, ġoiokan ta, uwa bara unti ko tulmun tako, mankillin aromata umá bara ba, ġatun taraikan uwa barun katoa

² Ġatun bara nakulla tunuġ umatoara kurrai-kurrai biruġ kurraka ko tulmun tabiruġ.

³ Ġatun bara uwa murrariġ, ġatun keawai bara na korien murrin ta Piriwál koba Iéthu koba.

⁴ Ġatun yakita kakulla, kotelliela bara ba ġe tin, a! buloara kùri bula ġarokéa barun kin killibinbin kaba kirrikin taba,

⁵ Ġatun bara ba kinta kakilliela, ġatun wúnkulliela barúnba ġoara baran purrai tako, wiya bula barun, Minariġ tin nura nakillin moron-kan ta unti tetti-tetti ka?

⁶ Keawai noa unti, kulla noa waita ka ba bouġkulléun: ġurrulla nura yanti wiya nurun noa ba, yakita noa ba kakulla Galilaia ka,

⁷ Wiyelliela, Yinal ta kùri koba wunún wal bon máttàra yarakai-willuġ koba ka, ġatun búnnún wal tetti, ġatun purreàġ ka tarai ka kúmba-ken bouġkullia kánún noa.

⁸ Ġatun ġaiya bara kotelliela ġikoúmba wiyelli tara,

⁹ Ġatun willuġbo bara uwa tulmun tabiruġ, ġatun wiya unni tara barun kin dódeka ta, ġatun barun yantin ta.

¹⁰ Ġala bountoa Mari-ko Magdalakálin-to, ġatun bountoa Ioanna-ko, ġatun bountoa Mari-ko tunkan-to Yacóbo-úmba-ko, ġatun taraikan-to bara nukuġ-ko barun katoa, wiya unni tara barun apotholnuġ.

¹¹ Ġatun bara ba wiyelli tara kakulla barun kin yanti kiloa ġakoyelli tara, ġatun bara keawai ġurrariyelli pa barun.

¹² Peter ġaiya noa ġarokéa, ġatun murra tulmun tako; ġatun woinkulliela barán, nakulla noa kirrikin wuntoara pitaka, ġatun waita noa uwa, kotelliela unni tara kátan ba.

¹³ Ġatun yakita purreàġ ka yantibo, buloara-bula barun kinbiruġ uwa kokerá kolaġ, ġiakai yitirra Emmaou, yakita kaloġ Hierothalem kabiruġ purloġ hekékonta ta.

¹⁴ Ġatun bara wiyellan unni tara kakulla ba.

¹⁵ Ġatun yakita kakulla, wiyelliela ba, ġatun kotelliela bara ba, Iéthu noa niuwoabo uwa papai barun kin, ġatun uwa barun katoa.

¹⁶ Wonto ba ġaikouġ barúnba tullamá, ġimilli korien koa bara bon.

¹⁷ Ġatun noa wiya barun, Minariġ, nura unni tara wiyellan, uwollin nura ba, ġatun minki kátan?

¹⁸ Ġatun wakál bulun kinbiruġ, ġiakai noa yitirra Kleopa, wiyayelléun, wiyelliela bon, Ġintoa bo ta wakál ġowikan Hierothalemkál, ġatun keawai unni tara ġurrapa kakulla ba unti tara purreaġ ka?

¹⁹ Ġatun noa wiya barun, Minariġ-ke unni wonnuġ? Gatun bon bara wiyá, Gikouġ kin Iéthu kin Nadharetkál unni kakulla propet ta kaiyukan umulliko ġatun wiyelliko mikan ta Eloi koba kin, ġatun yantin ta barun kin kúri ka:

²⁰ Ġatun yakoai bara ba piriwál hiereu, ġatun ġearúnba piriwál kariġ wúnkulla bon wiyayelliko tetti kolaġ, ġatun bara bon búnkulla tetti.

²¹ Wonto ġéen ba kota niuwoa miromulliko Itháraelnuġ: ġatun yantin unni tara ba, unni buġġai kúmba-ken-ta kátan unnoa tara umatoara biruġ

²² Kauwa, tarai bara nukuġ ġearúnba konara biruġ kota bunbéa bala ġearun, bara ġoiokéen kátan tulmun ta:

²³ Ġatun keawai bara ba na pa ġikoúmba murrin, uwa ġaiya bara, wiyelliela, nakéun bara natoara aġelo kariġ koba wiya moron noa kakulla.

²⁴ Ġatun taraikan barúnba ġearun kinba uwa tulmun kolaġ, ġatun nakulla yanti bara nukuġko wiya; keawai bon bara na korien.

²⁵ Wiya ġaiya noa barun, A! woġkál nura, ġatun pirriral búbúl ġurrulliko yantin ta wiyatoara bara ba propet to!

²⁶ Keawai noa Kriht kámunġinbia ta umatoara ba unni tara, ġatun uwolliko kirrikin kolaġ ġikouġ ka tako?

²⁷ Ġatun kurri-kurri Mothe ko noa ba wiya, ġatun yantin to propet kariġ ko, ġurrabunéa ġaiya noa barun unnoa tara upatoara biruġ ġikouġ kai.

²⁸ Ġatun bara papai uwa unta kolaġ kokerá kolaġ, unta kolaġ bara: ġatun noa puntelliela kaloġ kolaġ.

²⁹ Wonto bara ba pirralma bon, wiyelliela, Kauwa ġearun katoa; kulla wal yaréa kakillilin, ġatun purreaġ ta waita uwollilin. Ġatun noa uwa murrariġ kakilliko barun katoa.

³⁰ Ġatun yakita kakulla, yellawa noa ba barun katoa takilliko, mankulla noa arto, ġatun pitálma noa, ġatun yiirbuġġa, ġatun ġukulla ġaiya barun.

³¹ Ġatun ġaikuġ barúnba buġkulléun, ġatun ġimilléun ġaiya bara bon; noa ġati kakulla barun kinbiruġ.

³² Ġatun bara wiyellan barabo, Wiya, ġearúnba búlbúl winna ba ġearun kinba ko murruġ kaba ko, wiyelliléun noa ba ġearun katoa, ġatun ġurrabunbéun noa ba ġearun upatoara ta?

³³ Ġatun bouġkulléun tanoa-kál-bo ġatun willuġ ba kakulla Hierothalem kolaġ, ġatun nakulla barun hendeka ta, ġatun barun taraikan barun katoa,

³⁴ Wiyelliela, Bouġkulléun bo ta yuna Piriwál ta, ġatun paikulléun Thimon kin.

³⁵ Ġatun bara wiya unni tara upatoara yapiġ koa, ġatun ġimilléun bara bon yiirbuġġaliela noa ba arto.

³⁶ Ġatun bara ba wiyelliela, Iéthuko noa niuwoabo ġarokéa willi ka barun kin, ġatun wiya barun noa, Pitál nura kauwa.

³⁷ Wonto bara ba pulul-pulul kakulla ġatun kinta-kan, ġatun kotelliela bara marai ta bara nakulla.

³⁸ Ġatun noa wiya barun, Minariġ tin nura kinta kátan? ġatun minariġ tin nurúnba búlbúllo kotan?

³⁹ Nauwa tia máttára emmoúmba, ġatun yulo emmoúmba, Gatoa bo: numulla tia, ġatun nauwa; kulla keawai marai koba purriüġ korien ġatun tibun korien, yanti nakulla nura tia ba emmoúmba.

⁴⁰ Ġatun wiya noa ba unni, túġumbéa barun noa ġikoúmba máttára ġatun yulo.

⁴¹ Ġatun keawai bara ba ġurra pitál ko, ġatun kotelliko, wiya noa barun, Wiya, nuruúnba kunto unti?

⁴² Ġatun bara bon ġukulla pundol koyubatoara makoro biruġ, ġatun pundol nuparai kabiruġ.

⁴³ Ġatun noa mankulla, ġatun takulla barun kin mikan ta.

⁴⁴ Ġatun noa wiya barun, Unni tara wiyellikanne-ta wiya nurun baġ ba, kakulla baġ ba nurun katoa, yantin koa ka-uwil kakilliko upatoara wiyellikanne-ta Mothé-úmba, ġatun barun ba propet koba, ġatun tehilim kaba, emmouġ kai.

⁴⁵ Ġurrabunbéa ġaiya noa barun, ġurra-uwil koa bara upatoara ta;

⁴⁶ Ġatun wiya noa barun, Yaki upatoara, ġatun yaki murráraġ ta Kritht ko ġikouġ kakilliko tetti ko, ġatun bouġkulliko kúmba-ken-ta purreaġ ka tetti kabiruġ:

⁴⁷ Ġatun wiyabunbi-uwil koa minkikanne-ta ġatun warekullikanne-ta yarakai umul-likan ko ġikouġ katoa biruġ yitirra biruġ yantin ta konara, kurri-kurri kabiruġ Hierothalem kabiruġ.

⁴⁸ Ġatun nura nakillikan kátan ġali tara ko.

⁴⁹ Ġatun, ġurrulla, wupin baġ nurun kin wiyatoara emmoúmba koba Biyuġbai koba: wonto nura ba minkéa kokerá Hierothalem ka, kaiyu koa nurun kauwál búlwára tin.

⁵⁰ Ġatun yutéa noa barun kaloġ kolaġ Bethany ka bo, ġatun noa wupiléún máttára ġikoúmba wokka-laġ, ġatun pitálma noa barun.

⁵¹ Ġatun yakita kakulla, yaki pitálmulliela noa ba barun, mantilléún ġaiya bon barun kinbiruġ, ġatun kurréa bon wokka-laġ moroko kako.

⁵² Ġatun bara bon murráraġ koyelliela, ġatun willuġ ba kakulla Hierothalem kolaġ kauwál-kan pitál-kan:

⁵³ Ġatun kakilliela murrúġ hieron ka, murráraġ wiyelliela ġatun pitálmulliela bon Eloinuġ.

AMEN.